





A C T A
SOCIETATIS IABLONOVIANAE
DE
SLAVIS VENEDIS
ANTIS
VILZIS ET SORABIS
ALIQVID
DE VANDALIS ETHENETIS



TVM
DE VARIIS DISTANTIAS
GEOMETRICE ET TRIGONOMETRICE ME-
TIENDI RATIONIBVS

ANNI MDCCCLXXII

TOMVS III

LIPSIAE
EX OFFICINA LOEPERIA
CIO IO CC LXXIII.



Trado Tibi, beneuole Lector, has vi-
rorum doctorum dissertationes, sub
auspiciis Maecenatis nostri ab integerimis
Iudicibus aut publice laudatas, aut praemii
ornatas, quas pro suo litterarum amore in
noxi):(2 hist-

historiae Sarmaticae et Slauicae incremen-
tum, optimorumque ingeniorum incitamen-
tum exhiberi commendarique voluit reipu-
blicae litterariae. Quod Principis consilium,
ut est ingenuum, liberale, et ab omni o-
stentatione alienum, non poterit non in-
telligentissimis quibusque et litterarum a-
mantissimis omnino probari.

Ego vero ingenue laetabor, si mea
qualiscunque cura et diligentia voluntati
Celsissimi Principis, qui me ei rei in hunc
annum praeesse voluit, et tuae, Lector, expe-
ctationi satisfecerit.

Non.

Non ignorauit Societas Iablonouiana,
propter rerum tradendarum antiquitatem,
scriptorum medii aeui barbaram obscurita-
tem, et rerum Slavicarum incredibilem in-
constantiam, multa reperta esse, quae dili-
gentius definienda et latius disputanda vide-
rentur; neque vñquam scriptoribus suis eam
ingenii felicitatem arrogauit, vt tantis litte-
rarum tenebris soli lucem afferre possent:
modestiam tamen in reprehendendis illo-
rum lucubrationibus, et animum, ab omni
partium studio remotum, ab aequissimis
quibusque Iudicibus expectat. Seruet
Deus

Deus optimum Principem, dulce litterarum
decus, et Te res Tuas feliciter agere iubeat.

Lipsiae Kal. Febr. clo Ip CCLXXIII.

CHRISTIANVS AVGVSTVS CLODIVS

PROF. PHILOSOPHIAE ORDINAR. COLLEG. MAI.

PRINC. SODALIS.

DISSER-

DISSERTATIO
DE
VENEDIS ET ANTIS
EORVMQVE
SEDIBVS ANTIQVISSIMIS
PRO ANNO 1772.

ΠΕΡΣΕΤΣ.

Per Reverendum Patrem Franciscum Pubitschkan
S. I. Pragensem.

A

OSTENDITVR EX HISTORIA ET GEOGRAPHIA,
VBINAM FVERINT ANTIQVISSIMAE SEDES
VENEDORVM ET ANTIVM.

Recete sapienterque censuit *Celsissimus Princeps Iablonovius*, perpetuus bonarum literarum Promotor, quaestione de antiquis sedibus Venedorum, Antarumque, seu Antium (idem est de Slauis, seu Slauinis Antarum consanguineis) ventilandam proponi; quippe quod *Idem* perspicue intellexit, quaestione hanc non nouam quidem, sed ita tamen a Viris eruditis paene multis esse pertractatam, ut certa de iis sententia nondum statui posse videatur. Adeo, quod nonnullorum eo progressa sit contentio, ut facile appareat, non, quod verum sit, ab iis proditum esse, sed ne nihil omnino isto in argumento dixisse videantur, multa verba fecisse. Sunt enim, qui Venedorum gentem ex Scandinauia repetant, eosque confundant cum Vandalis, tanquam nullum, nisi quod ad nomen attineat, inter ipsos discrimen deprehendatur.¹⁾ Verum istorum opinionem iam dudum Balbinus, Bangertus, ac Schurtzfleischius refutarunt.²⁾ Alii veteribus Scythis Slauorum

A 2 (idem

1) Crantzius in *Vandalia*, quem sequutus est Episcopus Schleini- cius in *Vandalo-Boemia MS.* in cuius Prologo diserte haec propugnat.

2) Balbinus l. *Miscell.* Dec. I. Bangert in notis ad *Helmoldi Chron.* c. 2. p. 9. *Schurtzfleisch.* *Diss. hist. polit.* XXX, de rebus Slau.

(idem est de Antis, seu Antibus) nomen supponere non dubitant; inter quos Orbinus in primis numerandus est, cum ipsum adeo Scytham illum apud Alexandrum, ut Curtius tradit, superbius perorante, *Slauum* dicere non veretur.³⁾ At, si in hoc ipsis subscriberemus, dicendum quoque foret, omnes Europae, Asiaeque gentes, quas antiqui Geographi non satis norant, dummodo in Aquilonem vergerent, Slauos posse nominari, quod eos illi communi nomine Scythes appellauere. Minime vero ferenda eorum libido est, qui in obuia quaeque populorum nomina inuolant, eaque Venedice, seu Slauice co-nantur interpretari, ut Venedorum, seu Slauorum antiquas sedes nobis possint patefacere. Ex ea quidem, ut alia hic omittam, manauit non vetus ille plane, sed tamen hoc in primis tempore egregie castigatus eorum error, qui Czechorum sedem in veteri Zichia, Lachorum, seu Lechitarum in Lazia, Moschos ad Moschicos montes se inuenisse somniabant. Hunc errorem, quem ciuitate donatum iri, eius patroni falso sperauere, recte nuper exploserunt Viri eruditissimi plurium academiarum; et ab auctore chronologiae⁴⁾ rerum Boëmicarum opinionis istius inanitas detecta est, qui ostendit, eam praeter infirmam, ac miseram nominum similitudinem nihil habere soliditatis. Portenti sane simile, cum nuper adhuc aliquis,⁵⁾ infirmae huius opinionis qualemque patrocinium fuscipiens, quaerere non dubitauit, fueritne, qui Zichos Czechorum maiores Slauos non fuisse ostenderit. Vtrum homini, partium studioso, id quod tam multis in locis etiam ad fastidium usque declarauit, quidquam ostensum, ac persuasum, aut non persuasum sit,

non

3) Orbinus nel Regno degli te P. I. ad annum 480.

Slavi p. 12. 13. Q. Curtius l. 7. 5) Böhmishe Münzbelustigung.

4) Vide Chronologische Geschich. B. I. S. 65.

non laboramus. Hoc tamen etiam pro certo teneat, si nihil demonstratum est, minus certe demonstratum esse, Zichos veteres Slauos fuisse. Verum non ea nunc res agitur, satisque est, eruditis nihil istorum, quae patroni infiriae huius opinionis adhuc attulerint, probabile visum, solum iis certa apparere, qui partium studio, quod vitium eruditionis sincerae gloriae ut maxime aduersum est, supra, quam dici possit, occupati, foetus suos, et si spurius, odiisse turpe arbitrentur. Quanquam si argumentum propositum penitus inspexerimus, deprehendemus sane, non tam operosum esse, opiniones quorundam conuellere, quam operosum sit, certi aliquid, aut saltē, quod eruditorum iudicio sese approbare possit, definire. Ac difficultatis istius quidem ratio inde manat, quod nomen *Venedorum* apud scriptores seculo primo alteroue, *Slauorum* vero ac *Slauinorum*, aut si mauis, *Sclauorum*, ac *Sclauinorum*, *Antarumque* apud seculo VI. antiquiores frustra quaeras. Nam Venetos ad Adriam, atque in Gallia quondam celebres, quos aliqui Venedos, et eiusdem corporis cum Slavis fuisse sibi persuadent, cum Venedis, seu Slavis confundendos non esse, postea ostendemus. Primi autem, quod sciamus, qui nomen Venedorum memoriae proderent, Plinius scriptor latinus, Cornelius Tacitus et ipse latinus, ac Claudius Ptolemaeus celebris geographus graecus, fuerunt.⁶⁾ Paullo deinde vberius de Venedis, seu etiam Winidis, sed iam in Slauinos et Antas diuisis, Iornandes seculi VI. scriptor, R. Gothorum Notarius, vt deinceps ostendam: Procopius vero Caesariensis Synchronus de iisdem Slauinis et Antis, at dissimulato Venedorum no-

A 3 mine,

6) Plinius l. 4. c. 13. n. 27. edit. graeco-lat. Sansonii, seu l. 3. Tacitus de moribus Germ. cap. 46. c. 5. Tabula VII. Europae. Ptolemaeus l. 3. geograph. p. 81.

mine, commemorarunt.⁷⁾ Neque enim recenti scriptori Cl. assentior, qui scribit,⁸⁾ Procopium, quoties fere de Slavis mentionem fecisset, toties haec duo: *Slavos*, *vel Venedos*, coniunxisse. Evidem Procopium diligenter, idque semel, iterum, ac saepius consului; at ne semel quidem illum *Slavos* cum *Venedis* coniunctione *disiunctua* copulasse deprehendi; nec difficulter ista in re scriptori laudato assensurum me profiteor, si quis mihi revera locum aliquem in Procopio ostenderit. Venetos Procopius quidem nominat, sed modo ad Adriam colentes Venetianos,⁹⁾ modo eos, quos Graeci Cyaneos, *κυανέος*, vocabant, seu *caeruleos*, a cyaneo, seu caeruleo colore, aut etiam aqueo.¹⁰⁾ Nam colorem *κυανεόν*, caeruleum, et aqueo similem hic recte dici, non negabit, cui factiones, Praesinos inter et Venetos, quondam celebres non sunt ignotae.¹¹⁾ Sunt, qui Herodoto scriptori graeco (Isaiae tempore vixit¹²⁾) Venedos ad mare Balticum colentes, ipso etiam nomine notos fuisse contendant, ex eo, quod vbi electrum, seu succinum proueniret (prouenire autem istic omnes norunt) non ignorauerit;

7) Iornandes de reb. Get. c. 5. Procopius Caef. l. 3. de bello Goth. c. 14. et alibi.

8) V. Prodromus Hagecian. Annal. pag. 123.

9) Procop. l. 1. bell. Goth. c. 15.

10) V. Idem arcan. hist. c. 7. et Alemannus in Notis. Et bello Pers. l. 2. c. 11.

11) V. Procop. l. 7. hist. arc. l. 1. de bello Pers. c. 11. et c. 24. Sueton. in Vitellio c. 14. Praefiniae. Dio l. 59. de orig. Venet. et Prafin. Chronic. Paschale ad a.

m. 4756. Theophanes ad ann. 9. Iustini, et amplissimae notae in eum Iacobi Goar. Alemannus in c. 7. Procop. hist. arcan. Etiam apud scriptores veteres graecos *κυάνεος* caeruleum significabat. Sic Hesychius *κυάνεον* dixit colorem, qualis coeli facies sit, cum nubes absint, ἄδειος χρώματος θραύσονθετος. Sic Aristoteles aquam maris θάλατταν *κυάνεαν* appellauit.

12) Sic Baierus in Comm. Petropol. At Ricciolus Herodotum natum anno ante Christum 488. scribit.

rit; tametsi accolaram nomen ipsum non prodiderit. Locum Herodoti ipsum producam, quo res clarior euadat: ἔτε γαρ ἔγωγε ἐνδέκομαι, Ἡριδανὸν οὐλέεθαι πρὸς Βαρεβάραν ποταμὸν, ἐνδιδόιται ἐς θάλασσαν τὴν πρὸς Βορέην αὔεμον, ἀπὸ τῆς τὸ ἥλεκτρον Φοιτῷν λόγος ἐστί — τέτο μὲν γαρ Ἡριδανὸς αὐτὸς οὐτηνορέει τὸ ἔνομα, ὡς ἐστι Ελληνικὸν, ηγή ἐτι Βαρεβαραμὸν, ὑπὸ ποιητῶν δέ τινος ποιηθὲν etc. Neque enim assentior, fluvium quendam esse, Eridanum a barbaris vocitatum, qui subit mare ad septentrionem spectans, unde eleētrum venire narratur. — Nam vel ipsum coarguit nomen Eridanus, quod graecum est, non barbarum, ab aliquo poëtarum fictum — ab extrema itaque ad nos venit stannum, eleētrumque. Eridanum nempe Graeci, quo aptior eorum ori vox esset, dixerunt pro Rhudone, ut Marcianus Heracleota, non, ut Ptolemaeus scribit, Rhubone, hodie Duna, prope Rigam fluvio. Nolim vocare in dubium, notine Herodoto barbari illi de nomine fuerint, an non? imo credibile est, audiuisse illum Venedos dici, a quibus sinum ipsum Venadicum dictum esse, Ptolemaeus postea docuit. Deinceps tamen Venedorum illorum nomen apud scriptores usque ad Plinium, Tacitumque, ac Ptolemaeum, in tantam venit obliuionem, ut ipsum adeo fluuium Rhudonem, quem Eridanum, ut dixi, vocauere, in Italia quaererent, fortasse, ut ego quidem arbitror, quod Henetos in Italia considentes cum Venedis illis confunderent, atque unam eandemque gentem Henetos et Venedos, etsi falso, ut opportuno tempore conabimur ostendere, sibi persuaderent. Vedit graues scriptorum de insulis eleētridibus, ubi succinum proueniret, errores Plinius, et pro merito castigavit, cum l. 3. c. 26. n. 30. ita scripsit: *Iuxta eas (Ab-syrtides) Eleērides vocauere, in quibus proueniret succinum, quod illi eleētrum appellant, vanitatis graecae certissimum*

documentum.

documentum, adeo, ut, quas earum designent, haud unquam constiterit. Ita quidem ille, tametsi neque ipse certiora docuerit, cum l. 4. insulas illas ab aduerso Britannicarum per mare Germanicum sparsas, falso existimauerit. Gratia nihilominus referenda Plinio est, quod vel primus, de quo constet, Venedorum nomen nobis transcripsit.¹³⁾ Secutus eum Cornelius Tacitus est; sed prope aberat, quin Venedos ipsos Sarmatico corpore exemtos, Germanico infereret. Sic enim ille de Germ. mor. c. 46. *Peucinorum, Venedorumque et Fennorum nationes Germanis, an Sarmatis adscribam, dubito.* Sed salu-
res est: Iornandem habemus, qui Winidarum (sic enim Venedos etiam vocatos ostendit) nationem in Slauinos et Antas, utrosque Slauici corporis et linguae homines, di-
vidi luculenter docuit, ut adeo minime de hoc sit dubi-
tandum. *Introrsus, inquit ille c. 5. de reb. Get. illi (Scythiae primae, quam alii fere Sarmatiam dixerunt) Dacia est, ad coronae speciem arduis alpibus emunita, iuxta quorum sinistrum latus, quod in Aquilonem vergit, et ab ortu Vistulae fluminis, per immensa spacia venit, Winidarum na-
tio populosa confedit. Quorum nomina licet nunc per va-
rias familias et loca mutentur, principaliter tamen Sclauini et Antes nominantur.* Sed et Ptolemaeus ante Iornandem dubitationem Taciti sustulerat, qui l. 3. geogr. l. c. ita scripsit: *Tenent Sarmatiam gentes maxima; Venedae per totum Venedicum finum, et super Daciam Peucini, et Ba-
starnae, et qui totum Maeotidis latus, Iapyges et Roxolani, et qui interiores sunt iis, Hamaxobii, et Alauni Scythae. Minores autem gentes tenent Sarmatiam penes Vistulam qui-
dem*

¹³⁾ Sic vero Plinius, postquam Eningiam (Finningiam, ut eadem sit cum Fennia, legendum Harduinus in notis ad l. 4. c. 13. n. 27. ubi de Eningia et Venedis Plinius a-

git, moner) paucis verbis perstrin-
xit: *Quidam, inquit, haec habita-
ri ad Vistulam usque fluvium a Sar-
matis, Venedis, Scirris, Hirris, tra-
dunt.*

dem fluuium; sub Venedis Gythones et Phimi; post: Bulanes, sub quibus Phrunungundiones, post Auarini iuxta caput Vistulae amnis. Sub his Ombrones; post: Anatrophrachi; post: Burgiones; post Arsyetae; post: Soboci: post Piengitae, et Biessi penes Carpatum montem. Iis omnibus orientiores sunt sub Venedis quidem iterum Galindae, et Sudeni, et Stauani, usque ad Alaunos.¹⁴⁾ Venedicum sinum ab ad-sitis Venedis dictum esse, verba Ptolemaei luculentius docent, quam ut id probare necesse videatur. Cumque, eodem teste scriptore, Venedi, seu Venedae, per totum Venedicum sinum coluerint: dicendum est, eos a Vistula fl. qui, ut idem auctor narrat, Germaniam a Sarmatia dirimeret, ad Finnos usque habitasse, atque apud eandem gentem succinum prouenisse, toto iam olim orbe notum ac celebratum. Huc valet locus Plinii paullo superius citatus. At hoc pacto fortasse a Tacito recedemus? ait enim is c. 45. de moribus Germanorum: Non Venedos, sed Aestyorum gentes dextro Sueuici maris littore, quod idem est cum Ptolemaei sinu Venedico, allui, neque Venedos, verum Aestios, electrum seu succinum legere. * Verba Taciti sic habent: *Dextro Sueuici maris littore Aestyorum gentes alluuntur; et paullo post: Sed et mare, inquit, scrutantur, ac soli omnium succinum, quod ipsi Glesum vocant, inter vada, atque in ipso littore legunt.* Praeterea, si, praeter Venedos, tot alii populi statuuntur in Sarmatia, quomodo credibile fiet, Venedorum nationem maximam fuisse, tantam nempe, ut, quidquid inter Wolgam et Daniam, mare item Balthicum et Graeciam intersit, implere potuerit? De his rebus nunc differendum

¹⁴⁾ Ptol. 1. 3. Geogr. pag. 81, edit. graeco-lat. Sansonii, seu 1. 3. c. 5. Tabula VII. Europae.

dum erit, ne initio adhaerescat oratio. Primum sic censeo: neque Ptolemaeum, neque Tacitum hallucinatum esse; atque Ptolemaeum de vetusto tempore, et antequam Aestii regionem ad Electrides occupassent; Tacitum de suo, et, postquam in locum Venedorum Aestii successerint, loqui. Alioqui enim, si Venedi ea regione penitus excludantur, a qua, amabo, gente *Sinus* ille maris Baltici, Veneticus nuncupari potuit? Et posterius vero regionem illam Aestios occupasse, ac postea ibidem resedisse, argumento est, quod gentem hanc istic, seculo VI. et VIII. desinente, Cassiodorus et Eginhardus; ille seculi VI. hic seculi I. scriptores, habitasse, annotauerint.¹⁵⁾ Adiungo vtriusque scriptoris verba. Ac Cassiodorus quidem litteras Theoderici Regis, ad Aestios datas, quibus de succino transmissio gratias agit, sic refert: *Haec estis Theodericus rex. Illo et illo legatis vestris venientibus grandaeuos studium notitiae habuisse cognouimus, ut in Oceani litoribus constituti cum nostra mente iungamini; suavis nobis, et admodum grata petitio, ut ad vos pertineret fama nostra, ad quos nulla potuimus destinare mandata.* Ideo salutatione vos affectuosa requirentes indicamus, succina, quae a vobis per horum portatores data sunt, grato animo fuisse suscepta: quae ad vos Oceani vnda descendens hanc leuissimam substantiam, sicut et vestrorum relatio continebat, exportat etc. Eginhardus vero sic habet: *Hunc sinum (Balticum mare sic nominat) multae circumfident nationes: Dani scilicet, et Sueones, et quos Hormannos vocamus, septentrionale litus, et omnes in eo insulas tenent: at litus australe Slavi (sic enim Venedi seculi octaua fine tuto iam nominari poterant) et Aesti,* et

¹⁵⁾ Cassiodor. I. 5. Variar. c. 2. Ep. I. p. 24. Iust. Dithmarus in Ta. Eginhard, in Car. M. vita c. 12. citum de moribus Germ. p. 242. V. Hartknochii Prussia vetus P. I.

et aliae diuersae incolunt nationes. Cassiodoro accedit ^{De reb. Get.} Iornandes, seculi itidem VI. scriptor, cum de *Itemestis*^{c. 5.} (legendum *Aestii*, recte, opinor, monet Hartknochius) sic scribit: *Ripam Oceani tenent, pacatum genus omnino; et c. 23.* vbi aperte, praeter Venedos, Slauinos etiam et Antes vocat, sic habet: *Aestiorum quoque similiter nationem, qui longissima ripa Oceani Germanici insident, idem ipse* (Emmericus Gothorum Rex) *prudentiae virtute subegit.* Aestii sine dubio Gothic corporis homines erant; tametsi eorum lingua sensim seu ad Slavicam, seu ad Finnicam degenerauerit. De corpore Gothic testatum faciunt non solum litterae Theoderici, paullo ante adductae, sed etiam inscriptio sepulcralis Boleslai Chrobri, vbi *Rex Gothorum,* seu *Polonorum* nominatur, inde nempe, quod Gothi aliqui in vnam cum Polonis gentem deinceps coaluerint, aut quod eo loco resideant Poloni, quem Gothi Aestii olim occuparunt. Immo et eadem de causa Gothicas voces sibi Poloni asciuisse dicuntur. Fortasse Aestii hi iidem erant, quos Pytheas apud Plinium Guttones, tanquam de Gothis sint, vocat.¹⁶⁾ Sed et Tacitus Aestios Germanos fuisse non obscure prodit, cum eos praeter ritum habitumque Suevis communem (quod quidem argumentum ad gentilitatem eandem probandum non sufficeret, suo loco ostendemus) lingua Britannicae propiore vsos, et frumenta caeterosque fructus patientius, quam NB. pro solita Germanorum inertia, laborare, asseuerat. Ex hoc quidem, quod Tacitus linguam Aestiorum Britannicae pro-

B 2

piorem

16) Sic vero Pytheas apud Plinius l. 37. c. 2. Pytheas Guttonibus Germaniae genti accolitae aestuarium Oceani, Montenom mon nomine, spacio stadiorum sex millium (Cluu. l. 3. Germ. ant. c. 34. sexcentorum

corrigit) credit. Aestuarii nomine non est dubium, quin Pytheas locum, vbi succinum colligeretur, voluerit designare. Idem forte est de Sciris et Hirris, a Plinio l. 4. c. 13. istic locatis.

piorem fuisse asseueret, Cluuerius l. 3. Germ. ant. c. 45. existimat, Aestios eam in prima sede iuxta Rhenum per commercia cum Britannis didicisse; at sine vlo fundamento. Verisimilius est, quod Dithmarus habet,¹⁷⁾ Aestiorum veterum populorum occidentalium linguam *Scytho-Celticam*, quam Britanni quoque diutius retinuerint, fuisse. Quando autem Aestii, depulsis Venedis, littus illud australe occupauerint, nemo scriptorum memoriae prodidit. Valuerit igitur adhuc Hartknochii coniectura, quippe historiae veteris temporis, vt ego quidem arbitror, prorsus consentanea, qui ait, Aestios, cum Gothos ex Pomerellia et Cassubia Pontum Euxinum versus (de quo motu Iornandes videri potest) mouentes, sequerentur, depulsis ab littore Venedis, istic confedisse.

Declaratum est, quomodo sinus Venedicus, tametsi Aestii seu Aestyi eum occupauerint aliquando, nomen suum Venedis acceptum referat. Nunc in eo versabitur **conatus** noster, vt, quomodo credibile sit, Venedos, quibus scriptores fatis angustos describere limites videntur, tam amplam tamen nationem fuisse, quae tot deinde regiones potuerit implere, inuestigemus. Regiones iam supra generatim saltem, quod hic sufficiat, designauit; vt nihil dicam de cladibus, quas ante, quam regiones illas potissimum inter Graeciam, Istrum, mare Adriaticum, et Franciam occuparent, perpessi fuerunt. De iis Iornandes, Procopius, Menander, aliique videri possunt. Haec certe sunt, quae gentem indicent fuisse maximam; sed ubi confederit olim, non facile videtur posse explicari. Et quanquam Ptolemaeus, Iornandes, ac Procopius in primis, vt mox videbimus, Venedorum sedes omnium optimae nobis patefecerunt: non minimam tamen rationibus nostris

17) V. Iust. Dithmarus ad c. 45. Taciti pag. 242.

nostris difficultatem obiicere videntur alii tot populi, quos Venedis ita vicinos fuisse laudati scriptores docent, vt Venedis minus terrarum spatium, quam quod gentis huius amplitudo requirat, relinquere videantur. Sed neque illud auspicatius fortasse cadit, quod Iornandes et Procopius alias praeterea *Antarum*, Venedici generis hominum, sedes, a Venedis diuersas, nobis patefecerunt, idque propterea, quod ipsas illas sedes, in quibus coluisse Antas iidem tradunt, olim ab aliis populis infessas fuisse, vix possumus dubitare. De his rebus mihi distinctius disserendum, et difficultas prius omnis, quam ad caetera progrediamur, penitus est explicanda; id si feliciter dederimus perfectum, spem habemus, fore, vt reliqua non improbabiliter constituamus. Ac sinum totum Venedicum a Ptolemaeo Venedis attributum esse, ostensum superius est, cum locum ipsum Ptolemaei adduceremus. At tot populi, quos idem in Sarmatia locat, quantum, oro, spatium Venedis relicturi sunt? Sub Venedis Gythones (putem eosdem esse, quos Pytheas *Guttones*, Tacitus *Aestyos*, Plinius *Scyros* et *Hirros* nominauit: nisi potius Aestii dicendi vna gens fuerit, ex omnibus his populis conflata) et Phinnos; Bulanos, aliosque sub diuersis nominibus populos collocauit. Cluuerius certe vnos Aestios latissime coluisse ait. Nam et Prussiam, et totam Curiam, Liuviam quoque, Podlachiam, et Masuriam, vt hodie vocantur, iis attribuit. Tacitus *Peucinos* seu *Bastarnas*, quos Ptolemaeus duplicem videtur gentem facere, opponit Venedis, hosque, *quicquid inter Peucinos Fennosque siluarum ac montium erigitur, latrociniis ait pererrare*. V. Tacitus de mor. Germ. c. 46. Peucinos illos, ac Bastarnas super Daciam coluisse, post Tacitum etiam Ptolemaeus affirmauit. Strabo vtroque antiquior ad Tyram

fluum: Scymnus Chius, qui Mithridatis tempore viuebat, vicinos Thracibus fecit,¹⁸⁾ eosque Tacitus Germanis accenseret.¹⁹⁾ Omitto *Vidioarios*, quos Iornandes ad ostia Vistulae statuit,²⁰⁾ atque penes Itemestos, forte *Aestios*, ut iam superius annotauimus, locat. Suspicari enim quis possit, *Vidioarios*, tametsi dicat eos ex diuersis nationibus aggregatos fuisse, eosdem esse, quos idem Iornandes c. 17. *Vinidarios* dicit, tanquam ex *Winidis* aliisque populis coaluissent. Haec si attendantur: quantum terrarum spatium, oro, *Venedis*, seu *Winidis* in eadem Sarmatia relinquetur? Dicat etiam Iornandes,²¹⁾ *Winidarum* nationem populosam ad sinistrum latus *Daciarum Alpium*, *quod in Aquilonem vergit*, et ab ortu *Vistulae fluminis* per immensa spacia venit, confedisse? Addat idem: *Sclauinos* a ciuitate noua (fortasse *Nouogradum* ad *Borythenem*, aut alia quaedam ciuitas intelligenda hic est) *Sclauinos* inquam a ciuitate noua, et *Sclauino Rumunense et lacu*, qui appellatur *Musianus*, usque ad *Danastrum*, et Boream *Visola tenus* fuisse commoratos. *Ibi*, verba sunt Iornandis, *paludes, silvasque pro ciuitatibus habent*, *Antes vero, qui sunt eorum fortissimi, qui ad Ponticum mare curnantur, a Danastro extenduntur, usque ad Danubium, quae flumina multis mansionibus ab inuicem absunt.* Christophorus de Iordan existimauit²²⁾ se ciuitatem nouam, vti *Sclauinum Rumunense ac Lacum Musianum* ad Danubium reperisse. Ciuitatem enim nouam, *Nouas* urbem in ora *Dacie Lederatae*; de qua Procopius l. 4. aedif. c. 6. oppositam

18) Οὐτοι δέ, inquit Scymnus de ac domiciliis, ut Germani, agunt, Chius pag. 46. edit. Hudson. Θράκης inquit c. 46. in German. κες Βασάρων τ' ἐπήλυδες.

20) Iornandes de reb. Get. c. 5.

19) Peucini, quos quidam Bastarnas vocant, sermone, cultu, se- 21) Iornandes de reb. Get. c. 5. 22) Iornand. de orig. Slav. T. II, Sect. 32. n. 473.

positam esse dixit, quae in tabula Peutingeriana *civitas noua* vocaretur, distans a Margo fl. M. P. XLVI. seu 11 et $\frac{1}{2}$ milliaribus geometricis. *Sclauinum* autem *Rumunense*, hodiernum esse *Romunazzi* in Walachia ad *Alutam* fl. ac *lacum Mustanum*, seu rectius *Mysianum*, in *Myzia*, seu *Moesia*, prope a *Vidino* hodierno, *Alutae* ostio opposito, quaerendum affirmauit. Evidem Iordani opinionem nec probo, nec improbo; magis tamen inclinat animus, ut suspicer: Iornandem de suo, quo vixit, et scripsit tempore, loquutum. Nam *Venedos*, seu potius *Winidas* et *Venedos*, in quos post *Herulorum* caedem *Ermanricus* (vixit is circa illud ipsum tempus, quo *Hunni* Europae imminebant, et *Gothos* e *Dacia* expulerant) arma commouit, nondum ad *Alutam*, aut in *Moesia* hoc nomine notos fuisse, ex Iornande luculenter eruitur. Ad haec ante *Gothos* *Scytha*e et *Getae* eam fere regionem, quae hodie *Transiluaniae*, *Valachiae*, *Moldaviae*, et *Hungariae* *Tibiscanae* nomine venit, infederant. *Gothos*, qui hunc ipsum terrarum tractum occupauerant, subinde *Hunni* in *Thraciam* expulerant, exceptis iis, qui seruato stirpis veteris principe *Hunnis* dicto audientes erant, et ad *Pontum* colebant; *Hunnos* post *Attilae* mortem cedere *Gepedes* coegerunt; quorum postremorum indulgentia, opinor, factum est, ut, quod fortasse iis manum auxiliarem seu contra *Romanos*, seu contra *Hunnos*, aut *Lombardos* *Slavi* et *Antae* dedissent, eosdem prope *Istrum* considerare licuerit; quo transmissio, infestare seculo VI. *Romanas* ditiones coeperunt; ut ex Procopio constat.

Vtrum illi *Scytha*e saltem, qui ante *Gothos* veterem *Daciam* tenebant, *Slauici* corporis populus, aut gens ex *Slavis*, seu *Venedis* compacta gens fuerit, deinde inquiram. Ultra *Tibiscum*, occidentem versus, *Quadi*, *Carpi*,

Mar-

Marcomanni, et qui non longe ante illud tempus, quo Plinius, viuebant, Iazyges (quod nomen Straboni nondum notum fuisse videtur) vleriora occidentem versus infidebant. Nec scio satis, vtrum Iazygas Venedis, an Germanis aecensem. Plinius Sarmatas vocat, inter Danubium, Tibiscum, et Carpathum sitos. Sunt, qui Venedici corporis homines Iazygas fuisse putent, quod Venedis, seu Slavis Iazyk *linguam* significet. Ranzanus Germanos fuisse scripsit, fortasse, quod medii fere inter Germanos (Gothos, Basternas et Quados) habitarent. Ranzani opinionem quondam ipse probauit; nec nunc adhuc muto animum, cum non constet, fortuito, an ab Iazik *lingua*, populus iste suum mutuatus nomen fuerit: an non potius per contemptum, aut aliqua alia de caussa a Venedis, ad ortum Vistulae colentibus, sic appellati fuerint? Nam populo aliquando a vicinis nomen adhaesisse, certum est. Hungaros Graeci Turcos dixerunt, cum ipsi Magyares se dicentes. Sic Oirothae, Calmucki, sed per contemptum, appellantur. Nec obstat, quod Iazygas Plinius Sarmatis adnumerauit. Iam enim pridem quorundam facilitatem improbaueram, cum Sarmatarum, Slavorumque nomen pro eodem haberent. Nam, qui Scythes a Sarmatis distinguit Herodotus, eosdem Scythes ea parte collocauit, in qua Germanae linguae homines posuit. Placet recentis, sed erudit Viri iudicium: cum Sarmatarum, Scytharumque nomina, arbitrarie a scriptoribus veteribus usurpari dicit, eosque, quos suo nuncupare nescirent, modo Sarmatas, modo Scythes dixisse.

Quodsi igitur ex his testimoniis antiquas *Venedorum* gentis amplissimae sedes constituere adgredimur, nae oleum fere et operam, quod aiunt, perdituri sumus! Alia proinde ad id praesidia adhibenda erunt. • Et fortasse lucem

cem his tenebris afferet nomen *Sclavinorum*, seu *Slavino-*
rum, *Slauorumque*; Antarum item ac Bulgarorum; quippe
 quos populos ad idem cum Venedis corpus referendos,
 linguae communio persuadet. Opportune istud; nisi quod
 nomina illa ab scriptoribus seculo VI. antiquioribus pro-
 lata non fuerunt. Scriptores ipsos superius iam laudaui-
 mus. Quod hi dant, accipiendum: dum vetustioribus
 auaritiam frustra exprobamus. Ac tametsi forte de re-
 centioribus populorum istorum sedibus commemorare vi-
 deantur: fortasse tamen ex iisdem coniectura non pror-
 fusa incerta de antiquis facienda fuerit. Initium Iornan-
 des faciat.

Antes vero, inquit capite 5to de reb. get. supra
citato, qui sunt eorum (Vinidarum) fortissimi, qui ad
Ponticum mare curuantur, a Danastro extenduntur usque ad
Danubium — Ultra quos (Agazziros, quam gentem quo-
que fortissimam, probabiliter iam Hunnicam,²³⁾ frugum igna-
ram, pecoribus et venationibus vitam tolerare dixit) dislen-
duntur supra mare Ponticum Bulgarorum sedes, quos notif-
simos peccatorum nostrorum mala fecere. Hinc iam Hunni
 etc. Habemus Antas et Bulgaros: illos a fluvio Danastro,
 vnde nomen *Nieſter* et *Dnieſter* manavit; Tyram Ptole-
 maeus, Mela, Scymnus Chius, Strabo, aliquique; Herodotus *τύρην*, dixerat, ad Danubium usque: istos supra ma-
 re Ponticum, probabiliter ad Wolgam, porrectos. Ty-
 ritae ii Herodoti videntur esse siti ad Tyrae ostia, atque
 iidem, quos bello petitos, ac victos tandem grauiter affli-
 xit Winitharius Amalus, Ermanrici apud Ostrogothos
 successor; is, qui cum suis in eadem cum Hunnis patria
 (Dacie veteris parte) commoratus, ac Hunnis subditus,
 insignia

²³⁾ V. F. Georg. Fray de Hunnis.

insignia principatus sui retinuit. Sic enim Iornandes c. 48. Winitharius cui Ataulfi virtutem imitatus, quamvis Ermanrici felicitate inferior, tamen moleste ferens, Hunnorum imperio subiacere, paullulum se subtrahebat ab illis, suamque dum nititur ostentare virtutem, in Antarum fines mouit procinctum, eosque dum aggreditur, prima congresione superatur: deinde fortiter egit, Regemque eorum Box nomine (significatu Regis late sumpto) cum filiis suis, et 70 Primatibus in exemplo terroris cruci affixit, ut dedititiis metum cadauera pendentium geminarent. Bulgaros deinde, quos ad Wolgam habitare suspicabar, opinor a Wolga sic dictos. Scio, hanc conjecturam eruditos quosdam advertere, quod omnis ratio nominis similitudine innitatur, argumento, quod copiosos alioqui errores in historia peperit. Mihi perinde est, vel si quis a Volgero *Bolgarum* Duce, de quo Paulus Aquileiensis, dictos Volgares, ac deinceps Bulgaros, existimet; de quo Rege, seu Praefecto quodam, aut Duce laudatus scriptor l. 16. ad annum Imp. Iustiniani 12 agit; nam, quod certum hic sit, frustra quidem inquisuerimus. Quin autem id sentire non liceat, quod improbabile plurimis Viris doctis visum non sit,²⁴⁾ et quod optime cum Iornande, Bulgaros supra mare Ponticum, sed magis ad septemtrionem, vt deinceps patet, extendi, docente consentiat? Evidem non putem me aberrare longius a vero, si dicam, Bulgaros Iornandis, vel eosdem, vel saltem iis vicinos fuisse, quos Procopius *Antas* nominavit. Nam cum hic l. 4. de bello Goth. c. 4. populos, qui supra Ponticum mare sunt, qua septemtrioni oppositum est, enumerasset, subiungit: *Ulteriora ad septemtrionem habent Antarum populi infiniti.* Haec vero intelligenda de regione cis Wol-

24) V. D. Freret *Institutio veteris historiae discendae obseruat.* 6. ex versione Lipsiensi P. IX. pag. 86.

Wolgam sine dubio sunt. Nam ultra Wolgam Slauici corporis populos olim haesisse, nemo, credo, est, qui se ostendere posse confidat, nisi forte aut monumenta populi aut linguae patriae usum produxerit, aut grauissimam caussam protulerit, cur gens tota terras illas relinquendas censuerit. Duo enim haec desiderari vulgo solent ad veteres populorum sedes designandas. At nihil istorum afferri potest. Nam qui hodie ad Orientem Wolgae conlunt, Permacae Ostiacae, Vagoulitzi ac Czeremissi, Fennici corporis populi, coloniae a Russis istuc missae sunt. Quanquam ne sic quidem antiquae Venedorum, aut ipsis affinium populorum sedes rite detectae fuerint. Obstant Scythae, e veteri ultra Wolgam patria ab Issedonibus pulsi, ab Herodoto inter Borysthenem, et Tanaim, a Borysthene ad Istrum usque collocati; ut videre est apud Cl. Bayerum, qui T. I. Comment. Petrop. Scythiae situm ex Herodoto ad oculum ostendit. Scythes autem a vicinis occidentem et septentrionem versus populis manifeste discernit Herodotus; ut adeo, qui Scythes sine discrimine Venedos, Slauos, aut Antas diceret, se merito praebitus esset deridendum. Alia proinde mihi via incunda est, ut sedes antiquae detegantur. Primum fecernendi sunt populi a Venedico corpore prorsus diuersi: cultores regionis veteres a nouis distinguendi: qui populi etsi alio atque alio nomine ab scriptoribus diuersis proditi, probabiliter, atque ex prudenti conjectura Venedis, seu Slavis et Antis accenseri possunt? Nam et historia, vbi scriptores tacent, conjecturas etsi non amet forte, patitur tamen, ac sustinet. Primum Venedis sinus totus Venedicus, seu littus maris Balthici, quod inter Vistulam et Fennos interest, omnino tribuendus est. Addenda omnis ea regio, quae a sinu ad Carpathum,

a Vistula ad Borysthenem porrigitur. Nam Aestii, Bastarnae etc. pro aduenis agnoscendi sunt. Cumque hi ad Gothorum genus referendi esse videantur: credibile est, siquidem ex Pythea recte arguit Hugo Grotius,²⁵⁾ eos, annis circiter 300 ante Christum natum, isthuc aduenisse. Adhaec arbitror, Venedos his aduenis locum ita fecisse, ut vel ipsis vicini, vel immixti essent, et quidem ita, ut Aestii (quemadmodum rectius Cl. Cellarius contra Clue-
rium censet T. II. Geogr. antiq. L. 2. c. 5. p. 488.) in Borussiae et Poloniae hodiernae parte, quae trans Vistu-
lam est, usque ad Fennos: Venedi vero a littore depulsi
in reliqua Polonia, Liuonia item, ac Lithuania longe late-
que extensi habitarint. Nam Venedos ante Aestios ad
sinum coluisse, ipsum nomen sinus Venedici indicat, ut
iam superius ostensum est: sed neque iis regionibus pror-
fus depulsi fuisse, ex Iornandis loco citato luculenter
constat, ubi ait: *iuxta sinistrum latus Dacicarum Alpium,*
quod in Aquilonem vergit, et ab ortu Vistulae per immensa
*spacia venit, Winidarum nationem populosam confedis-
se.* Nullam Iornandes Bastarnarum, seu Peucinorum,
quemadmodum neque Phrungundionum, Burgionum, de
quibus ante illum Ptolemaeus etc. mentionem facit; quod
indicio esse puto, populos hos, quos Germanici, seu
Gothici corporis fuisse ex Strabone colligimus, secutos
pridem fuisse partim Vandals, partim Gothos: Gepe-
das fortasse etiam ac Longobardos, praeter eos, qui seu
cum Venedis, seu cum vicinis populis in unam eandem-
que gentem diuturnitate temporis coaluere. Quanquam
nescio, utrum Ptolemaeus tot alios populos iuxta Vene-
dos recte collocauerit. Saltim de *Auarinis*, forte *Vari-
nis*, dubito. Parui tamen refert, satisque nobis est, tuto
nobis

25) Praef. in hist. Goth.

nobis Venedorum patriam, et quae certa sit, et antiqua, licuisse designare. Sic neque magnopere laborabo, omnesne, aut saltem plerique populi, quos itidem in Sarmatia Ptolemaeus posuit, Slauici generis fuerint, an mixti potius: vtrum a Venedis prorsus diuersi? cum certi nihil neque affirmari neque negari hic possit, scriptoribus vetustis de hoc perpetuo tacentibus, aut etiam tenebras in ipsis tenebris posteritati nostrae offudentibus. Sub *Venedis*, inquit Ptolemaeus, *Gythones* et *Phenni* etc. De Gythonibus dictum est. Phennos, vti et Aestios (Aestiuones) Lappones, Syranos, Permios, Morduanos, Tscheremislos, Votos, Vogulos, et qui ripas inferioris Irtychii et Obii accolunt Koudinos, seu Ostakos, lingua a Venedis distinguunt, qui interiorem populorum istorum, vt hodie sunt, notitiam habent, Scythicam eis tribuentes; nisi tamen, quod prorsus verisimile puto, prius istic Venedi confederint, ad quos postea se Scytha adiunxerint, sed, quod numero ac potentia Venedis praestarent, Scythicam linguam pariter induixerint.²⁶⁾ Immo eosdem populos aliqua affinitate iungi cum Hungaris, ex linguarum, quibus vtuntur, cognatione affirmant.²⁷⁾ De Hungarica non dubitem; sed tamen ita: vt linguam eam existimem in Fennos ab aduenis, qui in vnam gentem cum illis coiuere, illatam potius, quam Fennorum fuisse natuam. At Estonicae, qui contulere, nihil esse dissimilius, quam Fennicam, luculenter ostendunt. Lithuanicam tamen, quae eadem hodie est cum vetere Prussica et Curlandica, probabiliter olim Venedicam, sed ex

C 3

aliis

26) V. Eberard. Fischerus de terem hist. disc. ex vers. Lips. Orig. Vngror. p. m. 18. Gottsched. AA. Paris. Acad. P. IX.

p. 101. Eber. Fischer cit. l. pag.

27) V. Frereti Instruc^{tio} ad ve. 26, 27.

aliis sensim corruptam, inde suspicor, quod linguae Venedicae non pauca prodat indicia, immo Lithuaniae incolas ab Iornande pro Winidis habitos, ex verbis eius alias adductis puto recte colligi. Neque liquet satis, quo nomine veteres Lithuaniae, Curlandiaeque populos, (nam haec recentiora nomina sunt,) Ptolemaeus designauerit. Idem est de Fennis et Liuonibus. Tamen in Fenniae et Liuoniae populos veteres, et antequam cum aliis in nouam gentem coirent, e Venedorum corpore fuisse, locorum, quae supersunt in iis, nomina videntur posse docere. Sic ad fluuium *Trender* ciuitas *Vendum*, *Wenden*; fluuius item, et ad eundem situm oppidum *Windauia*, et *Vschevendum* in Liuonia, (nisi tamen recentiores natales habeant,) memorantur. Sic tametsi neque Pruzzos (nam Prussorum nomen posterius est, ac multo magis *Borussorum*) ne quidem nominarit Ptolemaeus; certum tamen habemus, in Prussia, seu Prucia Venedos fuisse, a quibus necesse est, finum illum Venedicum nuncupatum esse. Bulanes vero, Piengitas item, et Biessos penes Carpatum montem, et orientaliores his Galindas, Sudenos, et Stauanos usque ad Alaunos sic Ptolemaeus nominavit, ut dubitari possit, rectene Venedico corpori accensendi videantur? At in hoc ego obstinatus sum, ut censeam, amplissimam Venedorum gentem etiam sub aliis nominibus latitasse. Exempla istius generis frequenter occurunt. Herodotus Sarmatas a Budinis et Neuris distinguit, tametsi in Sarmatia locatis; Getoni, vti et dicti Budini, cum Neuris olim Scythico nomine, et corpore continebantur, tametsi origine Scytha non essent. Erat igitur nomen Venedorum generale: alia eiusdem gentis nomina singularia. At illa, num ipsa istiusmodi fuerint, quae paullo ante ex Ptolemaeo attulimus, quis certo affirmet?

firmet. Hoc equidem largiendum nobis est, populos hos, quos vicinos Venedis Ptolemaeus posuit, neque alteri facile genti attribuendos; Venedis potius, quam alteri alicui corpori accensendos esse. Poterant igitur Bulanes, sic *fortasse* a Graecis potissimum corrupte appellati, esse Poloni; alioqui et *Bolani*, et *Boleni* vocari soliti. Idem fere est de Ombronibus, Anatrophractis, Arsyetis, et Sobocis, quos Phinnis subiungit Ptolemaeus; nisi quod ne quidem ex nominum similitudine, quae omnino abest, coniecturam aliquam facere liceat. Pienigitas tamen, et Biessos praesertim, ne prorsus a Venedis excludam, me mouet, quod ad Carpatum sitos fuisset Ptolemaeus dicat; nisi quis iudicet, a Iornandis Vinidariis, mixto ex diuersis populo, non fuisset diuersos. Sed nec Galindas, Sudinosque ac Stauanos a Venedis antiquis exemerim; tametsi priores hodie lingua a Polonica ac Russica diuersa vtantur. Non enim dubium est, ex populorum commixtionibus, diuersas linguas etiam fuissent natae. Galindarum ac Sudinorum Annales veteres Prussiae meminere; quo si mappae geographicae Hennebergi accommodentur, videbimus Galindas sedisse, vbi nunc Praefecturae, *Neydenburgum*, et *Ortelsburgum*; Sudinos vero, vbi Iohannisburgum, Reina, Lycka, Margrabowa, seu Olezko visuntur. Ac nescio: an non Stauani, *sabavo*: Ptolemaei, sint, quos hodie Schlauones ac Slauanos (die Schalauer) appellant, siti pone Praefecturam Olezkensem, vbi nunc Praefecturae Tilsit et Ragnit.²⁸⁾ At si hoc euinceretur, etiam *Slauinorum*, quod prorsus cum *Schlauanis* congruit, nomen vetustius esse oportuerit, quam vulgo censeatur. Malim in medio relinquere, mittoque coniecturas alias.

Dicebam,

²⁸⁾ V. Hartknochii *Prussia vetus* P. I. c. I. p. 24. seq.

Dicebam, Venedos probabiliter ad Borysthenem vsque porrectos fuisse. Nam inter Borysthenem et Hypanim Olbidae, Graecorum colonia, sedebant, vbi nunc Dzike Pole, campi deserti, et Oczacouiensis agri aliqua pars est. Inde duae vrbes *Olbiopolis*, vt eam Plinius vocat, Olbiam dixerunt Strabo, Ptolemaeus, et Arrianus in Periplo, et *Miletopolis*, *κτίσμα Μιλησίων*, Milesiorum opus. Nihil tamen obstat dicere, etiam ista in regione olim sedisse Venedos, cum fieri potuerit, vt seu precario, seu spe inducti, seu etiam vi adacti Graecis locum facerent. At post, Scytha; de quibus deinceps plura dicenda. Inter Hypanin et Tyram Callipidae, et super eos, septentrionem versus, Alazones, quos, quia Herodotus a Scythis distinguit, coniectura est, ad Venedorum gentem pertinere. Id multo magis dicendum de Androphagis, et Melanchlaenis, quos ultra fontes Borysthenis et Tanaidos laudatus Herodotus ponit, et a Scythis seiungit. Suspicor, ex iis esse, quos Procopius Antas vocat, multitudine innumerabiles, vltiora ad septentrionem habentes. Has ipsas sedes adhuc seculo sexto Slauos tenuisse, argumento sunt tres illi Slavi, legationis nomine missi ad Chaganum, atque a Romanis capti, qui cum interrogarentur, qua gente oriundi, qua regione, quibus de causis Romana loca obirent, respondebant, se ad Oceanum Occidentalem, hoc est, vt ego arbitror, ad eam partem Baltici maris, qua Orienti oppositum est, habere sedes, quindecim mensium itinere istuc in Thraciam ac ultra profectos, citharas curare ac circumferre, seu, vt in Graeco apud Theophylactum l. 6. c. 2. est, lyris canere, (*αὐταῖς λύραις καταψάκεθαι*) cum tubis circumstrepere non didicerint: bellum ignorantibus optabiliorem autu-mabant esse exercitationem musicam; ex quo rectius quoque

quoque intelligendus erit locus, de iisdem Slavis tribus, ille Theophanis ad annum IX. Mauritii. Fortasse et in censum hic Bulgari venire possunt, quos septentrionem versus ultra Pontum (prope Wolgam nempe) locatos, Iornandes dixit. Accedit Theophanes, qui ex Nicephoro Patriarcha CP. commemorat, Bulgaros primo regiones illas Maeotidi paludi conterminas, iuxta Gophilum flumen, seu, ut videtur, Copam, Tanai proximum, incoluisse. Idem refert, adjacentem regionem, quae ad Ortum est, magnam Bulgariam vocatam, ideo, quia se circa Volgam porrigat. Confirmat opinionem non modo, quod posteriores scriptores eodem, ut videtur, loco, seu Antas, seu Bulgaros collocauerint, quo loco fere Herodotus fitos Melanchlaenos et Androphagos fuisse docet,²⁹⁾ sed etiam, quod mores iis Slavorum haud multum dissimiles attribuit. Ανδροφάγοι δὲ αὐγεωτατα, inquit in Melpomene c. 106; sed latine referam: *Androphagi agrestissimos omnium hominum mores habent; non iudiciis, non legibus utentes; sunt Nomades, seu pecuariam exercentes, vestem Scythicae similem gestantes, propriam linguam habentes.* Et c. 107. *Melanchlaeni, inquit, omnes indumenta nigra gerunt, unde et cognomen habent, qui soli ex his humana carne vescuntur, institutis, h. e. moribus, Scythicis utentes.* Si caetera certa essent; salua omnino res esset. Nam morum similitudo nondum eandem gentem arguit; tametsi ex dissimilitudine morum, prorsus oppositorum, bene diuersam gentem deducimus.³⁰⁾

Termi-

29) Herodotus sic de Melanchlaenis l. 4. c. 10. *A mari mediterraneo versus usque Melanchlaenos, qui supra Scythes habitant viginti dierum iter.*

30) Liceat hoc exemplo firmare. Sic recte Ser. Princeps Iablonouius contra R. P. Dobnerum ostendit, Bohemos, de quibus Cosmas loquitur initio Chronicorum sui, non fuisse

Terminant vero et Androphagi Scythiam, vtpote ante Melanchlaenos ab Herodoto collocati, sicut Androphagos antecedunt Neuri, Neuros Agathyrsi. Hos omnes Herodotus partim ad septentrionem, partim ad occidentem Scythis opponit; quemadmodum et Budinos, et Sarmatas, et Gelonos, quos postremos dicit quondam Graecos fuisse. Notentur Sarmatae, particularis populus, situs in ea regione, quam Ptolemaeus postea Sarmatiam vocavit; vt vel hinc videas, Sarmatarum nomen populis omnibus, quos scriptores posteriores Sarmatiae adscripserint, olim minime conuenisse. Quamuis autem horum populorum gentilitatem nemo veterum declarauerit, nisi quod diuersos ab Scythis dixerunt, neque Germanis adnumerari possint: conjectura tamen inde non vana capit, eos Venedis potius, quam alii genti, adnumerandos esse; tametsi moribus aliquo modo inter se dispare fuisse videantur. Nam Agathyrsos excultissimos viros nominat Herodotus, et aurum plerumque gestantes; in quo discessisse a Venedorum moribus videri possent: tamen caetera in Venedos commode quadrant. Ait enim Herodotus, eos in commune cum mulieribus coire, et tanquam inter se germanos et domesticos, nihil neque liuoris neque odii mutuo exercentes, in caeteris ad Thracum consuetudinem accedere. Id quod nihil obstat, cum certum sit, gentem a gente, quicum commercium ac consuetudo multa est, nonnihil morum trahere solere; nec Scythis illico adnumerauero, quod Scythicis prorsus vfos moribus fuisse, apud Herodotum lego, et periculo ab ingenti

fuisse Germanos; quia **alius**, immo **oppositos** mores Germanis Tacitus, **alius** Bohemis Cosmas tribuat. Nec refert, siue Cosmas descriptionem

eam a Boëthio, siue ab Eginhardo, aut Adamo Bremensi mutuatus fuerit, eaque Bohemis applicauerit.

ingenti serpentum vi exterritos, sese Budinis iunxit. Budinos deinde idem Herodotus ingentem nationem et numerosam fuisse docet, sed caesiis oculis omnes, et rufos, eosque pro Gelonis, sed falso, haberi, quippe qui a Gelonis et lingua et victu sint dispares: Gelonos autem, quondam Graecos, Herodoti aetate lingua partim Scythica partim Graeca usos. Hos etsi constat ex Herodoto inter Scythes olim habitasse: malim tamen Venedis, quam Scythis restituere; tametsi linguam natuam, et mores multum interea mutauerint. Suspicor enim, initio non Scythes, sed aliud populum olim fuisse, atque inter Scythes habitasse. Sed et Sarmatis, seu, ut Graeci efferebant, Sauromatis, suam linguam fuisse a Scythica distinctam, idem docet Herodotus, quem scribit, Scythice loqui volentes, Soloecizasse. ³¹⁾

Existimo autem, hos populos Sarmaticos eosdem esse fere, quos postea Strabo ³²⁾ Roxolanos tanquam ad Rus, seu Ros, quo nomine etiam fluuium Rha, seu Wolgam dictum comperio, appellauit. Non enim mihi persuadeo, populos, quos Herodotus Scythis opponit, ita deinceps euauisse, vt, quia scriptores posteriores alia atque alia populorum in iis regionibus nomina producunt, certo confici possit, nouos populos, prioribus depulsis aut alio profectis, successisse. Facile mihi in hoc assentietur, qui Graecorum morem, ac libidinem in effingendis aliis populorum nominibus perspectam habet. De Roxolanis tamen (idem fere est de Antis et Bulgaris) quos Plinius, Ptolemaeus, vti et Iornandes Antas et Bulgaros, circa Maeotidem statuunt, in ea scilicet regione,

31) Herod. Melpom. l. 4. c. ἀπὸ τῆς Ἀρχαίας, ἐπὶ τὸν Χειμῶνα ἡξέμισ-
117. φανῇ δὲ, inquit, οἱ Σημάτους θεοὺς ἔντονες αὐτῷ
νομιζόντες Σκυθικῇ, σολοικίζοντες αὐτῷ 32) Strabo l. 14. c. 114.

quam teste Herodoto Scythæ incoluerant, aliter fortasse differendum fuerit. Id vt felicius praestem, veteris Scythiae situm, qualem Herodotus descripsit, breuiter iuuebit repraesentare.

Primum igitur constat, Scythes sub Darii expeditio-
nem inter Borysthenem ac Tanaim coluisse, sic, vt Ta-
nais ipse iis a meridie opponeretur; ad vltiorem
Tanais ripam Scythes exules a reliquo corpore, ac re-
belles, sed longius a ripa, immo vltra Wolgam reiectos
sedisse. A Borysthene ad Istrum vsque rursum Scythes.
Ab Istro ad Borysthenem 10 dierum itinere, seu spatio
60 milliarium: a Borysthene ad Maeotin totidem: a Pon-
to ad Melanchlaenos altero tanto: ab Oriente, siue Ta-
nai in Occidentem pariter 20 dierum, hoc est 120 mil-
liarium spatio, habitasse. Habitabant igitur intra 45 et 57
fere gradum longitudinis, at 45 et 55 gradum latitudinis,
inclusi hinc Tanai, Maeotide, Ponto, et Istro: illinc Me-
lanchlaenis, vbi nunc est ager Mosquensis, et viciniis ad
Orientem tractus, supra Gerrhum, Scytharum regiorum
regionem, vbi Scytharum regum sepulcra erant: Andro-
phagis item, sitis in agri Smolenscensis, Vitepcensisque
tractibus, vtrisque circa fontes Borysthenis et Tanais:
hinc Olbitis ad confluentes Borysthenis et Hypanis, vbi
nunc Dzike Pole, campi deserti et Ozacouensis agri ali-
qua pars est; a fontibus enim Bogi ad Kiouiam vsque in
Palatinatu Brailauensi inter Borysthenem et Hypanim
Scythæ aratores coluere. Illinc Alazonibus, quos He-
rodotus diserte a Scythis discernit, in Palatinatus Po-
doliae meridionali parte ad Caminiecum, et in Brailauensi
tractu, penes Callipidas, qui erant in Orientali Brailauensi
tractu, et in Ozacouensi agro ad Occidentem
Olbiae vrbis. Tum, Neuris, quos Scythes ipse Hero-
dotus

datus negat, ad Desnam fluuium, qui supra Kiouiam in Borysthenem influit, seu ad Orientem Borysthenis sedes habuerunt, supra Scythes agricolas, antequam nempe ob serpentum copiam ad Budinos, nec lingua, nec origine Scythes, a Scythis tamen, inter quos habitabant, expulsos, migrarent. Postea enim (Neuri) a fontibus Tiraee supra Scythes aratores vsque ad Borysthenem egerunt, in parte Palatinatus Russiae rubrae ad Leopolim, Belzensis, et Volhyniensis orientali, vicini Budinis ac Gelonis, olim Graecis, post lingua ex Graeca et Scythica permista vtentibus, ad occidentem Borysthenis colentibus. Tum Sarmatis, seu Sauromatis proprie dictis, hoc est, qui iam ante Herodotum id nomen obtinuerunt; postea enim, ac circa Ptolemaei aetatem praesertim, nomen Sarmatiae et Sarmatarum latius patebat.

Atque hos populos: Neuros, Budinos ac Sarmatas intelligo, quod neque Scythaे fuerint origine, ac fere etiam lingua a Scythis diuersi,³³⁾ commode, quia nihil contra occurrat, faciatque eius rei cum situs ipse, tum Venedicae gentis amplitudo, post ab Iornande et Procopio luculenter prodita, indicium; Venedis, aliis olim atque aliis sub nominibus latentibus, adnumerauero, vniuersimque hos populos vna cum Venedis lingua vix discreta inter Vistulam, sinum maris Balthici, Carpathum, Fenniam (nisi olim et istic Slauici corporis homines sederint; id quod ita esse valde suspicor) itemque inter Borysthenem non temere inclusero. Suspiciatur quidem Cl. Baye-

D 3

rus

33) Apponam voces aliquas ex Herodoto Scythis olim proprias, vt, Scythicane a Slauica diuersa fuerit, iudicium formari possit. *Aeor* enim Scythis *Vir*, *pata* occidere,

arima vnum, *spu* oculus, *Tapti*, quae Latinis *Vesta*, significabat. Praetereo mores Scytharum a Slavis diuersos, qui conferri ex Cl. Bayeri Memoriis Scythicis possunt.

rus,³⁴⁾ quem in terminis Scythurum designandis post Herodotum potius, quam Rudbequium, sequi maluimus; Budinos et Neuros, cum semigraecis Gelonibus eo tandem migrasse, vbi Fenni, Aestiique sedent; immo eosdem esse, qui apud Snorronem *Vani* et *Voeni* vocantur, olimque Othinum sequutos, esse. Ego etsi dubitare non velim, Scythurum populos aliquos olim Aestii, et quos Fennos dixerunt, accessisse; vtrum tamen fundamenta id suspicandi solida D. Bayerus habeat, alii viderint. Fortasse eodem iure dicendum fuerit, eosdem populos ad Venedos sic accessisse, ut, cum linguam ipsorum sibi sensim asciscerent, in idem cum illis corpus coaluerint. Certe enim cultura frumenti, et ceparum, allii, lentium et milii, quibus pascebantur, et quae Scythis cum Callipidis et Alazonibus erat communis, etiam hodie a Slavicis quibusdam populis frequentatur. Melanchlaenos tamen et Androphagos, Alazones item et Sarmatas, qui praeter Budinos inter Tanaim, Wolgam, et Caucasum, ut ex eodem laudato Herodoto, immo et Strabone liquet, olim coluerant, a Slavinicae linguae corpore diuellendos non existimem.

Venio ad eum tractum, qui inter Tiram et Tiarantum fluuios est; iuxta cuius ostia, vbi nunc Bielogrodum et Budziacensis tribus, Tiritas: in mediterraneis vero, hoc est, vbi nunc Valachia, Moldauia, et Transylvania est, Scythes aratores, et ad horum occidentem Agathyrsas Herodotus collocauit. Scythas eos fuisse inde liquet, quod fluuios nominatos Scythiae annumerauit Herodotus. At enim, si Scytha in his fuere terris, quomodo Ptolemaeus *Roxolanos*, Bulgaros itidem ad Maeotidem:

34) Bayer. *Dissert. de conuersionibus rerum Seythianarum* p. 348. seq.

tidem: Antas vero ad Pontum a Tyra vsque ad Istrum Iornandes posuit? Haec examinanda sunt: vtrum his populis veteres istic fedes recte vel concedi, vel negari possint. Quanquam Roxolanos post Strabonis aetatem primo ad Maeotidem accessisse, cum scilicet Scytha in arctum cogerentur, inde eruitur, quod Roxolanos Strabo eodem fere loco, quo Herodotus Melanchlaenos et Androphagos, sub aliis nempe nominibus,³⁵⁾ forte, quod ad Wolgam vsque, olim Rhas, Ros, et Rus, verosimiliter a Slavis dictum³⁶⁾ porrigerentur, adhuc statuerat. Idem prorsus est de Bulgaris Iornandis; vt adeo hinc dubio proposito satisfiat. De Antis demtis iis, qui maxima multitudo ad septentriones teste Procopio habitabant, generre nec a Melanchlaenis, nec a Roxolanis diuersi, fere haereo, federintne iam olim ad Pontum sub Scytharum nomine, aut Tyram inter et Istrum Scythis immisti: an serius quoque accesserint? Neque tamen dubito, quin inter Scythas aratores (idem est de Scythis agricolis, et Nomadibus, seu pecuariam excentibus) Slauici generis homines confederint. Timonax³⁷⁾ 50 diuersas Scytharum gentes fuisse scribit; quam primum est cogitare, inter tot diuersas gentes etiam Slauici corporis gentem computatam fuisse; postquam certum est, Graecos saepe eam gentem, quam certo nominare ignorarunt, Scythicam appellasse. Strabo (l. 7. p. 215.) ait: Scythas quidem pecudibus studuisse, lacteque vicitasse, agros vero elocasse colendos aliis (non Scythis) a quibus tributum exigebant:

non

35) Sic enim Strabo l. 7. p. 212. Παξολανοί — ἀρχικῶτατοι μεταξὺ τῶν τανάδος καὶ τῶν Βρυσθένης νεμόμενοι πεδία, ὑπὲρ δὲ Παξολανῶν ἐτοιες ὁμώσιν ἦν ισμενος. Roxolani maxime ad Boream reieSSI intra Tanaim et Borysshem incolunt: an super Roxolanis alii colant, ignoramus.

36) V. Bayer. T. g. Comment. Petrop. de Orig. Russ. p. 415.

37) Timon. l. 1. de Scythis ap. Schol. Apollonii Rhodii l. 4. v. 321.

non soluentibus inferebant bellum. Nonne autem suspiciari licet, hos ipsos tributarios, Slauos etiam potius, quam Graecos fuisse? Offendi hoc quidam possunt, qui de Slavis nonnisi gloria duci cupiunt. At cogitandum est, Slauos late disperlos fuisse, atque adeo non omnes eadem conditione vixisse. Qui ante Strabonem vixit, Scymnus Chius, in periegesi sua, *Tomitas ab Scythis distinguit*, cum ita canit: ὑπὸ Σκυθῶν ἐν κύκλῳ διαμένεις, hoc est, *Tomitas a Scythis in circulo*, hoc est, circa Ponti partem *habitare*. Et de Dionysopoli sic idem:

'Ἐν μεθοῖσι δὲ τῆς Κροβύζων καὶ Σκυθῶν
Χώρας, μηγίδας "Εἰληνας ὀμητὰς ἔχει,

In confinibus autem Crobyzorum et Scytharum Terrae (Dionysopolis) Graecos habet barbaris permistos incolas.

Dionysopolis, ante Κρήναι (Cruni) dicta, Moesiae adscripta ciuitas erat: *Crobyzi* Plinio sunt ultra Axiacen flumen. Thracibus eos Athenaeus l. 12. c. 17. et Herodotus Melpom. seu l. 4. adscribunt: Mysiae inferiori Strabo et Ptolemaeus: circa Istrum meridiem versus locat Stephanus; nec scio, an iidem fuerint, quos postea Porphyrogeneta libr. de adm. Imp. c. 9. *Cribetaenos* vocat, Russorum tributarios, et ipsos de Slauinorum genere. Res definiri nequit: tamen relinquitur, inde Scythes Mithridatis aevo ultra Istrum coluisse. Fortasse ex his ipsis Scythis, hoc est, iis, qui a Tyra ad Miarantum et Istrum, per hodiernam Moldauiam, Valachiam, et Transyluaniae partem orientalem, porrigebantur. *Getae* dicti fuerunt, antequam nempe Goths Daciam, eiectis ab Traiano Dacis, occuparent. Nolim enim Hugoni Grotio subscribere, existimanti, Gothos 300 ante Christum natum annis etiam in ipsam Daciam penetrasse. Qui enim credibile hoc

hoc est, cum Gothorum nomen apud Strabonem, qui circa Christi tempora vixit, nusquam adhuc occurrat? Idem est de Dacis; nam Dacos Getarum sibolem Pompeius Trogus apud Iustinum l. 32. c. 3. utrosque, Getas nempe et Dacos, eadem lingua vsos, Strabo l. 7. p. 211. enuntiauit. Getas et Dacos ortos ex Scythis et populis Sarmaticis mixtim colentibus; partem autem posteriorum, Venedis affinium, et communione eiusdem linguae coniunctorum fuisse ipsos illos, quos Iornandes *Antas* aperte compellauit, colentes ad Pontum inter Tyram et Istrum. Ex quibus et illud datur, Slauici corporis homines Scythis immisso non modo in ea regione, quam Daciam aliquando dixerunt, sed etiam ultra Istrum in Mysia et Thracia. Nam Getas etiam ultra Istrum habitaſſe Strabo l. 7. p. 211. docet, sic inquiens: „Apud „Graecos notiores sunt Getae, ob crebras in vtramque „Istri ripam migrationes, et quod Thracibus sunt My- „fisque permisti; quod ipsum Triballis etiam, Thraciae „genti, vſu venit; ostensum enim est, migrationes populis „contingere, vbi finitimi in imbecilliores impetum fa- „ciant, sicut, qui trans Istrum Scythae, Bastarnae, et „Sauromatae saepe praeualuerunt, pulsique aliis in eorum „loca immigrarunt, quidamque eorum vel in insulis, vel „in Thracia substiterunt: at qui ab altera sunt parte, ab „Illyriis maxime opprimebantur.“ Non dico, Getas seu Dacos simpliciter dici Slauos potuisse; alioqui enim et Slauos eosdem cum Thracibus dicere licuerit; quippe quibus perinde erant, teste Strabone, permisti Getae, seu Daci. Hoc tamen tuto me affirmare posse arbitror, Slauos sub Getis latuisse, tametsi Slauorum nomen minime praeualuerit. Etenim ut Plinius Scythes inter Tyram et Tiarantum ab aliis Getas, a Romanis Dacos fuisse di-

E ctos:

etos: ita eosdem ab aliis Sarmatas, ex iisque Hamaxo-
bios aut Aorsos, item Scythas degeneres, et a seruis ortos,
aut Troglodytas: mox etiam Alanos et Roxolanos no-
minatos fuisse, idem Plinius l. 4. c. 12. n. 25. tradit. Nec
nos moratur Strabo, cum l. 7. p. 210. de sua aetate scri-
bit, Getas, quorum ad 50 millia ($\piέντε μυριάδες$) ex trans
Istrum sitis partibus in Thraciam traduxerit Aelius Catus,
eodem cum Thracibus sermone fuisse vfos; id enim in-
telligendum vel de parte Thracum, vel de iis, qui ex
Getis cognominati Thraces, et Thracibus Mysisque
perinisti erant. Nam, vt Thracas simpliciter Slauonici
corporis homines nemo dixit; ita nec credibile est,
Thracas simpliciter Slauonicō sermone vfos fuisse: verum
linguam eorum ita permistam, vt, ad quam eos gentem
referas, statuere non possis. De Getis, seu Dacis, in Da-
cia veteri confidentibus, habemus manifesta exempla in
vrbium nominibus. *Arcidaua*, *Peleudona*, *Acidaua*, *Ru-
fidaua*, *Sarmategte*, *Zurobara* magnam affinitatem sane
cum Slauonicō habent. Pauciora fortasse in Thracia.
Nam *Bria*, quae vox, teste Strabone l. 7. p. 221. Thra-
cica sit, et *vrbem*, seu $\piόλιν$, significet, vtrum ab Illyrico
Biregh, voce editiore locum significanter, sit, vt vult Se-
bastianus Dolci p. 15. nondum certum est. Ac si etiam
Thraces *Mesembriam* et *Selymbriam* sua lingua *Mesembriegh*
et *Selymbriegh* dixerint: nondum conficitur, Thracas
vocem eam ab Illyriis sumisse, cum ipsi Slaui, postea-
quam in Illyricum venissent, eam vocem a veteribus in-
colis adsciscere potuerint: fere quemadmodum vocem
Vspeto, qua voce Slaui Illyres rem superbam et magnam
denotant, a Graecis Illyribus adscierunt. *Aspetum*
 $\alpha\sigmaπετον$ autem dicebant Graeci *inimitabilem*, quemadmo-
dum ex Plutarcho in Pyrrho patet; vbi sic legitur: *Ex-
hinc*

binc Achilli honores in Epiro diuini sunt habiti, quem ipsi sua lingua Aspetum, hoc est, ingentem cognominant. Aspetos autem vox Graeca est, ἄσπετος, immensus, quem assequi nequeas. Rectius Thracibus, sed ex Getis Slauisque permisisti, vocem Bilazora tribueris, quam quidem vix a Slauonico possis eximere. Locus erat in Paeonia vetere, antequam Macedoniae adiungeretur. Neque huius vocis origo ad seculum Christi quintum aut sextum, ut pleraque castrorum nomina Illyrici apud Procopium Caesariensem libro de aedificiis, referri potest, quippe iam seculo II. ante Christum natum notae. Sic enim Liuius l. 44. c. 26. de Perseo: *Eo mittit* (Perseus) qui anno ante Christum natum 178. Philippo in regno Macedoniae successerat, *Antigonum ex purpuratis vnum, qui iuberet, multitudinem Gallorum ad Bilazora* (Paeoniae is locus est, et quem *candidam auroram interpreteris castra mouere*. Paeoniam autem accessisse Macedoniae, Iustinus testatur his verbis: *In regione, inquit, Paeoniae, quae nunc portio est Macedoniae* etc. Facile autem fieri poterat, ut seu Scythae Slavicis populis, seu Thrases vtrisque permisisti, vicinis aliquando regionibus direptis, locum illum aedificarent, imposito de eorum, qui tum inter ipsos praeualebant, lingua, nomine; nisi forte malis dicere, Slavici corporis homines istuc penetrasse, et aliquanto etiam tempore olim sedisse, de quo tamen postea. Quid si locus, *Bilazora* dictus, nomen hoc obtinuisse, eo modo, quo e. c. oppida quae-dam in Polonia, aut Bohemia Germanicum nomen obtinuerunt? Germanos nempe ortu et in Polonia et in Bohemia non paucos numeraueris Viros nobilitate conspicuos, qui, cum olim in ius et obsequium Ducum ac Principum Bohemiae Poloniaeque venissent; praediis insuper et ditionibus fuissent aucti; iisdem suis praediis, aut aliis

E 2

a fun-

a fundamento erectis, de lingua sua nomen imposuerunt. Sed et voces quaedam aliae Slavicis vix eximendae. *Taurisii*, quod oppidum erat Dardaniae, teste Procopio Cae-sariensi, vicinum Bederiana castello, ad confinia Illyrici et Thraciae situm, ac Iustiniani Imp. patria, deprehenduntur. Testatur enim Theophilus Iustiniani biographus, et Synchronus, ex quo Alemannus notas subinde in historiam arcana Procopii scripsit, Iustinianum Imp. a popularibus suis *Vprauda*, quod *vera iustitia* interpreteris, et vtique Slavica vox est, nuncupatum: sorori autem Iustiniani, vti et matri eius, sorori Iustiniani auunculi, nomen fuisse *Bigleniza*. ³⁸⁾ Quas voces quis est, quaeso, qui non Slavonicas agnoscat? *Prauda* enim etiam hodie Slavis est veritas, vel etiam *ius*: apud ipsos Russos hodie *vprau*, *reče* vel *vere* audit. ³⁹⁾ Sic et Bigliniza fono ipso Slavonicam originem prodit. Adde, quod Iustinianus, teste laudato Procopio, se in priuatis colloquiis *sermone*, *habitu*, *ingenio* ad *barbarorum* consuetudinem comparavit. Adiungi his possunt castra Illyrici, barbarum sonantia, et non nisi Slavis adscribenda; qualia sunt: *Bidzø*, *Brege-daba*, *Sobastas*, vel *Suabastas*, *Sarmates*, *Pretzuries*, et plura alia, quae apud Procopium libris de bello Gothicō, *aedificiis*, et in arcana historia sponte se offerunt. ⁴⁰⁾

Scio esse, qui ex his vocibus, plane etiam Slavos, ante tempora Iustiniani, sub quo priuum alioqui legimus, Slavos et Antas, transmisso Istro, in Thraciam, Macedonia, et Illyricum irrupisse, pridem in his regionibus habitasse, atque has ipsas regiones inter antiquas Slavorum sedes esse numerandas censeant. De Thracibus, Moesis

ac

38) V. Alemannus in c. 12. hist. 144.

arc. edit. Parif. p. 137. seqq.

40) Plura vide apud *Cels. Iablos.*

39) Idem ad cap. hist. arc. p. *nouium* in Lecho.

ac Getis, quibus Slauos immixtos fuisse prorsus probabile sit, iam superius adnotavi. De caeteris nunc dispiciendum. Obseruo autem *Tauresium*, seu Taurisium ad fines Illyrici, et Thraciae⁴¹⁾ a Procopio collocari, Dardaniam autem ipsam, in qua Tauresium fuerit, ab Strabone, Illyrico; a Plinio vero l. 3. c. 26. Maesiae adscribi. Suspicio erat, Tauresii originem vel ad Teuriscos, veteris Daciae populum, de quo Ptolemaeus, ultra Istrum ad limites Thraciae et Illyrici profectum, vel ad Tauriscos, Istri accolas, quibus Strabo l. 7. p. 102 Teuristas adiungit, referendam. Sed id falso fortasse: quod Strabo utramque gentem Gallis, quamvis nihilominus ipsos hos Thracibus et Illyriis permistos, accenseat. Nisi forte dicas, et Tauriscos ad Teuriscos seu Teuristas ex Getis etiam coaliuisse, praeualente Gallicae gentis nomine. Utut sit: Tauresii incolas affinitatem aliquam cum Slavis habuisse necesse est, quod Iustinianus voce nec Latina, nec Cetogallica, nec Graeca, sed Slavicae perquam affine *Vprauda* dicebatur; nisi forte dicas, vocem Vprauda propter initialem literam V adiectam Tauresii incolas ceu peregrinam sibi asciuisse, atque adeo vocem eam in lingua ex pluribus coagulata perstituisse integrum. Non est hoc nōnum atque inusitatum. Nam et Graeci sibi voces a Latinis, Goths a Slavis adsciscabant, aut certe eorum consuetudine suas efferebant, quin Graecos et Latinos, item Gothos et Slauos eandem gentem quis audeat dicere. Exempla habemus in Dulcissimo Δελητσίμῳ, Vigilantiae fororis Iustiniani marito: Ἰλάγειος, quam vocem in titulo Procopii Suidas legit. Παρθενοδέρειος dixit quoque Pro-

E 3

copius

41) Hinc est, cur aliqui Iustinum Imperatorem Iustiniani auunculum modo Thracem, modo Illy-

rium dixerint. V. Alemannus in notis ad hist. arc. c. 6. p. 98.

copius in hist. arc. c. 14. Sic Gothis vox *Straua*, conuiuum, vt est apud Iornandem, significabat; tametsi vox ea Slavis fuerit propria. Sic Gothorum Regum nomina, eadem syllaba, qua Slavorum, terminata comperimus. Valamir, Theodemir, Wildemir etc. Reges Gothis erant: vt Tempimir, Iaromir, Slavis Duces. Adde nomen *Amalasuntha*, quod legi quidam volunt *Amalafuenta*; item *Mathasunta*. Quanquam horum nominum originem a Teutonicis deduci, contendat Vorburgius T. I. p. 448. nempe a Teutonico, *Schwand*, vel *Schwind*, quod *matronam* significabat. Fallitur autem Sebastianus Dolci, cum ex his nominibus confici putat, Gothos Slauonici corporis homines fuisse. Et quid hic scriptor dicet, si nomina Regum itidem Gothicorum, *Ermanrich*, *Geberrich*, *Helderich* etc. ipsi opposuerimus, nomina, quae sane aperte Teutonica sunt? Nimis certe ille praecipitanter, cum ex vocibus aliquot de vniuersa gente iudicium fert; porro vtrum ex Bigleniza, voce origine barbara, vt Alemannus existimat, Iustiniani seu Mater, seu Soror, latine dicta sit *vigilantia*, ac non potius de graeco sumta, adhuc dubium est. Nam reuera, vt est apud Mauritium in Strategicis, adnotante ipso Alemanno, Graecis βρυγίας est *vigilia*, et βρυγίσει *vigilare*; vt adeo ex hac saltem voce certa non possit coniectura formari. De *Istoko*, quo nomine nuncupatum *Sabatium* Iustiniani Imp. Patrem, ex Theophilo Alemannus docet, indicium in eo Slauonicae linguae latere negare nolim.

Vt autem largiamur, istiusmodi voces originem suam Slauonicae genti debere: non tamen inde tuto conficiemus, linguam Slavicam in his regionibus olim ita praeualuisse, vt gentes has omnes origine fuisse Slauos, atque in his ipsis regionibus, sed etiam veteres iam sedes habuisse

habuisse credamus. Nam, quae olim lingua, antequam populi tam diuersi, puta, Scytha, Getae, seu Daci, Graeci; item Galloceltae, Slavi etiam ac Latini inter se commiscerentur, in his regionibus dominata fuerit, nemo scriptorum veterum vel indicio prodidit. Neque ex una voce, *Bilazora*, quae, indice *Liuio*, in veteri Paeonia certo reperitur, et linguae populoque Slavicis eripi non potest, nemo sane prudens ad omnes reliquos circumpositos populos argumentari cupiat. Habent voces suas Persae: habent Graeci, Germani; habuerint quoque Scytha voces quasdam Slavis communes; neque inde deducas, aut hos aut illos vnius corporis populos fuisse. Adhaec etsi aliqua locorum nomina seu in Moesia, seu in Thracia, Macedonia item ac Epiro, Illyrico quoque et Pannonia reperiuntur, aut Slavicis affinia, aut quae non nisi artificiosissime, id quod Sebastianus Dolci et Grubifichius solerter et ad fastidium usque praestiterunt, detorqueri possunt; plura tamen, et fortasse vetustiora reperiuntur, quae ea cum Slavicis affinitate prorsus careant.⁴²⁾ D. Freret. dissert. de origine et rebus gestis primorum incolarum Graeciae, art. 7. existimat, Getarum ac Thracum linguam, matrem fuisse Graecae, ac Slavonicae. Id si verum esset; nam D. Pelloutier veteres Thracas Teutonicos homines fuisse ostendit; id, inquam, si verum esset; facile inde ratio dari posset, cur in vetere Thracia, Paeonia, Illyrico nomina locorum Slavicis simillima apprehendantur. Dubium igitur manet, vtrum Slavici corporis homines, saltem antiquitus, in ipsis regionibus, hoc est, Thracia, Paeonia, Moesia, sedes habuerint.

Nam de Illyrico, quo probabilius (ex Strabone de Dardania) reponendum est Tauresium, Iustiniani patria,
minor

42) Confer cum his Strabonem, Plinium, Ptolemaeum etc.

minor est difficultas. Sum enim in ea opinione, vt censem, castella aliaque loca, quae Procopius Caesariensis Illyrico (idem fere est de plerisque aliarum regiorum) adnumerat, non ita esse antiqua, vt ex illis antiquissimae Slauorum, seu Winidorum, et Antarum sedes defigi recte possint; immo seculo III. IVtoque vix esse antiquiora, rationem habeo: quia haec nomina castellorum aliorumque locorum, quae a Procopio siue in libris de bello Gothicō, siue libro de aedificiis commemorantur, frustra apud Plinium, Ptolemaeum, Strabonem ac Pomponium Melam quaeruntur. Accedit, quod, a quibus loca tot, etiam in Illyrico, vel aperte Slavicis vel certe Slavicis affinibus nominibus insigniri facile poterant, nominari, ac fere designari populi possint.⁴³⁾ Sic ex Aurelio Victore aliisque nouimus, Scythes (a quibus Slauos nemo penitus exemerit) imperante Gallo circa annum Christi 253, Macedoniam, Thessaliam, Graeciamque diripiisse; anno 267 Gothos, quibus immistos fuisse Slauos vel inde liquet, quod hac et non alia de causa Gothos eosdem esse cum Slavis permulti scriptores existimauerint. Goths, inquam, aliique Germanici corporis populi oras Italiae et Illyrici vastauere. V. Zosim. I. 1. Scythaeque, qui Istrum traiecerunt, ab eodem Athenaeo repulsi sunt. V. Trebell. in 30 tyrannis. Anno 269 Goths ad Marianopolim, Thessalonicae, Byzantiumque profligati, vt ex eodem Trebellio discimus. A. 272 Aurelianus contra Zenobiam proficiscens in itinere magnis praeliis barbaros in Illyrico, Thracia, Bithynia vicit, recuperatis, quas barbari infederant, Byzantio, Thyana et Antiochia. V. Vopiscus,

⁴³⁾ Sic Strabo tradit, suo tempore 50000 Getarum ab Aelio Cato ex transilviana regione in Thraciā traducta esse, eosque Mysos, seu Moesos esse.

Vopiscus, et Aur. Victor. Probus a. 279 Illyricum a Getis nunc subactis interceptum recuperauit. V. Vopiscus. Altero vero post anno idem Probus 10000 Baftarnarum in solo Romano, in Thracia praesertim, ad tuendos, contra barbaros, fines, collocauit. Anno 295 ingentes captiuorum copiae ex Carpis, Baftarnis et Sarmatis in finibus ab Imperatoribus collocatae sunt. Idatius. Anno prius 282 Carus, Sarmatis domitis, eorum 20000 cepit. V. Vopisc. Aur. Victor. A. 334 Sarmatarum serui contra Dominos rebelles pulsi ad 300 et amplius millia a Constantino acceptati, per Thraciam, Scythiam, Macedonia, et Italiam diuisi sunt. V. Hieron. et Idat. in Chron. Ammian. I. 17. et 19. Anonymus apud Petaium. A. 376 Goths ab Huns expulsi suscepitque a Romanis in Thracia collocabantur. Ammianus. Ipsam autem Thraciam anno 422 Hunni vastarunt. Iornandes de reb. Get. c. 50 ait, populis caeteris, qui Attilam in Italiam secuti essent, varias sedes nactis, Sarmatas, Cemandros et quosdam ex Huns in parte Illyrici ad Castrum Martenam collocatos fuisse. Adde Boerebisten natione Getam, de quo Strabo I. 7. Istro audacter traieco, Thraciam ad Macedonia vsque depopulantem, et *Celtas Thracibus et Illyriis permixtos euastantem.*

Quam commode in his vastationibus et Illyrici occupationibus castella condi, ac barbaris nominibus insigniri poterant? Non eo haec affuerio, tanquam praefracte negare velim, olim iam et antiquissimis temporibus aliquos Slauonici corporis homines in Illyrico consedisse; hoc tantum aio, difficulter probari id ipsum posse, cum nullum neque veterum testimonium, neque argumentum

F

aliud

aliud ad hoc asseuerandum suppetat. Multo autem magis errare mihi quidem videntur illi, qui populos propinquos, quos legimus in his regionibus aliquando sedem fixisse, puta, Thracas, Getas, Gothos, Vandalos, Marcomannos, Scythes, Illyrios, fuisse Slavones contendunt, aut Slauos Bohemiae, Moraviae, Misniae, Lusatiae ex Illyrico ducunt. Illos, qui primum tuentur, inter quos vel praecipui sunt Dolci, et Grubisich, satis, opinor, euertit, ipsa, qua nituntur, opinionis infirmitas, tum eruditorum de linguis Gothorum praesertim, Vandalarum et Marcomannorum iudicium; ut adeo nec operae pretium esse videatur, eam ex professo refellere. Qui alterum aiunt, etiam hodie permultos esse intelligo, quibus, quid responderi posse putem, iam nunc expediam.

Ac causam quidem, cur viri quidam dochii existimat, Slauos ad occidentem sitos ex Illyrico populariter venisse, linguam Slavis et Illyriis communem esse sine dubio oportebat. Haec enim ratio vel prima est de gentium communione arbitrandi. *Linguam* aio, non *vocem* *vnam* *alteramue*; multo etiam minus dubias quasdam voces, quae pluribus populis communes esse poterant. Si enim hoc spectes, quantis necesse fuerit erroribus te et historiam implicare? Iam vero eandem, quae Slavis erat, Illyriis quoque communem linguam fuisse, ut credam, nullo quidem pacto induci possum. Obstant Gallo-Celtae, iam ante Strabonis tempora per Illyricum diffusi: obstant Graeci, quibus sua pars relinquenda, ab his enim Illyris Graeca nomen accepit. Quid dicam de Sarmatis, Baeternis in Illyricum distributis, de Gothis et Hunnis, longo tempore Illyricum occupantibus? Quid
de

de Latinis et eorum coloniis, iam ab illo inde tempore, quo vel a Fulvio Flacco domiti sunt Illyrii, vel cum Marcus Figulus Dalmatas subegit, in Illyricum traductis, adeo, ut in ciuitatibus latina lingua potissimum dominaretur? Exemplo sit D. Hieronymus natione Dalmata, adeoque Illyrius (nam Dalmatiam partem fuisse Illyrici, et ex Ptolemaeo ac Plinio, et ex Sexto Rufo constat) quem profecto quis eruditorum hodie *Slauum* fuisse dicat?⁴⁴⁾ Non tamen nego, plebeiis ac paganis Illyrici hominibus suam, et quae latina non fuerit, linguam fuisse; sed qualem? non certe, vel Graecam, vel Slauonicam, vel Teutonicam, verum linguam ex pluribus linguis concretam, et *verum linguarum chaos*. Id ita esse, iam D. Freret obseruauit.⁴⁵⁾ Obseruauit id quoque D. Schloetzerus, cum docuit, veterem Illyriorum linguam in montibus Albaniae hodie superesse, et in libello quodam Romae impresso, in quo doctrina Christiana composita a Roberto Bellarmino in eam linguam traducta sit, discrimen inter utramque linguam affationem apparere.⁴⁶⁾ Quodsi igitur Illyriorum lingua ex variis linguis coaluerat, adeo, ut ad certam referri speciem non possit: si eadem illorum lingua fuit, quae est Epirotarum, et Albanensium: quomodo credibile est, Slauos ad occidentem, homines lingua ab Illyriis quam dissimillimos, ab illis ipsis profectos fuisse? aut unde factum, ut idioma Slavorum occidentalium ab idiomate popula-

F 2

rium,

44) V. Whiston in praef. ad Mosis Choronens. hist. Armen. p. 7. apud Schloetzerum Proba Russischer Annal. II. p. 64.

45) Frerets Anweisung die alte Geschichte zu erlernen obseru. IX.

46) V. Schloetzerus l. c. libel-

lus inscriptus est Italice sic: Doctrina Christiana composta dal Rob. Bellarmino, tradotta in lingua Albanese dal Reuer. Don Pietro Budi, Romae 1636. 12. Ibi lingua haec vocatur patria Scanderbegi, et idioma Epiroticum.

rium, a quibus discesserunt, toto coelo differret? Apparet igitur, opinionem illorum, qui Slauos occidentales Illyrios veteres credunt, oppido esse infirmam. Adde alterum iuxta incredibile. Quis enim credat, tantam Slauorum multitudinem, qualis deinde tam amplas in occidente terras implere potuerit, antea inter Latinos, Graecos, Gothos etiam colentem, ita autem latentem, ut ne quidem ab illis distingui potuerit, populariter nihilominus, quin suspicionem de hoc Graecis, Latinisque praeberet, excedere Illyrico potuisse? Sane scriptores, Iornandem et Procopium Caesariensem intelligo, qui vel primi seu de Winidis, seu de Slauinis et Antis commorarunt, gentem hanc omnem, et in regionibus trans Istrum sitis habitasse, et traecto Istro, seculo primum VI. in Moesiam, Thraciam, et Illyricum traieciisse docuerunt. Locum Iornandis iam superius dedimus. Libet nunc ex Procopio locos huc facientes subiungere. l. 3. de bello Goth. ex graeco latine c. 40. sic habet: *Sclauinorum cateruae, quantae nunquam ante prodierant, traecto Istro flumine, Naism venerunt.* Et infra: *Quo tempore, inquit, Iustinianus imperium obtinuit, Antae Sclauinorum accolae, transito Istro, in Romanorum fines cum magno exercitu irruerunt.*

L. 1. c. 27. Cum Belisarius contra Vitigem in Italia pugnaret, suppetias ab Iustiniano accepit; plerique, inquit Procopius, *Hunni erant, Sclauini, et Antae, qui NB. trans flumum Istrum, non procul a ripa habitant.* Stupendum igitur, cum Germanus quidam scriptor Sclauinos et Antas hos Chrobatos seu Illyrios esse censuit?

L. 3.

L. 3. c. 14. *Vlteriora ripae Istri partem maximam habent; de Slavis et Antis loquitur. Item eod. libro c. 29. Sclauinorum, inquit, copiae, traiecio Istro flumine, totum Illyricum, Epidamnum usque foede vastarunt. Omitto plura ex Procopio testimonia. Suidae tamen testimonium, quod deprauatum apud aliquos scriptores, Beatum Rheananum, Balbinum et Pessinam, et nouissime apud auctorem Apologiae aduersus Luciferum lego, adiungere placuit: Σκλαύθηος ἔθνος, inquit Suidas in Lexico, τὸ πέρι οὐδεν τὸ 1508, Gens Sclauina trans Istrum, scil. habitat. Hoc vnum Suidas de Sclauinis, caetera spuria sunt, a quo cunque fuerint adiecta. E quibus etiam hoc mirum videatur, necesse est, Slauos tanto numero Istrum transgressos in Illyricum penetrasse, nec a suis consanguineis, Illyricis, si quidem, vt quidam volunt, Slavi et ipsi fuerunt, neque ex cultu, neque ex ingenio, neque ex lingua agnitos fuisse. Omitto Procopii testimonium, docentis, Slauinos et Antas ab antiquo usos populari imperio fuisse; id quod nescio, quomodo conciliari possit cum Illyriis, quos sub Regibus, donec Illyricum in Prouinciam Romanam redacta esset, fuisse, ex historia Romana luculenter docere possumus. Adde mores, adde religionem Illyriorum, illos diuturna cum Latinis, Graecis consuetudine mitigatos, istam prorsus Christianam, et ita iam firmam, vt Iustinianus Imp. Illyriis in Bederiana, in qua educatus erat, et quam mirifice ab se amplificatam Iustinianam primam deinceps dici voluit, Archiepiscopum constitueret. V. Procop. l. 4. de aedificiis.*

At hoc non praecipue hic agitur; praecipuum illud: an Slauici corporis populi sedes antiquitus hic fixerint?

F 3

Ego,

Ego, vt, quod verissimum esse censeam, aperiam, aio, de veteribus, ac primis Illyrici habitatoribus, cuius generis fuerint, non liquere. Nemo enim de hoc veterum scriptorum nobis transcripsit: omnes, vt vidimus, sedes iis primas in regionibus vltra Istrum positis, seu ad septentrionem Istro obiectum designant. Mixtum tamen genus hominum, etiam, qui origine Slavi erant, Illyrios fuisse, non nego, certo affirmare non audeo; nam voces *Vpranda*, *Istoki*, paucissimae indicium certum de tota gente facere non possunt. Poterant, vt initio linguae diuersarum gentium, barbararum praesertim, pauperes erant, altera gens ab altera voces mutuari, et adsciscere. Ac si etiam Slauos immistos Illyriis vltro largiar, quae primario Illyriorum lingua fuerit, designari non posse puto. Sane Cluverius l. 1. Germaniae antiquae eo inclinavit, vt Illyricos, et Britannos, et Hispanos, Celtarum nomine comprehenso, et communis Celtica lingua vfos esse, dialectis tantummodo distincta, approbaret. Vtinam saltem hoc certum teneremus, quibus olim Slavi nominibus comprehensi fuerint! Σπόρος antiquitus et Slauos et Antas nominatos fuisse, Procopius Caesariensis solum docuit. Legi, qui existimarent, ideo σπόρος dictos, quod per diuersas regiones dispersi essent: id quod etsi nullo scriptoris veteris testimonio faciunt, non tamen faciunt improbabiliter. Commentator in Hagecianos Annales pag. 73. P. II. σπόρος a comitiis dictos credit, quod Σπόρ Slauonice *comitium* sit. Crederem id et ipse, si quidem ostendi posset, Slauos et Antas ipsos se σπόρος nominasse, et non ita a Graecis fuisse appellatos, aut etiam ex scriptore quodam vetere doceri posset, quae illa Comitia, ubi, et quando celebrata? Graeca vox est σπόρος, non Slauica, neque ex Slauico forma-

ta,

ta, adeoque nihil cum confictis Slauorum comitiis affine habet. Probabile tamen est, Slauos seu Scythis, seu Getis et Dacis, in ea in primis regione, quae olim Dacia vocabatur, permistos fuisse, et fortasse Slauos prius eas terras incoluisse, quam Scythae, ab Essedonibus pulsi, superato Wolga flumine, Tanai item ac Borysthene, a Tyra ad Istrum usque coepissent colere. Idem cum proportione, et quod ad veteres sedes attinet, dicendum de Scythis, quos regios vocant scriptores, sitos inter Tanaim et Borysthenem. Antas, quos ait Iornandes a Tyra ad Istrum circa Pontum coluisse, reliquias Slauorum Scythis immistorum fuisse puto; nisi sint ex iis, qui ad Wolgam habitabant olim, dicti etiam Bulgari, quasi Wolgari. Prior opinio etiam magis sustineri posset, si quidem verum esset, Decaenenum Strabonis esse ipsum illum Othi-
num, quem scriptores septentrionales, praeeunte Snorronne, aiunt, Boerebista Rege seu Duce occiso, populo autem Getico dissidiis distracto, migrationem in septentrionales plagas suscepisse. V. Bayerus Diff. de Conuer-
sionibus rerum Scythicarum, quae extat Tom. V. Com-
ment. Petropol.

Antas itaque dictos a Graecis reor, et quidem a voce Ἀνται, quae *contra* significat, tanquam contra seu Slauos, seu gentes alias habitauerint. Quo postremo sensu vere ἀπόροι olim dici poterant, quod dispersi non solum, habitaculis sparsim positis, sed etiam per regiones diuer-
sas habitarent. Huc adde regionem inter Vistulam, sinum Balthici maris, seu Venedicum, Carpathum, Fennos, et Borysthenem interiectam. Ac si quidem Iornandis locus supra, ubi de situ Winidarum, Slaninorum et Antarum agit,

agit, de temporibus seculo VI. antiquioribus interpretandus esse videatur, optime huc quadrabit. Sic enim cum scriptoribus aliquibus rectius dicturi sumus, *Ciuitatem nouam* illam non ad Istrum, sed Borysthenem quaerendam esse, neque esse aliam, quam eam, quae postea nomine Slauico, *Nouogrod* cognita fuerit. Pro *Sclauino Rummunense* editio Muratorii habet: *Et Vnense*; et pro lacu Musiano: *lacu qui dicitur Mursianus*; atque ita neque ista nomina ad Istrum quaerenda fuerint, tametsi obscura maneant. Adde et Melanchlaenos, item Androphagos ultra Borysthenem et Tanaim, seu horum fluminum fontes; illos a Graecis ita vocatos, quod vestes gestarent nigras; istos, quod humana carne vescerentur.

Antiquiores sedes inquirere non placuit, quod neque indicium, locusque vispam prudenti coniecturae extat. Fatendum sine dubio est, Venedos, seu Vinidos, Slauos item et Antas, quocunque sub nomine olim delitescerent, ante alicubi, quam in terras, in quibus sedes fixerint deinceps, immigrarent, habitasse; tametsi neque tanto numero, neque tam ample; nam numerus et amplitudo posterioribus temporibus adscribenda sunt. Atque haec causa erat, cur aliqui Slauos et Sarmatas unam gentem dixerint, et cum Bocharto *reliquias Medorum* ex Chaldaeo שאר־סָר Sear, vel Sar, aut Schar — Madai, esse censuerint: quae obseruatio, ut docta, nequam tamen probanda videtur. Sane nomen *Sarmatarum*, pro quo Graeci *Sauromatarum* dixerunt, apud Herodotum aliosque occurrit, hoc est, ea aetate, qua integrum fecit adhuc Medorum imperium. Deinde ab *oculis lacertarum* (σαῦγος enim *lacerta* est, et ὄμυς *oculus*) Sauromatas dixe-

dixerint. Sunt, qui Parthos quoque *Slauos* dicant, Slauisque vastum illud ac potens in historia memorabile tribuant imperium. Aiunt enim *exules* lingua Scythica *Parthos* dici, tanquam a *Partti* voce Slauonica, quam latine enuncies: *vasa collige*. V. Dolci pag. 15. At vereor, ut haec cogitatio omne punctum ferat. Scythica lingua *exules* dicebantur *Parthi*; at nonne Scythicam linguam a Sarmatica Herodotus distinguit? deinde *Partti* sunt *homines potius eieci*; quod *exulibus* praesertim *voluntariis* non satis recte conuenit. Evidem Parthos et Slauos, si praesertim ea huc reuocem, quae Iustinus ex Togo Pompeio l. 41. c. 1. et 2. scribit, eundem populum fuisse, nondum mihi persuadeo, tametsi vltro largiar, voices quasdam Medis, immo Parthis (nam Parthorum sermonem ex Scythico et Medico mistum fuisse, idem Iustinus testatur, et Sarmatas Medorum sobolem Plinius dixit) communes, etiam Slavis aliquo modo visitatas fuisse. *Spaco*, *canem* dicebant Medi, teste Herodoto: eundem Russi *Sobaca* dicunt; at, haec ad designandam gentem nondum facere iam superius obseruauimus. Illud feren- dum aequius, quod id eruditis viris passim probari video, cum Slauos (immo et Turcos, Chazaros, aliosque septentrionales populos) cum Mirchondo, et Ismaele Abulpheda, Apameae Principe,⁴⁷⁾ ad Iaphetum Noëmi filium referunt. Slauos vterque, quos nominaui, scriptor, *Se- caleba*

47) Scripsit Abulpheda Geogra-
phiā secundum ordinem Clima-
tūm Arabice circa annum Hegirae
672 hoc est, an. Christi 1273;
mortuus enim anno Heg. 732, seu

an. Chr. 1331. Mirchendus Perfice historiam an. Heg. 904, seu an.
Christi 1498. V. Assemann T. I.
orig. Eccl. Slau. P. II. c. 2. quod
est de origine Slauorum.

caleba Slauum Seclabi, et auctorem gentis *Seclab* vocant: sedem vero iis fuisse ultra Pontum Euxinum et mare Caspium versus septentrionem, inter fluuium Etel seu Volkam, et Danaprim siue Borysthenem: *Seclabos* demum partim Istro traiecto eam regionem, quam nunc Sclauoniam dicimus, incoluisse, partim in Hyperboreis illis montibus, vbi olim degebant, permansisse. Postremum de sedibus Slauorum et motibus, demptis iis, qui superato fluuiio Vistula occidentem versus migrarunt, non improbo: utrum tamen olim nomen Slauorum, seu *Seclaborum* notum fuerit, ex scriptorum omnium usque ad seculum VI. silentio vehementer dubito. Sic etiam incertum, utrum *Chalybes*, quod nomen apud Xenophontem et Strabonem occurrit populo Cappadociae tributum, utrum, inquam, *Chalybes*, item Slavi ab antiquis appellati fuerint? Herbelotius id affirmavit: Herbelotii quoque intererat, assertiōnem hanc suam aliquo idoneo fundamento confirmare. Plura ad hanc quaestione non libuit addere, nec puto plura desiderari. Hinc consulto praetermissi Amazonas, quas Herodotus Sarmatarum generi adscripsit, et difficulter Scythicam linguam assecutas adeo, ut diu solecissent. Nam cum plura Amazonum genera a scriptoribus referantur, metuendum erat, ne, quae Amazonibus caeterorum populorum adscribuntur a scriptoribus, Amazonibus Sarmaticis temere tribuerentur. Accedit, quod scriptori accurato de Amazonibus vniuersitate cautus differendum, ne alioqui fabulas pro historia venditasse videatur. Praetermissi item totam Chersonnesum Tauricam, cum, utrum istic olim Venedi resederint, constitui non queat. Ut partem Scythae, Gothi partem, partemque Graeci tenebant olim: non certo tamen defendi potest,

poteſt, Venedos his populis intermixtos habitasse; tametsi dici poſſit, Venedos, vt ex regionibus intra Tanain et Boryſthenem ſitis, ita quoque inde a Scythis aduenis retruſos fuiffe, aut raroſ colere fuiffe permiffos. De Sar- matis, Budiniſ item, intra Caucasum et Tanain ad Wol- gam vsque colentibus, facta eft ſuperius meritio. Hoc tantum hic addo, Serbos, vnde probabiliter (nam aliam originem neque ii ipſi, qui a me hic diſſident, ſtatuumt) orti ſunt Serbli Porphyrogennetae, ſeu Seraci ac Sorabi, non temere, Ptolemaeo iudicium faciente, ab Sarinatis illis eſſe excludendos. De populis intra Caucasum et Pontum co- lentibus ne verbo quidem meminifſe libet; quandoquidem eos, puta, Zichos, Lazos, Achaeos, Cercetas caete- rosque, Slauos fuiffe demonstrari non poſſe, alii iam pro- lixe oſtenderunt. V. annum 480 Chronologicae ſeriei Rerum Bohemicarum P. Pubitschka. Praetermisſi quoque inquirere, quae vetuſtissima Venedorum lingua fuerit? Et cur inquiram, quod me definiturum non ſperem? Sine dubio aliquis dicere poterit, Venetiam linguam, quae ſeculo VI. hoc eft eo tempore, vigebat inter Slauos, ex vetere Venedica, et Scythica fuiffe permiftam: cum enim Scytha ampliſſima natio fuerint, nec vbi conſederint poſtea, quam Scytharum regnum cum ipſa natione eu- nuit, ſuſpicari aliquis poſſit; Scythaſ cum Venedis anti- quis in vnam gentem coaluiffe, atque ita etiam tertiam, eamque nouam lingua emerſiſſe. At aſſeri hoc ex fuſpi- cione mera poſteſt; vereor, vt probari poſſit. Ego ma- lim existimare, Scythaſ aliquibus Venedis accessiſſe, cum iisque in vnam coaluiffe gentem, ac tertiam linguam ex commixtione hac procudifſe; quales ſunt Fenni, Pruſſi, Lithuani, Curones, Liuones, et fortasse Slaui hodie

G 2

ad

52 *De Venedis et Antis eorumque sedibus antiquissimis.*

ad Lüneburgum; apud reliquos Venedos, tametsi forte et ipsi Scythes aut alios quosdam populos receperint, quia tamen nativa ipsorum lingua cum nomine Venedico praeualuerit, coaluisse quidem Scythes in unam cum ipsis gentem, sed ita, ut et nomen et lingua Venedorum praeualuerit. Non fugit me, argumentum propositum esse vastius, quam ut id integrum a me pertractatum esse gloriari possim: sed et id mihi persuadeo fore, ut maior in excutiendis libris et scriptoribus solertia maiores potius tenebras, quam lucem, dissertationi huic afferat.

F I N I S.

PRO-

PROBLEMA
EX
HISTORIA SLAVICA
VTRVM WILZI
SERBI, AVT SORABI, SLAVONICE DICTI
SRBI AB ALBI, ET REGIONIBVS GERMANIAE
PROFECTI SINT IN CROATIAM, ET
DALMATIAM, AN EX ILLYRICO VENERINT
IN GERMANIAM

PRO ANNO 1772.

ANSIRIACENSIS.

*Per Reuerendum Patrem Leopoldum Iohannem Scherschnik
S. I. Pragensis.*

G 3



I N G R E S S V S.

Non me falli putem, si quaestioni huic Laonici Chalcocondylae dubium ansam praebuisse credam. Scriptor hic, cum Sarmatas, et Illyrios eodem vti sermonе obseruasset: dubitare coepit, vtrum hi populi ex Illyrico in Sarmatiam, an contra sint profecti? *Sarmatarum*, inquit, *lingua similis est Illyriorum, Ionium ad Venetos usque accolentium.* *Vtri autem horum vetustatis praerogativa gaudeant, et vtri alterorum regionem teneant, an videlicet Illyrii, in istam Europae partem recedentes, Polonium et Sarmatiam incoluerint, aut an Sarmatae ad haec Istri loca adeuntes Mysiam, et Triballorum, Illyriorumque regionem, qua versus Ionium patet, usque ad Venetos inhabavit; neque quemquam audini veterum commemorantem, nec ipse possum ea quam verissime explicare.* At si Chalcocondylas Porphyrogenetam, Iornandem, alios item scriptores, qui forte interciderunt, ad manum habuisset:

credo

credo, illum minime hac de re fuisse dubitaturum. Quae cum scriptores rerum Slavicarum legerent, ea de his populis conscriperunt, quae sibi visa sunt quam verisimilima, atque alii quidem eos e Sarmatia in Germaniam, indeque in Illyricum, alii a Ponto Euxino, Paludeque Maeotide in Illyricum, ex Illyrico in Germaniam et Sarmatiam deducebant, alii denique reperti sunt, qui Sluos in Dalmatia οὐτόχθονες esse dicerent, aliundeque negarent aduenisse. Quapropter cum ex hac auctorum dissensione nihil certi posset statui, multumque eruditorum ad plenius Slavorum cognoscendas migrationes, ea non ignorare interesset: SERENISSIMVS PRINCEPS IABLO-
NOVIVS Maecenas aei nostri longe maximus, pro suo in literas, atque in Historiam, praecipue Slavicam amore, Orbi literario praefens problema proposuit. Cuius ego Serenissimi Principis votis dum fieri satis vehementer cupio; ipse meum qualem qualem, vt afferrem opellam, induxi animum; quam etsi fortasse minus probari contingeret, magni mihi tamen istud erit instar praemii, *Tanti Principis Voluntati obsequi voluisse.* His itaque praemunitus, laetus opus aggredior, aioque Serbos e regionibus Germaniae in Illyricum immigrasse, scriptorum istud testimoniis iam iam firmaturus.

Ante

Ante Slavorum e Sarmatia emigrationem, Lusatiam et Misniam Hermunduros incoluisse, e Romanis scriptoribus cognoscimus. Tacitus¹⁾ ait, Albim oriri in Hermunduris; Strabo illos trans Albim, sed minus recte collocat,²⁾ Velleius vero³⁾ Semnones et Hermunduros Albim interfluere, eoque Romanum exercitum dicit perductum; quos etiam in Cattos vsque fuisse porrectos, ex Tacito⁴⁾ colligitur; superatos deinde bello a Vandalis, atque in vltiora septentrionem versus rejectos, e Dionis Cassii⁵⁾ verbis concludere licet, qui Albim non iam in Hermunduris, sed in Vandalicis montibus oriri scribit: Iornan-dis quoque testimonio confirmatur: *Quo tempore, inquit⁶⁾ de Vandals, erant in eo loco manentes, ubi Gepidae sedent, iuxta flumina Mansia, Miliare, Gilfil, et Griffia, qui amnes supra dictos excedit. Erant namque illis tunc ab oriente Gothi, ab occidente Marcomanni, a septentrione Her munduri, a meridie Hister, qui et Danubius dicitur. Quos deinde a Gebericho Gothorum Rege caesos sedes suas reliquisse, et in Pannoniam, potestate a Constantino Imperatore facta, concessisse, eodem capite narrat. Atque Gothi quidem in locum Vandalorum, tum in horum Gepedes, vt ex Iornande constat, succeſſerant, eoque loci ad obitum Attilae permanserant; quo mortuo, iugum excussere Hunnicum, atque Daciam occupauerunt. Hermundurorum quoque nomen non amplius eo tempore (seculo V.) audiebatur; quos credo cum Marcomannis,*

et

¹⁾ De Moribus Germ. cap. 41.⁴⁾ Lib. XIII. 57.²⁾ In Geograph. lib. VII.⁵⁾ Lib. 55.³⁾ In Hist. Rom. lib. II.⁶⁾ In Hist. Getica cap. 22.

H

et aliis Sueuicis populis, qui seu ab Theodorico inuitati, seu Slavis sibi infestis, aut quacunque demum de caussâ sedes mutare sint coacti, proprius Italiam mouisse. His demum Slavi successerunt; sed Soraborum nomen, vti et reliquorum Germaniam inhabitantium Slavicarum gentium serius prolatum est. Soraborum primus meminit Eckardus; Helmoldus Heueldos, Leubuzos, Wilinos, Stoderanos, vt de aliis taceam, prodidit; alii alias populos protulere. Vt vero ad Sorabos, quos alii Serbos, Srbos, et Serblios appellant, redeamus, credunt Viri quique doctissimi, illos esse eosdem cum Serbis Plinii, et Ptolomaei; cum enim aliae Slavicae nationes nomina, quae olim in Asiatica, aut Europaea Sarmatia habebant, retinuerint, Serbos nomen quoque suum a Ponto Euxino in has oras attulisse; maxime quod, cum Serbos Ptolomeus⁷⁾ inter Ceraunios montes, et Rha flumen collect, Procopius populos Sarmatiam Asiaticam incolentes enumerans, nullam eorum faciat amplius mentionem; quare verisimile aiunt esse, Serbos ad Hunnorum ex ulteriori Asia motus, prioribus desertis sedibus, in Sarmatiam Europaeam immigrasse. At longe ante in Europa Serbos habitasse, ex Plinio⁸⁾ colligo: *a Cimmerio, inquit, accidunt Maeotici, Vali, Serbi, Arrechi, Zingi, Pseffii, dein Tanaim amnem gemino ore influentem colunt Sarmatae.* Praeterea, non omnes cum Hunnis abiisse, ex Porphyrogenneta coniicio, qui Serborum Russis subiectorum meminit: *Ineunte, inquit,⁹⁾ Nouembri mense, quamprimum eorum Principes cum uniuersa Russorum gente egrediuntur Ciabo (Kiouia), et in oppida proficiuntur, quae Gyra appellantur, aut in Slauiniae loca Berbianorum, Drugubitarum, Crubi-*

7) Lib. V. cap. 9.

8) Hist. Nat. Lib. VI. cap. 7.

9) De Adm. Imp. cap. 9.

Crubitzarum, Seruorum, reliquorumque Sclauorum, qui Russis tributarii sunt.

Iam vero a multis quaeritur, vtrum Serbi, aut Sorabi ab Albi, et regionibus Germaniae profecti sint in Croatia et Dalmatiam, an ex Illyrico venerint in Germaniam? In diuersa hic abire dicebant Eruditos, aliis hanc, aliis illam, vt quaeque sibi videbatur verisimilior, propugnantibus sententiam; nos, quod recepimus, Serbos e Sarmatia in Germaniam, atque inde in Illyricum fuisse profectos, sumus demonstraturi. Et primum quidem aio, indubitatum esse, Germaniam prius ab Slavis, quam Dalmatiam et Illyricum, occupatam. Iornandes enim, qui opus suum, Iustiniano Imperatore, anno a nato Christo 530 concinnauit, scribit, Sluos sua aetate ¹⁰⁾ ad sinistrum latius, quod in aquilonem vergit, Dacicarum Alpium, atque ad fontes Vistulae habitasse; vnde patet, diu ante annum, quo Iornandes scripserat, Sluos in parte hodiernae superioris Silesiae, Polonia, aliisque versus mare Balticum regionibus sedisse. Procopius vero eiusdem aetatis scriptor refert, ¹¹⁾ Herulos a Longobardis circa annum 493 debellatos, alios Istro traiecto in Illyrico consedisse, alios a vicinia Tibisci ad Danos, et Varnos, atque inde in Thulen migrantes, prius per cunctas Sclavorum nationes transiisse, quam, quo tendebant, peruenissent. Quod quidem fieri non poterat, nisi Sluos sedes, quas ad Vistulam primum habebant, in regionibus etiam, quae inter Tibiscum, Danubium et Daniam interiacent, locasse dicamus: atque id quam necessario admitti debeat, nemo non videt, praesertim cum Germanis quoque ante an. 530 Sluos sub nomine Obotitorum non ignotos ex Einhardo

H 2

scia-

¹⁰⁾ Cap. 5. de reb. Goth.

¹¹⁾ Lib. II. cap. 14 de bello Goth.

sciamus. *Caetera vero loca*, inquit Einhardus de Saxonibus loquens, ¹²⁾ ipsi possederunt; a meridie quidem Francos habentes, et partem Thuringorum, quos praecedens hostilis turbo non tetigit, alueoque fluminis Unstrote dirimuntur: a septentrione vero Nortmannos, (quo nomine etiam Dani comprehendi solebant) gentes ferocissimas: ab ortu solis Obotritos, et ab occasu Frisios, a quibus sine intermissione vel foedere, vel concertatione necessaria finium suorum spatia tuebantur. Erant enim inquieti nimis, et finitimarum sedibus infesti, domi vero pacati, et ciuium utilitatibus placida benignitate consulentes. Ex qua narratione auctor Seriei Chronologicae ¹³⁾ duo dedit: Primum Slauos Obotritorum nomine Germanis hoc tempore fuisse notos, cum Einardus de iis, non veluti de nouis accolis, loquatur, eosque Slauicae fuisse originis nemo sit, qui audeat ambigere. — Deinde cum Einhardus, seu etiam Eginhardus, vicinos populos omnes, ac sine discrimine dicat domi fuisse pacatos, et ciuium utilitatibus consuluisse, apparet, Slauos iam hoc tempore ad ciuilem aliquam normam adiunxisse animum. Dresserus ¹⁴⁾ credit, impleta haud dubie prius Bohemia et Polonia, vt Balbinus sentit, ¹⁵⁾ Slauos iam circa annum Christi 500 veteres Vandalorum sedes, Misniam nempe, Lusatiam, Saxoniam aliasque regiones ad Oceanum sitas, occupasse: Heneti (Vinidi), inquit, et Sarmatae magnis agminibus, nescio quo fato, in Marchiam infusi a Danubio, ad fontes Albis usque ad Cimbricam Ceronnesum cum toto traectu Baltici maris compleuerunt ferme ab anno Christi 500. Sed Serenissimus Princeps IABLO NO-

VIVS

12) Apud Bremenf. cap. 4. hist.
Eccl. apud Lindenbrog.

14) Millen. VI in March. Bran-
deb.

13) Vien. edit. pag. 103.

15) Epitom. Hist. Boh. Lib. I.
cap. 10.

vivs in opere suo pererudito, Vindiciis Lechi et Czechi,¹⁶⁾ longe citius Slauicas gentes in Germania confedisse tueruntur: *Mibi sufficiat, inquit, obseruasse illud grauissimum testimonium, et quidem ex variis auctoribus, qui Venedos, seu Slauos Vistulae fluuii in Sarmatia, seu Polonia accolas, demum circa tempora praelii Catalaunici, id est, anno rec. sal. 451, vel 455 patrias reliquise sedes, transmissaque Vistula inuasisse eas Germaniae terras, quas olim Vandali posse derant, cumque Sueorum a Vandalis relictorum expidissent reliquias, confedisse atunt primum in iis locis, vbi nunc sunt Ducatus Pomeranicus, et Megapolitanus: deinde ulterius progressos occupasse non solum eam partem, quae nunc dicitur Marchia Brandenburgensis et Misnia, sed, traiectis Albi et Sala fluuiis, exegisse etiam Hermunduros, protulisseque fines ad siluam usque Thuringicam, vbi adhuc duo Turiniae fluuioli Sorbetz et Lugwitzza Slauica obtineant nomina.*

Iam vero Slavi e sedibus, quas ultra Istrum habebant, sub Iustiniano potissimum regiones orientis, teste Procopio,¹⁷⁾ infestare cooperunt. *Ex quo tempore, ait, rerum potitus est Iustinianus, Hunni, Sclabeni, Antae pene quotannis incursionibus crudelissime depopulati sunt. Ergo Slavi ante Iustiniani tempora, id est, ante annum 527 quo Iustinianus Imperator orientis est renunciatus, Illyricum, aut Dalmatiam non incoluerunt. Neque etiam ante annum 638 ibidem sedes fixisse, certum est nobis (Dalmatas autem et Illyrios, Slauos non fuisse, Cromerus pridem monstrauit, atque nunc nemo negat, siue res ageretur, leui negotio conficeremus.) Quod ne nude tantum asseruisse videamur, omnes Slavorum in Illyricum, Thraciam, Dalmatiamque irruptiones enumerabimus, indeque ostendemus, Slauos post singulas incursiones ex iis regionibus,*

H 3

nibus,

16) Part. II. pag. 117.

17) In Hist. Arcana.

nibus, aut sponte, aut coactos iterum decessisse. Anno IV. Iustiniani, qui in a. Christi 530 incidit, refert Procopius,¹⁸⁾ Chilbudium Istri fluminis custodiae praefectum, atque operam dare iussum, ut fluminis transitu barbari in postrem prohiberentur: *Iam enim saepe Hunni, Antae, et Sclaueni, traieco fluuiio, Romanos pessime foedissimeque vexaverunt.* Ex quibus colligimus, Slauos mox primis annis Iustiniani orientem incursasse, neque eam, quam idem lib. III. cap. 38. retulit, primam, ut putauit Assemannus,¹⁹⁾ fuisse incursionem, sed imperfecto Chilbudio demum factam: *Sub idem tempus, inquit Procopius, Sclauenorum exercitus, tribus solum constans virorum milibus, nemine prohibente, Istrum fluuium traiecit, ac nullo negotio subinde transmissio Hebro flumine bifariam discessit.* Constatbat pars altera mille octingentis, altera reliquis. Utrosque, quamuis inuicem, ut dictum est, separatos aggressi in Illyrico Thraciaque exercitus Romani duces, praeter opinionem vici sunt; ac partim ibi ceciderunt, partim evaserunt incompositi fugientes. Et post pauca: *His peractis Thraciam omnem atque Illyricum impune vastarunt; ac multa vtrinque castella obsidione ceperunt, qui antea nec muros oppugnare, neque in campum descendere audebant.* Neque tamen Slaui aut in Thracia, aut in Illyrico permanserunt, addit enim Procopius: *Ita vterque eorum exercitus, quasi nimio sanguine ebrius ac satur esset, quos in posterum caperet, illorum parti donare vitam statuit; quo factum est, ut domum omnes reuersi sint, cum captiuorum innumeris myriadibus.* Nec multo post Sclauenorum cateruae, eodem Procopio referente,²⁰⁾ quantae nunquam antehac prodierunt, ad imperii Romani fines progressae, traieco Istro flumine, Naifum vene-

18) Lib. III. cap. 14. de bello
Genu.

19) Tom. I. Orig. Eccl. Slau.
20) De bello Goth. Lib. III. c. 40.

venerunt, eo, vt subiungitur, consilio, vt Theffalonicam, urbesque illi circumiectas, obsidione caperent. Sed a Germano, olim Antarum victore, deterriti sunt. Itaque Slaueni hunc Germanum veriti, ac simul rati, florentissimo exercitu succinctum esse, vt pote qui aduersus Totilam, et Gothos ab Imperatore mitteretur, coeptum Theffalonicam versus iter statim abrumpant, neque ausi amplius in campos digredi, omnibus Illyrici montibus superatis, in Dalmatiam intrant. Iustinianus vero exercitum aduersus illos miserat, qui primum quidem est superatus, postrem tamen Slauos deuicit, atque e Thracia, Dalmatiaque profligauit: reliqui barbari cum reliqua praeda domum reuersi sunt. Qua clade nihil imminutis animis, rursus anno 552 Romanas Prouincias percursarunt, tantumque caedem vbique effecerunt, vt cadaveribus, verba sunt Procopii, ²¹⁾ vias omnes constrauerint, et cum infinita captiuorum multitudine, praedaque omni, quam cuncta vastando collegerant, domum redierint, nemine prohibente. Nam Iustinus et Iustinianus, Germani filii, eos infecuti, ob vires inferiores cum illis congredi dubitabant, et Istri fluminis traiectum, Gepedibus eosdem transuehentibus, impedire non poterant. Anno 558 ²²⁾ Theophane teste, Slui Hunnis coniuncti Thraciam vastarunt; sed quod magnos contra se belli apparatus fieri audirent, missis legatis petiuerunt, vt sibi redditus tuto permitteretur, et Danubium traxicerent: quod etiam obtinuerunt. Iustinianus enim, missis Iustino nepote suo et Europalate, eos dimisit incolumes. Ex his iam patet, sub Iustiniano nullos Slauos in Illyrico, aut Dalmatia, et si saepe conati sint, confederasse. Sed neque sub caeteris Imperatoribus ad Heraclium

vsque

²¹⁾ De bel. Goth. Lib. VII. ²²⁾ In Chronograph. ad. h. a. cap. 25.

vsque has regiones ab illis occupatas, eadem ratione demonstramus. Anno 581, qui fuit Tiberii quartus, vt habet Menander,²³⁾ centum fere millia Sclauorum irruperunt, et Thraciam, multasque alias regiones vastrarunt. Anno 583, Mauritii secundo, refert Theophanes,²⁴⁾ Slauos, armis a perfido Auarorum Chagano instructos, iterum in Thraciam inuasisse, et ad longum vsque Murum progressos a Commentiolo primum abactos, deinde etiam prope Adrianopolim caesos, omnique praeda fuisse spoliatos. Atque haec erat vltima, quam in Graecis scriptoribus legimus, Slauorum incursio. Etsi enim anno 592²⁵⁾ nouam in regiones, trans Istrum locatas, irruptionem meditarentur, in potestatem tamen redigere non potuere. Ut primum enim istud Mauritio suboluerat, is Priscum ad ripas Istri custodiendas ablegauit: qui cum per exploratores cognouisset, Slauos per Prouinciam Romanam impune vagari, Istro superato, in eos raptim duxit exercitum, nihilque tale opinantes noctu adortus cecidit; inde progressus in vltiora regem quempiam Slavorum, persolutis fratri funebribus, vino bene madidum, suique securum, magno praeterea numero caesis barbaris, oppressit, atque intercepit. Quibus rebus et Slavorum vires sunt attritae vehementer, et Romanorum ita auctae, vt Priscus anno 593 rursus eorum regiones fuerit depopulatus. Cui Petrus in supremi belli Praefecti munere suffectus anno 595 mille milites in eosdem, quod praedas in Romano agro egissent, immisit; a quibus Slavi, praeda tamen retenta, sunt depulsi. Minus prospere anno sequenti rem Petrus gesserat;²⁶⁾ Slavorum enim progressibus, quos Byzantium

versus

23) In Excerpt. Legat. pag. 124.

25) Theophan. in Chronogr. ad h. a.

24) In Chronogr. ad h. a.

26) Idem ad h. a.

versus fama fuit aduentare, obuiam iturus Norbas, vrbem Moesiae, se contulit, et fugatis, qui a transmissione Istri prohibere conabantur, barbaris, flumen traecit; actisque in hostili praedis cum se reciperet, in insidias, quas difficulter, magnisque acceptis detrimentis, euasit, praecipitauit. Anno 598 Chaganus, vt habet Theophanes,²⁷⁾ collectis omnibus copiis in Dalmatiam expeditionem suscipit. Balben, et circumpositas ciuitates omnes vastauit. Et quamuis tum audita clade suorum, a Prisco accepta, ad sua remigrauerit Chaganus: non multo tamen post tempore in Dalmatiam reuersus, eandem maxima ex parte subiugauit, atque ad Chrobatorum et Serborum vsque aduentum possedit. Quae qua occasione sub illius potestatem fuerit redacta, libeat Porphyrogennetam audire: Congregabantur, inquit,²⁸⁾ ex reliquis Dalmatiae vrbibus equites, et mittebantur Salona vsque ad mille ad flumen Danubium, vt ibi excubias contra Aares agerent. Ad illam enim Danubii partem Aares tum commorabantur, vbi hodie Turcae (Hungari) degunt, Nomadum instar viuentes. Venientes autem quotannis Dalmatae, cum saepe illic iumenta hominesque viderent: traiicere illis aliquando visum fuit, et inuestigare, quinam ibi degerent. Cum itaque traiecissent, Aarum feminas et pueros solos inuenierunt, viris et iuuenibus ad expeditionem bellicam profectis. Vnde subito ingruentes omnes ceperunt, nulloque accepto damno reuersi sunt, praeda hac Salonom adducta. Aares autem, ex bellica expeditione reuersi, re cognita consternati quidem erant, at unde vulnus hoc sibi inflictum esset, ignorabant. Quamobrem obseruandum sibi tempus statuerunt, et ab eo omnia discenda. Postquam igitur pro more rursum misi sunt Salona praefidarii,

et

27) In Chronogr. ad h. a.

28) De Administr. Imp. cap. 30.

et alii essent a primis, idem consilium et ipsi ceperunt, traheruntque contra Abares. Incidentes vero in illos, non sparsos, ut antea, sed collectos, non solum nihil effecerunt, sed omnium grauissima passi sunt; quippe partim caesi, partim capti fuere, neque quisquam fuit, qui e manibus illorum evaderet. Percontati vero, quinam, et unde essent, intellectaque ab ipsis, se mala supra commemorata percessos esse, insuper de loci qualitate inquirentes, quasi ex auditu amore accensi, in vinculis eos tenuerunt, et vestibus eorum suntis, equis que consensis, flammula, et reliqua signa, quae secum attulerant, tollentes, more exercitus Salonam perrexerunt. Cognito igitur tempore, quo a Danubio redire soliti erant praefidiarii, quod erat magnum Sabbatum, etiam eodem die venerunt. Multitudo autem omnis cum Vrbi appropinquauit, sese occultauit; mille vero, qui equos et vestes Dalmatarum sumserant, ut fallerent, ulterius perrexerunt. Oppidani, cognitis signis suis et vestitu, et praeterea die, quo redire ipsis solemne, portis apertis gratulabundi eos exceperunt. Illi vero statim ac intrassent, portas occupant, et signo reliquis, qui in insidiis erant, dato, accurrere et ingredi iubent. Interfecerunt itaque omnes ciues, et ex eo tempore Dalmatiam uniuersam occuparunt, sedemque illic suam collocarunt, exceptis oppidulis mari adiacentibus, quae se ipsis non tradiderunt, sed in Romanorum potestate permanebant. Haec Porphyrogeneta. Quae etsi satis clara sunt, Slauosque ferius omnino in Illyrico, quam in Germania confessisse, euincunt: non desunt tamen, qui contrarium tecantur. Justinianus, aiunt illi, ab Illyriis *Vpprauda*, Sabbatius eius Pater *Istokus*, Mater vero *Bigleniza* alio nomine appellabantur; haec autem nomina cum Slavica sint, Slauos est necesse in Illyrico fuisse. Paucis ad haec, etsi multa afferre possemus, cum alias ista sibi pertractanda sumserit,

respon-

respondemus: facile contingere potuisse, vt allata vocabula Illyriis a Slavis, quos ab iis Ister tantum dirimebat, adhaerint; quemadmodum Gothis, et veteribus Turcis nouimus accidisse, in quorum idioma multae Slauorum voces irrepserent; ita, vt alia praetermittamus, utriusque more Slavis recepto, principes suos *Voeuodas* (*Voiuodas*) appellabant. Atque istud aliis quoque accidere gentibus, vt ex vicinorum populorum idiomate multas in suum voces recipient, vel hodie obseruamus. Sed, ne nimis duri nostris aduersariis videamur, demus, Sluos Iustiniano Imperatore, a quibus *Vprauda* appellari potuerit, Illyricum incoluisse, qui seu seruorum Sarmaticorum, seu illorum, qui sub signis Iustiniani in Italia merebant, fuerint reliquiae, quam paucissimi certe fuerunt, atque Gothis immixti, cum quibus etiam haud dubie ex Illyrico et Dalmatia pulsos esse crediderim, quod Serbi, et Chroباتи, vt paullo post ex Porphyrogeneta dicemus, non Gothos, neque Sluos, sed Aures harum regionum incolas inuenient. Quid? quod nondum per haec possit demonstrari, ante Iustinianum Sluos in Illyrico fuisse; quamquam istud Sarnicki, diligens caetera scriptor, infelicitamen, vt videbimus, successu, probare fit conatus. Hic inter alia, quibus usus est, argumenta, sequens adducit.²⁹⁾ *Addatur hic et illa legatio Iustiniani ad gentes Slavonicas, qua hortatur eas, vt sedes veteres incolant in Illyrico ad urbem, Turrim Traiani diclam. Ex quo loco appareat, dum gentes nostras habitasse in Illyrico ante Iustinianum, sed nondum ab exteris vocatos fuisse Sluos.* Sed bonus hic auctor, si Procopium legisset, utique etiam aduertere debuisset, Turrim Traiani trans Istrum sitam fuisse; deinde illam *veterem Ciuitatem*, id est, vetustate fortassis collabescentem,

I 2

non

²⁹⁾ Annal. Pol. Lib. IV. cap. 23.

non autem veterem sedem Slauorum a Procopio nominari. *Slavis*, inquit Procopius, ³⁰⁾ *Iustinianus antiquam Vrbem, Turrim appellant, quae trans Istrum fluum sita, conditaque olim a Traiano, Romanorum Imperatore, dedit, agrosque circumiacentes, modo ut, iēlo secum foedere, Hunnis Romanum imperium incursare volentibus, sese ubique opponerent.* Quae duo si Sarnicki obseruasset, neutquam intulisset, dudum gentes nostras ante Iustinianum in Illyrico habitate. Quidquid sit, nescire nos fatemur, cur Graeci, si Slavi Illyricum inhabitarint, eos, qui trans Istrum degebant, tantopere demirati fuerint, gentemque ignorantiam sibi principio profeshi fuerint: ³¹⁾ vtique ista a Slavis Illyrici incolis edoceri poterant? Sed iam istud nunc agamus, vt Slavos e Germania in Illyricum immigrasse, et quo id factum sit tempore, ostendamus. Constantinus Porphyrogeneta ³²⁾ refert, Heraclio imperante Chrobatos et Serbos, gentem vtramque Slavicam, missis legatis, ab Imperatore petuisse nouas sedes, impetrasseque Dalmatiam, quam tamen prius armis afferere sibi debuerint. *Chroباتi, ait, ad Romanorum Imperatorem Heraclium confugerant, antequam Seruii configissent ad eundem Imperatorem Heraclium; quo tempore Abares armis inde Romanos eiecerant, quos Roma adductos Diocletianus Imperator illic habitare fecerat, unde et Romani nuncupati sunt, quod Roma venientes sedes posuissent in illis regionibus, nempe Chroatia et Seruia, uti nunc vocantur. Pulsis vero Romanis illis ab Avaribus, tempore eiusdem Romanorum Imperatoris Heraclii, desolata eorum regio iacuit. Quapropter iussu Iuini Imperatoris, iisdem C.robati, armis arreptis, Auares ex illis locis expulerunt,*

et

³⁰⁾ De bel. Goth. Lib. III. cap. 14.

³¹⁾ Vide Procop. Theophan. Menand. et alios

³²⁾ De admin. Imp. cap. 31.

et in ipsorum terra, quam etiam hodie tenent, sedes colloca-
runt. Idem quoque de Seruiis sequenti capite tradit. Ne-
que tamen omnes excessisse, ex iis, quae sequuntur, intel-
ligimus. Vna autem generatio, nempe quinque fratres
Clucas, Lobelus, Cosentzes, Muchlo, et Chrobatus, duae-
que sorores Tuga et Buga, vna cum suis populis descendens
ab ipsis in Dalmatiam venit, ubi Abaras incolas inuenerunt;
belloque per annos aliquot inter eos gesto, vicerunt Chrobati:
Abarumque alios quidem interfecerunt, alios vero parere sibi
coegerunt: atque ex illo tempore a Chrobatis possessa haec re-
gio fuit, suntque etiamnum in Chroatia Abarum reliquiae,
et Abaras esse cognoscuntur. Caeteri vero Chrobati versus
Franciam commorabantur, et appellantur hodie Belo-Chrobati,
sive Chrobati Albi, qui proprio Principi subiecti sunt. Parent au-
tem Ottoni Magno, Regi Franciae et Saxoniae,³³⁾ baptismique
expertes affinitatem cum Turcis et amicitiam contrahunt. At
a Chrobatis, qui in Dalmatiam venerunt, pars quaedam
secessit, et Illyricum atque Pannoniam occupauit: habebant-
que ipsi etiam Principem supremum, qui ad Chroatiae tan-
tum Principem amicitiae ergo legationem mittebat. Per
aliquot vero annos isti Chrobati Francis subiiciebantur, quem-
admodum et antea, dum in ipsorum terra degerent. Tanta
autem in eos crudelitate utrebantur Franci, ut laetentes ad-
huc eorum pueros occidentes canibus obiicerent. Quae res
cum intolerabilis Chrobatis esset, facto dissidio, Principes,
quos ex ipsis habebant, interemerunt, unde magnus contra
eos exercitus mouit e Francia, et post septem annorum bellum
aegre tandem superiores facti Chrobati, omnes Francos, eo-

I 3

rumque

33) Alii Autores, atque ipse
interpretes Porphyrogenetae ver-
terunt: quae et Saxonia, sed mi-
nus recte, cum in graeco (edit,

Venet.) legatur φεργαλας τη νον
Σαξιας. et ad Verbum, Francias-
que et Saxoniae reddatur.

rumque Principem Cotzilin e medio sustulerunt. Et exinde liberi, ac sui iuris facti, sacrum baptismum a Romano Pontifice petierunt, missisque Episcopi ipsos baptizarunt, principatum tenente Porino. Quid igitur certius, quam hodiernos Illyrici accolas aduenas esse? Vnde vero aduenerint, multis locis indicauit. Chrobati, ait cap. 30.³⁴⁾ vero tunc habitabant ultra Bagibarias, ubi nunc sunt Belo-Chrobati. Item capite 31.³⁵⁾ Chrobati, qui Dalmatiae partes nunc inhabitant, a Chrobatis baptismi expertibus, qui et Albi appellantur, originem ducunt: qui sane ultra Turciam prope Franciam incolunt, et Slavis contermini sunt non baptizatis Seruiis. Et cap. 32.³⁶⁾ Sciendum est, Seruios oriundos esse a Seruiis non baptizatis, qui etiam Albi cognominantur, et ulteriora Turciae incolunt in loco, ab illis Boici nuncupato, cui finitima Francia est, ut et magna Chroatia baptismi expers, quae etiam Alba cognominatur. Illic igitur initio Seruii hi habitabant. Habitabant ergo Chrobati ultra Bagibarias et Turciam prope Franciam, quibus erant vicini Seruii, in loco Boici dicto confidentes. Turciam pro Hungaria, Franciam vero pro hodierna Germania Porphyrogenetam scripsisse, extra dubium est; quid autem per Bagibarias intellexerit, cum auctores discrepant, videamus. Bandurio Βαγιβαρίαι est Slavum vocabulum graece detortum, id est Βάζεια Ὀγεια, seu Babii montes, Slavis Babie Gore, videlicet vetulae, vel veterarum montes, quo nomine Carpathii montes, Poioniam ab Hungaria distinguebantur, ab aliquibus nuncupantur.³⁷⁾ Idem ad verbum retulit ex eo Assemanus:³⁸⁾ utriusque adstipulatur Auctor Seriei Chronologis.

34) De Adm. Imper.

men fuisse, ut ex mappa Porphyrogenetae de Adm. Imper. praefixa appareat.

35) Ibid.

36) Ibid.

37) Serius mentem Bandurius mutauit, fluuiique alicuius id no-

38) Tom. I. Orig. Eccl. Slav. pag. 487.

nologiae, quam opinionem nos quoque amplectimur. R. P. Gelasius Dobner per Bagibarias Bauariam intelligi debere dicit. Omnino si vocum similitudinem spectes, est illa aliqua; verum tot contra hanc opinionem pugnant rationum momenta, ut nisi errare malis, eam mittere debeas. Haec autem habet: 39) *Porphyrogenitus* — ut ex posterius referendis apparebit, per Bagibareas nihil aliud intellexit, quam Bauariam, quae seculo X, quo scripsit Porphyrogenitus, non raro hanc appellationem inter scriptores obtinuit. Eandem enim scriptionem refert Chronicon Massacense; et quam mire veteres in scriptura huius vocabuli variauerint, iam in Prudromo pag. 65. ex Cluverio ostendimus, ubi varie detortum legitur. Boioarrii, Boiouarii, Bayuarii, Beibarii, et Baibarii. Cur autem Graeci inter α et ε interseruerint γ, vel mediocriter linguae Graecae gnarus facile rationem reddet. Enimuero γ pro diaeresi adhibere, (nam huc dictis suis male collineat) insolens scriptoribus Graecis esse aio, ausimque cum eo sponsione graui decertare, nullum ab illo mihi scriptorem nominatum iri, qui, ne α vno sono pronunciaretur, γ interposuerit. Quare nimis confidenter dictum esse putamus; vel mediocriter linguae Graecae gnarum facile rationem redditurum, cur inter α et ε sit γ intersertum. Sed afferamus reliqua: Caeterum per Bagibareas Porphyrogenitum minime intellexisse haecenus omnibus veteribus incognitos Babios montes, ex his eruitur; nam Porphyrogenitus non scribit Babigorias, ut scribere oportuisset, si Slavice Babios montes connotaret. Babi enim, non Bagi, Slavis vetulas, et Gor, non Bar, montem significabat; ut itaque palam sit, doctissimum Ioannem Lucium afferationem suam soli coniecturae superstruxisse, cum scilicet non assequeretur, quam regionem Porphyrogenitus per Bagibareas designatam vellat. Veteres ignorarunt: quid tum?

39) Annal. Hagecian. Part. II, pag. 12.

annon multa veteribus obscura fuere, quae nobis clara sunt? Sed nego, veteres omnia, quae litteris non consignarint, ignorasse. Quis enim prudens istud a scriptore quopiam exigat, vt non modo vrbium singularum, verum etiam oppidorum, montium, fluuiorum, etc. nomina operi suo inserat. Satis est, hodie montes Babios non ignorari; adeat, qui plura de iis cognoscere voluerit, *P. Rzaczynsky S. I. Historiam Naturalem Regni Poloniae.* Caeterum auctor sum huius sententiae patronis, ne nimis saepe, quod a silentio veterum desumitur, vtantur argumento; futurum enim est, vt, quod nuper in certamine pro Zichis suscepto sibi accidisse non ignorabunt, iisdem telis, quibus alios improuide ferire volebant, obruantur, et confodianter. *Sed Porphyrogenitus non scribit Babigorias, vt scribere oportuisset, si Slavice Babios montes connotaret:* atqui neque *Bāiβægias*, neque *Bāiβaigesaw*, neque *Bāiβægicaw* scribit, vt scribere oportuisset, si regionem Bauarium connotaret. Nam primum Graeci pro diaeresi γ non adhibent; deinde nomina regionum per ε scribere, atque numero multitudinis efferre non solent; nisi fortasse, vt etiam aliquid coniecturis indulgeamus, Porphyrogennetam Bagibarias Bauarium, vrbem esse aliquam, velut Venetias, Parisios, et quod R. P. *Gelasius* adhibet, Lipsias ⁴⁰⁾ credidisse dicamus; at bonum hunc Imperatorem in hoc errasse turpiter, vel mediocriter geographiae peritus demonstrabit: vt itaque palam sit, R. P. *Gelasium* modica similitudine vocum, quae ipse semper est in amoribus, inductum assertionem suam soli coniecturae superstruxisse, cum scilicet non assequeretur, quid Porphyrogenneta per Bagibarias designatum vellet. Meminiisse profecto oportebat

⁴⁰⁾ Part. II. Annal. Hagecian. Praefat. II.

tebat Graecarum aurum, vt eleganter differit Bayerus,⁴¹⁾ tam admirabile fuisse fastidium, vt barbaros vocabulorum sonos non ferrent. Itaque seu noua nomina gentium, locorum, hominumque e lingua sua effingebant, seu barbara ita ori aurique Graecae aptabant, vt vix tenue remaneret vestigium, unde essent ducta. De ea consuetudine Plato in Cratyllo disputat. Is quoque in Timaeo vocabula Atlantici sermonis retinere non audet, nisi Graece enunciata. Sed vaga fuit enunciandi talia lubido, nullis definita praeceptis, vt in primis e Persicis, et Medicis, et Armenicis nominibus intelligi potest.

Quare cum certum sit, valde saepe Graecos, recentiores maxime, in nominibus idiomatis exteri proferendis aberrasse, quidni idem de Porphyrogenneta statuamus, cum valida nobis sint argumenta, quibus per Bagibarias, Babios montes, seu Carpathicos intelligi debere euincamus? ultra Turciam et Bagibarias prope Franciam habitabant Chrobati. Si itaque in locum, vbi Porphyrogenneta scriperat, Constantinopolim obtutum defigamus, intelligemus, ultra Hungariam et Carpathum prope Franciam habitasse Chrobatos. Quodsi vero scriptor Bauariam designauit: tum profecto ultra Hungariam penes Bauariam Chrobatos habitasse scribere debuisset. Nam ultra Bauariam non Slavi, sed Thuringi, Saxones et Franci sedes habuerunt, quod neque R. P. Gelasius negare videtur, cum eos in Bohemia, quae ad latus Bauariae adiacet, collocet; quae autem contra Carpathicos montes protulerat, suorum immemor dictorum videtur protulisse. In Prodromo enim Annalium Hagecianorum⁴²⁾ Caruatas a Carpathicis

41) Comment. Acad. Petropol. priscis sed. Scythar.
Tom. I. in Dissert. de Orig. et 42) Pag. 57.

cis montibus afferit appellatos. Quomodo vero, si in Bohemia sedes habuerunt, a Carpato nomen accepere? Etiamne in Bohemia mons Carpatus? nisi R. P. Gelasium montem mutasse dicamus, atque tum, cur istud fecerit, et hanc priori praetulerit opinioni, solidiores rationes adferre debuisset. Haec vero omnia maximum robur ab iis accipiunt, quae Porphyrogenneta alio loco enarravit:⁴³⁾ *Magna autem Chrobatia, quae etiam Alba cognominatur, in hodiernum usque diem sine baptismo est, quemadmodum et finitimi Serui: equitem, peditemque non habet tam numerosum, quam baptizata Chrobatia, quippe frequentibus incursionibus infestata Francorum, Turcorum, Patzinacitarum, neque sagenas, neque conduras item, aut nauigia ad mercatum habet, utpote a mari remota: a quo quidem triginta dierum itinere distat, illud est, quod Nigrum appellatur.* Ex his enim patet, Chrobatis non modo Francis, atque Turcis, verum et Patzinacitis, hodiernae Transiluaniae tum incolis, vicinos fuisse. Non potuissent autem dici Patzinacitis vicini, si ultra Bauarium habitabant. Quis itaque non videt, Chrobatis, cum accolae Patzinacitarum dicantur, ad Carpatum, quo ab his dirimebantur, incoluisse? nisi quis affirmare velit, Patzinacitas Chrobatorum fines deuastatos per Turciam exercitus ductitasse; quod per me credat, qui volet, mihi certe nemo persuaserit. Habebant igitur sedes suas Chrobari, ut ex adductis elucescit, in Polonia, Silesia, et Morauiā, atque fortassis etiam in extrema Bohemiae, quae in septentrionem spectat, parte: nam vltiora eiusdem ab illis inhabitata, quidquid alii sentiant, negamus propterea, quod Serbos ibi, atque in vicinis regionibus, hodierna Lusatia, Misnia etc. consedisse, vt affirmemus, multis inducimur: Porphyrogenneta Seruios scribit vltiora Tur-

cias

⁴³⁾ De Admin. Imp. cap. 31.

ciae incoluisse, in loco Boici ab illis nuncupato, cui finitima est Francia, vti et magna Chrobatia: quae cui loco aptius conueniant, quam ei, quem olim populus Gallicus, Boii, occupabant? Nam etsi Boiorum regio, Boiohemum, Boiemia, Boemania, et aliis diuersis a voce Boici nominibus diceretur: nihil tamen obstat, ne vocem hanc, vt priorem Bagibariae, aut a Porphyrogenetta, aut, quod verisimilius est, ab ipsis Sorbis, quia Porphyrogenetta addat, locum Boici ab illis nuncupari, corruptam esse dicamus. Accedit, quod auctor Chronicus Boleslauiensis, de Czecho scribens, Serbicae, non Bohemicae linguae mentionem facit. Sed cum hunc locum, iam ante nos ipse Serenissimus Princeps in suo doctissimo opere Vindiciis Lechi et Czechi solide tractauerit, ipsum exscribamus; sic autem habet: ⁴⁴⁾ *Rectius nostro quidem iudicio Bohemi scriptores facturi erant, si maiores suos origine Serbos, seu Srbos dictos, deinde etiam Sorabos, et post migrationem in Dalmatiam Seruios, fuisse, afferuissent, vt quos etiam e veteribus suis ad Wolgam sedibus probabilissime excessisse, ex Procopio, Porphyrogeneta, et Pachymere colligi diximus, ac Bohemis fuisse vicinos, sitos ad septentrionem, et occidentem, nullum est dubium. Coniecturae huic nostrae occasionem praebuit Chronicus Boleslauiensis, nescio, cuius auctoris, a Bohemis tamen scriptoribus frequentius adductum, in quo haec leguntur.*

Wſrbskey gaziku gest zemic
 Gez Charwati gest gmie
 Wte zemi bieſſle Lech
 Gemuz gme diegich Czech etc,

K 2

Latine.

44) Part. I. pag. 70.

Latine. In Srbica lingua est terra,
 Quae Charwatiae appellata est,
 In hac terra fuit ingenuus iuuenis,
 Is nomine dictus est Czech.

Cur autem, oro, Bohemus scriptor de origine Slauorum suorum Srbicam linguam, non Bohemicam nominauit? Cur, inquam non scripsit, vt Bömskey, seu Czeskey? Cur non etiam, quod proinde fuisset, vt Potskey, Ruskey, Wiltzkey gaziku, seu in lingua, vel etiam ratione, nam in Slanico idem denotat, nec contra rem nostram facit, Polonica, Russica, Wilzika etc. cum et istae linguae sint Slauicae? Ego quidem arbitror, auctorem illud eo consilio fecisse, vt ostenderet, linguam Bohemicam esse origine Srbicam, et ipsos Slauos Bohemiae fuisse origine Serbos, postea autem et libere ab ipsis Bohemiae Slauis Serbis assumptum fuisse nomen Czesky, quo se, vt regio ne ipsa, ita et nomine distinguerent a Sorabis. Neque diversa ab iis, quae de Chrobatis supra diximus, idem Serenissimus Auctor sentit, cum referens verba Porphyrogenetae: Caeteri vero Chrobati versus Franciam, inquit, 45) per quos opinor recte non modo Moraui, et Bohemi, sed etiam Slavi minoris saltem Poloniae designantur. Satis itaque constat, Chrobatos et Seruios regiones, quas nunc Poloni, Moraui, Bohemi, Lusati etc. colunt, habitasse, hisque desertis, Heraclio imperante, anno 638, quem cum auctore Seriei Chronologicae, cum certus erui nequeat, verosimillimum esse putamus in Illyricum concessisse. Neque hanc primi sententiam tuemur, multos iam illa et lapsis seculis, et praesenti numeravit patronos. Idem tradidit, et si nonnulla erronee, Thomas, Archidiaconus Spalatensis, scriptor seculi XIII. cuius verba, vt illa ex

Affe-

45) Part. I. Vindic. pag. 89.

Affemano desumsimus, ⁴⁶⁾ adnumeramus: Gothorum ⁴⁷⁾ tempore, qui Totila duce de partibus Teutoniae, et Poloniae exierunt, dicitur Salona fuisse destruta. Et post pauca: Venerant de partibus Poloniae, qui Lingones appellantur, cum Totila septem vel octo tribus nobilium: hi videntes, terram Croatiae aptam sibi fore ad habitandum, quia rari in ea coloni manebant, petierunt, et obtinuerunt eam a Duce suo. Remanentes ergo ibidem, coeperunt opprimere indigenas, et ad suum seruitium subigere violenter. Et post pauca: Coeperunt autem habere proprios duces, et quamvis prauis essent, et feroce, tamen Christiani erant, sed rudes valde: Ariana etiam erant labe respersi. Gothi a pluribus dicebantur, et nihilominus Slavi, secundum proprietatem nominis eorum, qui de Polonia, seu Bohemia venerant. Crantius, referente iterum Affemano, ⁴⁸⁾ etiam scribit: Sluos regionem suam ab omni memoria ad Sarmaticos campos tenuisse: et quum angustae eis essent sedes in Polonia, Bohemia, Russia; nouas a Constantino Magno in Pannonia impetrasse, indeque imperante Mauricio in Dalmatiam et Illyricum profectos esse. Male tamen Vandalos cum Sluis commiscet, illi enim, non hi, sedes a Constantino Magno in Pannonia impetrarunt: caetera recte. Cromerus etsi totus non sit pro nobis, cum neget, e Polonia et Bohemia Sluos in Dalmatiam et Illyricum venisse: Potest enim, inquit, ⁴⁹⁾ probari e Procopio, et Sabellico, Thraciam et Macedoniam, velut viciiores, ab iis prius, quam Illyricum, et Istriam vexatas esse; e Polonia vero et Bohemia proficiscentibus hae regiones prius se offerunt, quam illae; tamen manifestum esse ait, neque e Croatia, neque e Pannonia Sluos populariter

K 3

im

46) Tom. I. orig. Slav. Eccles. pag. 7.
Part. II. c. 7.

47) Hist. Sax. Pontif. et Spal.

48) Loc. cit. cap. 5.

49) L. I. Hist. Pol.

in hanc oram, sed e septentrionali inter Vistulam et Borysthenem plaga aduenisse. Eandem sententiam amplexus est Pragus, multis locis idem affirmat Assemannus, nonnihil meque Auctor Seriei Chronologicae, qui praeter quam quod istud saepissime inculcat, ad an. 638 fuse non minus ac docte de his egerat. In eandem rem citat R. P. *Gelasius Blondum, Bonfinium, et Besoldum, Blondus*, inquit,⁵⁰⁾ *multis idem ostendit, ac dein subiungit: Sueropilo Dalmatiae Regi subdita Slavorum gens, quam a Bohemiae Germanis, id est Germaniae incolis, originem habere ostendimus.* In margine notatur Liber 3. Reliquorum autem verba non adducit. Sed qua decade, tres enim scriperat, ista Blondus habeat, fatemur nos ignorare; nam nequidquam quaeſiuimus: nisi tamen fallimur, Bonfinio sunt haec adscribenda, qui, diuerſe tamen aliquantum ab iſtis, ita habet:⁵¹⁾ *Sueropilus Dalmatiae Rex, atque gens Slavorum illi subdita, quae a Bohemis Germaniae genus deduxit, tunc primum Christi fide initiata est.* Quid? quod Blondus hanc sententiam defendat quidem, aliis tamen ac citatis vtatur verbis: en illa:⁵²⁾ *Nec tamen omnis illa gens (Slavica) reliquit primas ad Danubium sedes, quin iidem mutato nomine magnam obtinent partem illius regionis, siquidem locutionis similitudo, ac pene proprietas ostendit, eos, qui nunc Poloni et Bohemi dicuntur, ex Slavorum reliquiis fuisse. Incoluerunt autem prius, ut supra diximus, ea loca Vandali, quos credendum est, quando ad Romanorum inuadendas provincias sunt profecti, partem gentis in patria reliquisse. Quare Slavi paullo post superuenientes ita locutiones commiscuerent, ut ex utraque tertiam effecerint, quae pro regionis et*

Ducum

⁵⁰⁾ Part. II. Annal. Hagec. pag. edit. Hanov. an. 1606.

^{16.}

⁵²⁾ Dec. I. Lib. VIII. pag. 115.

⁵¹⁾ Dec. I. Lib. X. pag. 151. edit. Basil. an. 1531.

Ducum diuersitate, partim Bohemica, partim Polonica postmodum sit dicta. Sunt etiam certiores proximis in regionibus Slavorum reliquiae apud Saxones, quorum Coloni maiori ex parte puram habent, qua Dalmatae nunc utuntur, Slavonicam locutionem. Et alibi:⁵³⁾ Facta autem est postmodum alia in dictis gentibus mutatio, siquidem Vandali, a fluvio regionis sic dicti, paullo post quam illi, quos Stilico concitauit, patria erant profecti, et se Sluos dixerat a nomine gentis, quae a Bosporo Cimmerio in Tanaim fluuium habitare solita, se contulit in sedes Vandalorum Burgundionumque, patria prosectorum. Nec tamen diu tenuere hi populi eam Slavorum nominationem: sed cum eorum pars Mauritiis Imperatoris temporibus in Dalmatiam Illyricumque emigrasset, qui manserunt domi, paullo post mutarunt nomina, et partim se Polonos, partim Bohemos nominauere. Quae nos credere faciunt, R. P. Gelasium nominatos auctores non inspexisse, atque ex alio quoipam auctore exscripsisse.

Nec alienus ab istis erat Balbinus, cuius locum, longiusculum quidem, atque paullo fusiorem, tamen ut patet fiat, eum non adeo, ut quidam volunt, semel assumatis adhaesisse, quam ea, dummodo auctor aliquis vetustior fideique probatae doceret aliud, deponeret, describemus: Sabellicus, ait,⁵⁴⁾ diserte scribit, in secunda Slavorum migratione, Sluos a Cimmerio Bosporo per Tanaim, et Maeotidem paludem, ut etiam Vadiano et Decio aaductis Goldastus existimat, bipartito digressos, partem unam ad dextram deslexisse, scissamque esse in duos populos, Bohemos et Polonos, alteram transmisso Danubio, secundum suum annum ad Dalmatiam usque sedes tenuisse, nihil mutato nomine; Blondus vero, et Crantius tradunt: Sluos e Polonia demum

53) Dec. L. Lib. I. pag. II.

54) Miscel. Hist. Dec. I. Lib. II.
cap. 9. pag. 27. 2.

demum et Bohemia profectos orientales illas Romani Imperii prouincias inuasisse. Ego non magnopere pugnabo, modo suum Czecho et Lecho aduenientibus tempus tribuatur, de totius antiquitatis consensu. Dresserus Slauos Illyricum, et mari Adriatico propinquas oras, Iustiniano et Mauritio Imperatoribus, inuasisse tradit. Congruit Rhenanus, aitque, sed tempus non addit, Slauos, cum finitimiis saepe venissent auxilio, terrae melioris occupandae gratia tandem populariter transeuntes in Illyrico consedisse, et ex his partem aliquam, deinde Bohemiam, et regionem proximam, quam a fluvio Marauaha Marauaniam appellant, occupasse. Nam Marcomanni cum Hermunduris iam pridem in Noricum et Vindeliciam transferant. Citatur in hanc sententiam et Suidas. Idem sensisse postea videtur Bonfinius, cum Slauoniam Vngaricam Bohemorum coloniam appellat. Clarius id expressit alio loco: Slavi, inquit, e regionibus transistrianis (Bonfinio scribenti trans, nobis cis Danubium, ex nostra videlicet ripa) promanarunt, atque Istriam, et Dalmatiam occuparunt, eamque a se Slauoniam dixerunt. Primas sedes, pergit Bonfinius, trans Danubium non reliquere: ex quibus Bohemi, Poloni, Amaxobii, sive Rutheni, et Roxolani adhuc permanent. Videat Lector Bonfinium clare docere, constituta iam Bohemia in his nostris sedibus, Bohemos nostros coloniam duxisse, et Slauoniam prouinciam fundasse, ac populo impleuisse. Idem, vt ante dixi, habet Crantius, et Blodus, et Vngarici plerique scriptores, ac fere omnes, qui de Slauonia egerunt, ipsique incolae ex maiorum traditione a Bohemis se ortos gloriantur. Besoldus id factum esse putat anno Christi 526; citatque in eam rem Sabellicum; at Sabellicus de secundo in has oras Slavorum aduentu loquitur, non de Colonia Bohemorum. Crantius annum ponit 583, quo Bohemi in Dalmatiam e Bohemia transuerint. Chronicon Mundi incerti

incerti auctoris A. C. 1492 Noribergae typis expressum de Dalmatis agens diserte adiicit: Slauos Dalmaticos e Bohemis ortos; annus, quo id gestum sit, non additur. Haec Balbinus. Ne tamen plane fidem his adhiberet, credo eum absterruisse, quod Czechum, quem acerrime tuebatur, sibi eruptum iri praeuidebat. Atque istud multos etiam hodie deterret. Cum enim Czechus tradatur cum caeteris Slavis in Bohemiam e Croatia aduenisse, nos vero doceamus, nec Slauos ibi tum fuisse, nec id nomen adhuc existisse: Czechum, nisi nobis contradictant, se non seruatuos opinantur; et licet regionem, e qua Czechus venerit, nondum Croatia fuisse appellatam confiteantur, errorem tamen facile excusatum iri confidunt, dum haec per prolepsin dicta esse, et pro Croatia aut Dalmatiā, aut Illyricum reponi debere afferunt. At si semel, ea quae Porphyrogenneta habet, admittantur, omne dubium euaneat. Nam et Croatia, ne ad eam, quae sic posteriori tempore est appellata, recurrere opus sit, vnde suum Czechum deducere valeant, habebunt, et traditionem non violatam conseruabunt. Quodsi vero nobiscum sentire detrectauerint, tum eum, quem protracturi sumus, et qui nos premit vehementer, tollant scrupulum. Chrobati et Seruui paullo post ab aduentu suo, quod supra e Porphyrogenneta retulimus, anno, vt credunt non nulli, 641 sacro lauacro sunt initiati; si vero Bohemi sunt Chrobatorum et Seruorum coloni, qui factum est, vt Borziuoius primus Bohemorum anno demum 874, cum illi annis iam 233 ante Christiana sacra colerent, baptizatus fuerit? Alii contra sunt, qui per Bagibarias montes quidem intelligi debere affirment, alios tamen a Carpaticis sibi effingant. Serbos autem et Chrobatos e Carentania

L

in

in Illyricum deducunt, sed quam improuide, e Porphyro-
genneta, quem male in suas trahunt partes, ostendamus.
Principatu, narrat ille,⁵⁵⁾ Seruiae a patre ad duos fratres
deuoluto, alter, sumta populi parte dimidia, ad Romanorum
Imperatorem Heraclium configuit: qui, eo excepto, locum ad
inhabitandum dedit in Thessalonicae Themate, qui ex eo tem-
pore Seruia nuncupatur; aliquanto vero post vijum est Seruiis
in terram suam redire; et dimisit illos quoque Imperator;
sed quum traieciissent Danubium flumen, poenitentia duici,
per Praetorem, qui tunc temporis Belgradum administrabat,
ab Heraclio Imperatore petierunt, aliam sibi terram ad in-
habitandum assignare vellet. Itaque Seruii ut in terram
suam peruenirent, flumen Danubium superare debebant.
Quis vero, nisi geographiae valde imperitus, affirmet, ex
Illyrico in Carinthiam proficiscentibus Danubium occur-
rere? Igitur neque eorum opinio, qui Chrobatos et Ser-
uios in Carinthia ante emigrationem collocarunt, potest
tolerari. Solent praeterea aduersus nostram opinionem
et haec adferri: cum pars illorum Slavorum, aiunt isti,
qui inter Albim et Salam habitarunt, Delmantii, Dale-
minci, et Dalmatae dicti sint, nomen istud secum e Dal-
matia, vbi prius federunt, videntur attulisse: *Illyrici*
Prouinciae, inquit noster Farlatus,⁵⁶⁾ *Dalmatia et Chro-
batia censemabantur, quas itidem prouincias insederunt Slavi,*
*e quibus deinde pars secessit, migravitque in Bohemiam, ter-
rasque finitimas inter Albim et Vistulam interiebas.* Horum
autem aliquos fuisse existimo, qui ex ea, unde discesserant, in
eam, ad quam venerunt, regionem, *Dalmatiae nomen intu-
lerint, praesertim cum ex indigenis Dalmatis non defuerint,*
quos

55) De Admin. Imper. cap. 32.

56) Tom. I. Illyr. sacri pag. 118.

quos vel mutandi soli cupiditas, vel inita cum Slavis affinitas et consuetudo perpulerit, ut se illis Bohemicae migrationis socios adiungerent. Cui, caeterisque doctissimum P. Pray responsum opponimus, qui cum adductum locum recitasset, subiecit: *Eam*⁵⁷⁾ *ob rem Dalmatas potius dicendos ex Mss. duobus codicibus, Aurspergensi et Labacensi, ut sunt apud Ludovicum Schönlebium, contendit: obrepisse igitur errorem Witichindo, qui Dalmantiam scribit, et Chronico Alberstadensi, quod Delmantiam habet. Assemano contra posterius magis probatur. Laudatum enim Farlati locum pertractans; caeterum, inquit, vero proprius videtur, Dalmantiam, Dalmanciam, Daleminciam, depravatione vocabuli in Dalmatiam, seu Delmatiam, apud recentiores scriptores migrasse, quam vice versa Dalmatiam in Dalmanciam seu Daleminciam; idque auctoritate Witickindi, tum Chronicis Alberstadensis, vetustioris utique monumenti, quam Aurspergensis, et Labacensis Ms. codex forte sit, nititur euincere. Plane Assemano assentior, quod verisimilius sit, Sluos Dalemincios ex ea plaga, quae ad Vistulam est, quam ex Dalmatia in Misniam venisse, et forte Vinidorum Slavorum partem fuisse; nam hi quidem Misniam olim quoque colebant, vt in secunda Annalium parte a nobis commonstratum est. Caeterum, quod a neutro obseruatum fuisse miror, Daleminciorum nomen Germanis suam originem debet. Witichindus enim, ubi Henrici, nondum Germaniae Regis, expeditionem viuo Ottone patre Saxonum Duce in finitos Sluos suscepit describit, ita diserte memorat; Is (Henricus) a patre suo in prouinciam, quam nos Teutonice Daleminc, Slani autem, Isomaci appellant, cum magno exercitu missus, deuastata eadem atque incensa, vicit rediit.*

L 2

Restat

57) Annal. Tom. I. Part. III. pag. 354.

Restat iam, vt Crubisichii quoque de Serbis sententiam, nullo veterum recentiorumue testimonio nixam, ceu nouam argumentis configamus. Enim uero credit ille, Getas, quos eosdem cum Gothis esse defendit, Slauos fuisse, Zarabosque appellatos, atque ab his Sorabos demum ortos. Ita enim scripsit:⁵⁸⁾ *Hi autem Getae olim Zarabi vocabantur: Ita Iornandes primum Zarabos Tereos, deinde vocatos Pileatos; a quo nomine postea Sorabi et Serbi dicti sunt. Zaraba enim, vel Zarapa Slauonica vox est, et calceamenti ex filo facti genus designat.* Argumenta, quibus Getas Slauos esse, visus sibi est demonstrauisse, adeo tenuia sunt, vt, si modicam vocis Bellagines,⁵⁹⁾ qua Gothi, teste Iornande,⁶⁰⁾ leges appellabant, quam cum Slauica Vladiane habet, tollas similitudinem, atque, quos adduxit, Graecorum scriptorum verba explices, totum id, quod iis firmauit, proruas, et proturbes. Verum cum haec referre, nostra nihil intersit, (quem enim nunc reperias, qui, Gothos Slauici generis fuisse, cum Crubisichio aliisque rerum Slauicarum imperitis adstruat?) ad reliqua nos conuertamus. Aio itaque, Crubisichium aut non intellexisse Iornandem, aut mala fide verba eius corrupisse. Locus enim Iornandis is est:⁶¹⁾ *Vnde et pene omnibus barbaris Gothi sapientiores semper existiterunt, Graecisque*

⁵⁸⁾ In Disquisit. in origin. Alphab. Glagolit. p. 30.

⁵⁹⁾ Ad melius penetrandam vim vocis huius opponam notulam, quae in hunc locum editionis a Muratorio factae est adiecta: *Garetius notat, Bellaginas Gothicam vocabulum esse nemo mihi persuaserit,*

sed ex Gothicō corruptum. Id vero fuisse crediderim Vuel - bagen breuitatis causa ita contractum a Wel - behagen, quod significat bene placitum; ita ut bellagines mea quidem sententia nibil aliud sint, quam placita Principum. B. Vulcan.

⁶⁰⁾ De reb. Goth. cap. II.

⁶¹⁾ De reb. Goth. cap. 5.

cisque pene consimiles, ut refert Dio, qui historias eorum, annalesque Graeco stylo composuit. Qui dixit primum Zarabos Tereos; deinde vocatatos Pileatos hos, qui inter eos generosi exstabant: ex quibus eis et Reges, et sacerdotes ordinabantur. Ex quibus patet, non omnibus, sed generosioribus tantum, et Regibus, atque sacerdotibus id nomen fuisse attributum; et de sacerdotibus clare istud alio loco iterum affirmat, atque cur nomen illud eis sit, edocet: Elegit namque, inquit,⁶²⁾ Diceneus ex eis tunc nobilissimos prudentiores viros, quos Theologiam instruens, numina quae-dam et facella venerari suavit, fecitque sacerdotes, nomen illis Pileatorum contradens, ut reor, quia capitibus opertis tiaris, quos pileos alio nomine nuncupamus, litabant: reliquam vero gentem capillatos dicere iussit, quod nomen Gothi pro magno suscipientes, adhuc hodie suis canticibus reminiscuntur. Cum itaque vox Zarabi pileatos, Slavicum vero Zarapa calceamenti ex filo facti genus designet; inde Sorabi appellari non potuere. Vnde vero hoc nomen eis adhaeserit, iam ante nos alii demonstrarunt. Huc accedit, quod in exemplari, a Muratorio ex codice Ambrosiano exscripto, et luce publica donato, hic locus aliter legatur, atque pro Zarabi Terei vox Tarabostes occurrat: ut refert Dio — qui dixit primum Tarabostes, deinde vocatos Pileatos. Cum haec igitur, quae Crubisichius de Serbis attulerat, pugnat cum testimonii veterum, nullamque similitudinem veri habeant: neminem credimus futurum, qui opinionem eius sequi velit et amplecti.

Nunc quid de Wilzis alii, nosque sentiamus, proferamus. Sedes illos ad Vistulam habuisse, afferit Altin-

L 3

gus.

62) Ib. cap. II.

gus. ⁶³⁾ Constat enim, eos ad mare Balthicum, atque prope Viadrum sedisse. Primum ex Saxone Poeta liquet, qui de illis haec cecinit. ⁶⁴⁾

*Gens est Slauorum, Wilci cognomine dicta,
Proxima littoribus quae possidet arua supremis,
Iungit ubi Oceano proprios Germania fines etc.* ⁶⁵⁾

Alterum ex Helmoldo, ⁶⁶⁾ Alter, inquit, fluuius, id est, Odora vergens in Bonam, transit per medios Vinulorum populos, diuidens Pomeranos a Wilzis. Et paucis interiectis: Altera insula longe maior est contra Wilzos posita, quam incolunt Rani, qui et Rugiani, gens fortissima Slauorum. Ex cuius insulae situ facile Wilzorum sedes determinantur. Qui vero populi, et quamobrem hoc nomine sint compellati, eodem loco nos edocet: Kyzini, ait, et Circipani cis Panim Tolenzi, et Rhedari trans Panim habitant. Hi quatuor populi a Fortitudine Wilzi, seu Lutici appellantur. Et fortassis iidem sunt cum illis, quos Ptolomeus ⁶⁷⁾ Veltas, sinusque Venedici incolas dicit: Venedici sinus, inquit, reliquum iuxta Oceanum habitant Veltae. Quod tamen, si quis contra dicat, defendere nolim, cum praeter similitudinem nominis, atque situm penne eundem, nihil aliud habeam, cui innitar. Sed de illorum migrationibus variant auctorum sententiae: credunt nonnulli, eos cum caeteris Slavis Bohemiae et Poloniae ex Illyrico in has oras emigrasse, sed si vere, ostendimus.

63) In Descript. Agri Bataui et Frisi Part. II. p. 207.

64) Lib. II. apud du Chesne Hist. Franc. script. Tom. II. pag. 152.

65) Ibidem adnotat Reiner. Reineccius: *Iudem qui Germanica lingua hodie Wenden, nec discernendi ab iis Winidae apud Iornandem.*

66) Chron. Slau. Lib. 3. cap. 2.

67) Geogr. Lib. III. cap. 5.

mus. Alii contra, Wilzos, cum sedes, quas ad Balthicum habebant, deseruissent, primum in Batauiam, non tam vna migratione, et demum Westphaliam concessisse affirmant. Ioannes de Beka refert,⁶⁸⁾ in Batauiam eos penetrasse, ibique euersa vrbe Antonina aliam anno Christi 200 aedificasse, et Viltenburch nominasse. Demum vero, prosequitur, post longa tempora Vilti cum Frisonibus conspirarunt Rheni gurgitem transire, ac in manu forti totam Galliam expugnare. Valentinianus autem, vt Romana canit historia, XLVIII a Iulio Caesare Augustus, tumultum tam insultae plebis festina relatione praeripiens, coadunauit etiam valentem exercitum, accelerauitque rebellantem sibi disturbare populum. Et ecce Romanus Imperator rebelle vulgus victoriose subegit; classem magnam apprehendens Rheni fluenta transcendit, castrum Viltorum evertit, Pbrisiā primō subiecit, et exinde cum triumphali laude rediens, aliquantis annis gloriosius imperauit. Ex quo idem habent Ioan. de Leidis, et Reinerus; Snoius, atque, paucis exceptis, omnes scriptores Bataui et Frisiī idem tradunt. Quae de Traiecti initii referuntur, Wilhelmus Heda⁶⁹⁾ falsa esse, atque illud diu ante haec stetisse tempora, opinatur. Diuus enim, ait, Antoninus in suo itinerario meminit Traiecti: et alio loco: Quodsi sub Rege Dagoberto hoc nomen fuisse affecutum, iam non Traiectum vetus (nam illa aetate sic audiebat) sed nouum dicendum foret.⁷⁰⁾ Huc etiam referri potest Vorburgius, qui cum Ioannis de Leidis narrationem de Wilzis retulisset, addit: *Wiltos et Slauos anno Domini ducentesimo Antoninam Ciuitatem expugnasse, no-*

men

68) In Chronic. pag. 2. et 3. pag. 203.

69) Histor. Ep. Traiect. cap. 3. 70) Ibid. cap. 4.

men Latinum in Teutonicum mutasse, et sedes fixisse, quid combinatu difficultius. ⁷¹⁾ Ultraiectum vero putat Heda dictum propterea, quod ab Ulpio Traiano Augusto fuerit restauratum; Quare, concludit, ⁷²⁾ *Traiectum Ulpium potius, quam Viltorum dixerim. Viltos enim, qui et Slavi, seu Veletabi dicuntur, vna cum Saxonibus iunctiones illic fecisse non abnegamus, sed pedem fixisse inficiamur.*

De eorundem porro in Westphaliā incursione multis agit Neuwaldus: *Haec itaque, scribit inter caetera, tanta diuersarum gentium (Slauicarum) multitudo, ubi antiqua illa Germania ad Albim usque potita esset, trans Albinum etiam in Saxoniam suas deducere colonias molita est. Quae res primum non processit, fortiter Carolo Magno eiusque aliquot posteris ipsos propulsantibus, ad extremum tamen non tantum in Saxoniam eorum agmina infusa, verum etiam pubes in Westphaliā penetrauit, Saxoniae bonam partem eos tenuisse nemini ignotum est, et satis testantur reliquiae, passim in agris Luneburgensis ditionis, et Marchione dispersae, Vendorum nomine in hunc usque diem nuncupatae. Westphaliae etiam agros ab iisdem cultos, partium nostrarum est, cum ad institutum pertineat, ut diligentius exquiramus ac comprobemus. Initio vero non in eius meditullia irrupisse, sed in ora ad ripam Visurgis, quo haec a Saxonia discriminabatur, confessisse, argumento est, quod in Comitatu Lippiensi pagus Vendorum prope dictum limitem iacet. Qui tametsi linguam diuturnā consuetudine vernaculam mutarint, usitataque nostris utantur, aliquid tamen innatae illius feritatis et barba-*

71) Hist. Pol. VII. pag. 57.

72) Loc. cit. cap. 4.

73) De Antiq. Westphal. Col.

cap. 17. pag. 69.

barbariei, de qua Bonifacius Moguntiacus Episcopus, cum ait: Vendos foedissimum genus hominum reprecentant. Tantam praeterea nobilium Vendorum ait in hoc Comitatu fuisse amplitudinem et potestatem, ut Lemgouiae, et via, et porta nomen ab illis obtinuerint; et portam quidem in hodiernum diem Slavorum (portam die Sclaves-Porte) appellari. Evidem a Vilzis, quod vehementi odio Germanorum laborarent, Frisos, Batauos, Saxones, aliasque additas nationes fuisse infestatas, negare non ausim, cum id, praeter recentiores, veteres etiam, Eginhardus, Regino, Monachus Engolimensis, aliqui scriptores anonymi⁷⁴⁾ testatum reliquerint; quae tamen seculo octavo, et subsequentibus contigisse, minime vero ante eam aetatem, qua Slavorum nomen nondum audiebatur, illique sedes suas tranquille tenebant, defendimus. iuuat verba illorum referre. Slavi, narrat Regino ad annum 789, quos Vendos et Wilzios appellant, vastant Magdeburgum, et vicina loca; ideo Carolus, per Saxoniam et Albiam veniens, ponte constructo, in Wilzios mouet, quibus auxilio venerunt Frisones per Huelam flum, Slavi vici se dedunt, et obsides offerunt. Eginhardus vero ad annum 808. Quia nunciabatur, inquit, Godofredum Regem Danorum in Abotritos cum exercitu traieciisse: Carolum filium suum ad Albiam cum valida Francorum et Saxonum manu misit, iubens, vesano Regi resistere, si Saxoniae terminos aggredi tentaret. — Erant cum Godofredo in expeditione praediela Slavi, qui dicuntur Wilzi. Qui propter antiquas inimicitias, quas cum Abotritis habere solebant, sponte se eius copiis coniunixerunt,

74) Apud Du Fresne script. Hist. Franc. Tom. II,

runt, ipsoque in regnum suum reuertente, cum praeda, quam
in Abotritis cepere, et ipsi domum regressi sunt. Ad annum
vero 810 haec habet: Imperator, Aquisgrani adhuc agens,
et contra Godofredum Regem expeditionem meditans, nuncium
acepit, ducentarum nauium classem de Nordmannia Frisiam
appulisse, omnesque Frisiaco littori adiacentes insulas esse
vastatas, iamque exercitum illum in continenti esse, terna-
que paelia cum Frisonibus commississe, Danosque victores
tributum viciis imposuisse, et veſtigalis nomine centum ar-
genti a Frisonibus esse solutas, Regem Godofredum domi es-
ſe — Congregatis tandem copiis, quanta potuit celeritate
ad Alaram fluuium contendit (Imperator), caſtrisque iuxta
confluentem eius, quo Wisarae fluuiio coniungitur, positis,
minatum Godofredi Regis praefolatur aduentum. Nam Rex
ille, vanifima ſpe victoriae inflatus, acie ſe cum Imperatore
congredi velle iactabat. Sed dum Imperator memorato loco sta-
tiua haberet, diuersarum rerum nuncii ad eum venerunt:
nam et classem, quae Frisiam vastabat, domum regressam,
et Godofredum Regem a quodam satellite ſuo interfecitum,
caſtellumque vocabulo Hochbocki, Albiae flumini appositum, a
Wilzis captum. Quod tamen anno ſequenti deuastatum
deſeruerunt. Nam vt idem Auctor ad annum 811 refert:
Imperator pace cum Hemmingo firmata — in tres partes
regni ſui totidem misit exercitus. Vnum trans Albiam in
Linones, qui et ipſos vastauit, et caſtellum Hochboki, ſupe-
riori anno a Wilzis deſtructum, in ripa Albiae fluminis re-
ſtaurauit. Quare ſi haec legerat, (et legere debebat) Al-
tingus; miror, cur Slauos ir. Saxones nunquam incurriſſe
afferuerit? An vero ſit in eo reprehendendus, quod illos,
qui Bekae opinionem de exstructo a Wilzis Wiltenburgo
ſequuntur, rideat, nolim affirmare, cum multa ſint, quae
pro

pro Bekae sententia decentent. Quanquam sunt etiam nonnulli, qui Wiltenburgum non quidem a Wiltis seu Wilzis exstructum esse, sed a loco, in quo olim fortassis Viltzi aut longiori tempore federint, aut castra tantum metati fuerint, dicant nomen traxisse. Nostra opinio est, scriptores illos, cum Wilzos quondam Batauiæ et Westphaliae fuisse incolas, atque castellum aliquod expugnasse et euertisse, traditione accepissent, nescirentque, cui haec aetati atque loco conuenirent, ut tanto nobiliores suos facerent, pugnas cum Romanis, atque euersionem Antoninae confinxisse. Sed his, cum sint tenebris aliquantum obuoluta, diutius immorari nolumus.

Vnum adhuc supereft: num Wilzi in Illyricum quoque sint profecti, quod sentire quosdam dicebamus, interque illos Altingum numeramus. *Slauos*, inquit, ⁷⁵⁾ *et in his Vilzos forte maxime ad Vistulam confedisse, atque in Pannonias, Illyricum, et Istriam sese effudisse satis constat.* At vnde? quis vetustus scriptor ista de Wilzis prodidit? enim uero, quantum rescire potuimus, nullus. Neque tamen, quin id fieri potuerit, repugnamus, cum Obo|itos quoque in Dacia habitasse, ex Einhardo intelligamus. *Caeterum*, scribit ad annum 824, *Legatos Abotritorum, qui vulgo Predenecenti vocantur, et contermini Bulgaris Daciam Danubio adiacentem incolunt, qui et ipsi ad-*

M 2

uentare

⁷⁵⁾ Loc. cit. pag. 207.

uentare nunciabantur, illico venire (Imperator) permisit.
Accidere enim facile poterat, vt Wilzos audientes, Serbos Chrobatosque et benigne ab Imperatore acceptos,
et fedes nouas obtinuisse, loci mutandi nouarumque
desiderium regionum caperet, seque Serbis, qui serius
regiones habitatas reliquerunt, socios itineris adiungerent.

QVAE

QVAE FVIT GENS
ADRIAM ACCOLENS
NEMPE VENETI

QVAM
POLYBIVS, STRABO, LIVIVS
MEMORANT
NEC LATINO, NEC GRAECO, NEC GALlico
SERMONE VSAM FVISSE
PRO ANNO 1772.

DVCIMVR OPINIONIBVS.

*Daniel Ehrenfried Springsguth, a Confiliis Aulicis Principi
Schwarzburg-Sondershausenis.*

*Quanquam haec dissertatio praemio non fuit ornata, tamen
Societas Iablonouia a Celsissimo Fundatore petiit, ut, propter
insignem doctrinam, singularem in laudandis auctoribus dili-
gentiam, et Latinitatem plerumque tersiorem, cum caeteris
excudi iuberet. Alii auctores Slauorum nomen latius pa-
tuisse, quam Venedorum, et Venedos Slauorum speciem fuisse
auctumant, hic Slauos speciem Venedorum fuisse affirmat.*



Hoc etiam anno Celsissimus S. R. I. Princeps I A B L O-
N O V I V S, Palatinus Nouogrodens. Spiritus St.
Eques auratus etc. hanc inter reliquas eruditis proposuit
quaestionem: quaenam fuerit illa gens ad Adriaticum ma-
re degens, quae priscorum scriptorum testimonio nec La-
tino, nec Graeco, nec Gallico denique sermone sit vfa.
Persuaderi mihi facile passus sum, vt aliqua ad hanc quae-
stionem dilucidandam ex suppellectili mea, quae quam
curta sit, non ignoro, in medium afferrem.

Quis enim tanto Principi placendi non summo stu-
dio flagret, qui non solum inter doctos seculi huius Vi-
ros praestantissimis ingenii dotibus et monumentis tan-
tum caput extulit suum,

Quantum lenta solent inter viburna cupressi;
sed qui etiam opes suas, incomparabili plane munificentia,
ad excitanda recta ingenia excolendasque bonas artes pro-
fundit, idque facit hoc insaustissimo suo tempore, quo
ex oppressa vastataque a peregrino et crudeli hoste pa-
tria vix tertiam accipit redditum partem. Vera nimi-
rum haec est munificentia, vt aliis prodesse possis, tuis
commoditatibus plurima denegare, et malle aliorum vtí-
litati, quam suis desideriis inseruire. Facit hoc Celsissimus
I A B L O N O V I V S, et vti tempus, studia, ingeniumque in
exco-

excolendis bonis literis, ita opes in iuuandis exornan-
disque eis collocat.

Lipsia igitur, imo Saxonia, hanc merito sibi gratu-
latur felicitatem, quod tam eximius Princeps, relicta pa-
tria, dissensionum et armorum strepitu concussa, vt Mu-
sis vacare possit, e tot regnis et prouinciis, quarum
Domini sanguine ei iuncti sunt, ipsam potissimum sibi
delegerit tranquillitatis secessum, quo vt diu et cum vo-
luptate animi fruatur, nosque vt diuturnam hanc felici-
tatem habeamus, omnium vota conspirant.

Sed euenit mihi, quod Horatio, qui de Diis et Heroi-
bus incipiens amores suos canit; de gente enim Adriati-
ca loqui volens, in merita optimi Principis excorro.

Condonabunt mihi hoc omnes, qui TABLONOVIVM
huius seculi Maecenatem noscunt, vel scripta eius lege-
runt.

Ad explicandam autem hanc de gente, ad mare A-
driaticum habitante, quaestionem, opus est, vt scrip-
tores antiquos, qui eius mentionem fecerunt, euoluamus.

Polybius edit. Ernest. pag. 170. 179 — 80 de iis
haec narrat: „Quod supereft deinde spatium ad Adriati-
„cum finum, aliis populus longe antiquissimus obtinebat,
„Venetos vocant: sermone diuerso a Gallis vtentes; ce-
„tera moribus et cultu similes. De his multam tragic
„poëtae mentionem fecerunt, multaque fabulantur.“

Facit hoc loco Polybius Venetos diuersam ab Etru-
scis gentem, qui tunc maximam earum regionum partem
obtinebant, diuersam etiam a Celtis, siue Gallis, alio-
que sermone vtentem, antiquissimam tamen.

Per fabulas tragicorum poëtarum innuere eum cre-
diderim ea, quae de Medea narrantur; quia Pola, aliaque
loca in Istria condita credebantur ab iis, qui ad perse-
quendam

quendam eam ab Aeeta missi erant, vti Strabo, aliqui tradunt.

De eadem gente etiam Liuius L. I. c. 1. eiusque origine ita tradit: „Casibus variis Antenorem cum multitudine Henetum, qui seditione ex Paphlagonia pulsū, et sedes et ducem, Rege Pylaemene ad Troiam amissō, quaerebant, venisse in intimum maris Adriatici sinum; „Euganeisque inde pulsī, qui inter mare Alpesque incolebant, Henetos Troianosque eas tenuisse terras. — „Gens vniuersa Heneti appellati.“

Patet ex hoc loco, aliam Venetorum siue Enetorum, aliam Troianorum fuisse gentem, sine dubio etiam sermone diuerso vsam, vti ex Polybio, et ex iis, quae iam dicenda sunt, discimus.

Legantur quoque quae Strabo	L. XII. et
Scymnus Chius	IV.
Curtius	I. III.
Solinus	c. 44.

hac de gente nobis reliquerunt.

His praemissis, circumspiciendum nobis erit, annoverui possit, quo tandem sermone gens illa priscis temporibus sit vsa. Cum autem litterarum monumentis careamus; hoc vnicum nobis supereft, vt ex appellationibus oppidorum, montium, fluuiorum, ad quos haec gens habitauit, ex ipsius denique gentis denominatione, vel Principum eius nominibus, coniecturam hac de re facimus, quae certitudinem quandam adipiscitur; si multa loca, in eadem regione sita, simul nullam aliam significationem admittant, quam quae in vna eademque lingua inuenitur, in reliquis autem linguis plane nihil exprimant, et in nullo vsu sint. Sic e. g. Roma, Neapolis originem Graecam ostendunt; sic apud nos Lipsia, Belgora, Lom-

N matium

matium conditores suos Venedos vel Slauos fuisse demonstrant. Hoc igitur si in gente, sinum Adriaticum incolente, effici etiam possit, ut nomina urbium, fluviorum, et montium, significationem in lingua quadam cognita habeant: tunc ad gentem ipsam concludere possumus, eiusque prima initia.

Gentem hanc Venetam fuisse appellatam a Latinis, Enetam a Graecis, omnes sciunt; quam a voce Chaldaea anati (vagari) Melanchthon et Bodinus deriuant, quasi diccas Nomades. Celsissimus autem TABLONOVIVS in Imper. Sarmatarum Norimberg. 1748. et in Dissertatione de Lecho et Czecho ostendit, a voce Sarmatica Venda (hamus) ita esse appellatam. Hinc forsitan antiqua traditio orta est, Venetiam a piscatoribus esse conditam, vel potius vera haec est eius origo, quia gens Venedica, ad littus maris habitans, e piscatione victum suum quaesuerit. Plurimi etiam tradiderunt, eam Celtarum fuisse sobolem, vti fusus Eccardus in Originibus, Celticoque siue Gallico usam fuisse sermone; quem tamen Plinius L. XXVI. c. 26. monstrat, diuersum fuisse a Venetico.

„Cum, Halus, ait, (herbae species) quem Galli „sic vocant, Veneti Cotoneam appellant;“ notandumque hic est, herbam, quae folia quasi lanugine obducta habet, a Venedis nostrae aetatis siue Slavis Kotowki vel Kotki, Herbariis Tribulus Virgilii et Plinii nap. p. 310 appellari, vti a Viro harum rerum peritissimo accepi. Vidi mus etiam iam Polybium, Liuiumque gentem Venetam diuersam sermone a Gallis declarauisse.

Prisci scriptores fere omnes hanc gentem ex Pa phlagonia deducunt; notum est illud Virgilii:

Antenor potuit mediis elapsus Achiis
Illyrios penetrare sinus, atque intima tutus
Regna Liburnorum et fontem superare Timaui.

Cuius

Cuius sententiae etiam Cornelium Nepotem fuisse, Plinius L. VI. c. 2. testatur. „Quo loca (sc. ad Cromnam in Paphlagonia) Henetos adiicit Nepos Cornelius, a quibus in Italia cognomines eorum Venetos ortos, credi postulat.“

Sunt, qui Germaniae populos eo pertinuisse contendant, vti Cluuerius Germ. Ant. facit, aliique, qui nimio erga patriam studio prouincias facili victoria occupant, de quibus occupandis progenitores ne cogitauere quidem, cum omnes antiqui scriptores consentiant, Danubium fuisse Germaniae limitem versus meridiem. Sunt tandem, qui suspicentur, Venetos eandem fuisse gentem cum Vendis siue Vindis (Wenden), qui iam late dominantur, vti Schoenlebenius in Carniola, aliique. Inter tam pugnantes sententias vt aliquid certi statuamus, videndum erit, an ex locorum nominibus, vti iam ex herbae Cotoneae appellatione, ad linguam gentis gentemque ipsam aliquid concludi possit.

Locus est apud Constantinum Porphyrogenetam de Administratione Imperii. c. 27. p. 84. „Sciendum, quod Veneti antequam traiicerent, inhabitarentque insulas, quas nunc inhabitant, Henetici nuncupabantur, et incolebant in continentibus has vrbes: Concordiam, Iustiniana, Nunum, et reliquas plerasque. Sciendum, Venetos nunc appellatos, qui olim Henetici dicebantur, cum traieciissent, munitam in primis urbem condidisse, in qua hodie habitat Dux Venetiarum, mari vndique circiter sex milliarium, quod influunt flumina XXVII. Sunt etiam insulae versus orientem urbis, in quibus Veneti nunc appellati oppida aedificarunt, puta Cogradum, ubi Metropolis magna est, Rhibalenses, Lillianum, Apfanum, Rhomatina, Licentia, Pineta siue N 2 „Strobi-

„Strobilus, Biniola, Boës, Elitualba, Litumancerses, Bro-
„nium Madaucum, Hebola, Pristena Clugia, Brundum,
„Phosaon Lauriton.“

„Sciendum, etiam alias esse insulas in Venetorum
„regione. Sciendum, etiam in terra firma Italiae regione
„etiam vrbes has Venetorum existere. Videlicet Capre,
„Neocastrum, Phines Aeculum, Aimanis magnum em-
„porium Tortzelorum, Muran Rhibantum, in quo residet
„Dux Venetiarum, et Cabertzentza.“

Quis non statim in voce *Cogradum* linguam Venedi-
cam agnoscit, eam dico, quam nunc Slauicam vocamus,
et quae non solum iisdem adhuc in regionibus, sed per
totam etiam Illyriam, Bohemiam, Poloniā, Mosko-
uiam in vsu est?

Grad vel Grod, vbiuis locorum occurrens, apud Ve-
nedos castrum vel locum iudicii significat; an vero sub
vocula Co non lateat Coni, id est equus, iam non dif-
quiro.

Rhibalenses in eadem lingua exprimit Piscatores vel
locum piscationis. Rhiba enim piscem indicat.

Bronium, nostris Venedis Brony, propugnaculum
significat.

Pristena etiam apud Slauos pausam vel locum com-
morationis exprimit, siue portum.

Pineta, quod a Venedis Pinecz scribitur, pecuniam,
vel monetam indigitat.

Boës, rectius Boii scribendum, pugnam vel certamen
exprimit.

Rhibantum etiam a Rhiba pisce potius, et ex lingua
Venedica deriuandum esse, quiuis mecum iudicabit.

Omittam reliqua, quae tam manifestam significatio-
nem in Venedica h. e. Slauica lingua non habent, siue ob-
scriptio-

scriptionis vitium, siue etiam, quod aliae gentes inter eos habitauerint.

Vrbes enim, quas Veneti, vti Porphyrogenneta dicit, Henetici antea dicti, in continenti habitabant, Concordia et Iustiniana, a Latinis ita esse nominatas, deductis forsitan eo coloniis, statim agnoscimus.

Patet ex hoc Porphyrogennetae loco, Venetos Adriae accolas et Venetiarum conditores tempore Attilae, eodem sermone esse vsos, quo nunc gentes Slaui dictae vtuntur. An vero antiquioribus quoque temporibus haec lingua apud gentes, quae littora maris Adriatici per Illyricum incolebant, in vsu fuerit, iam dispiciamus.

Liuius L. XLIV. c. 26. loci cuiusdam, Bylazora dicti, mentionem facit in bello, quod Romani contra Persen, Macedoniae regem, gesserunt, quae vox etiam apud nostros Venedos vel montem Album, vel Lacum album accurate exprimit, et cuius nominis vrbs in Misnia a Slauis condita, nempe Belgorau, etiam nunc supereft.

Dolci in dissert: de sermone Illyrico multarum gentium antiquarum nomina ex hoc sermone Venedico esse explicanda perspicue docet, quod etiam facit Orbini in Regno Dalmatiae.

Sic enim *Daurisii*, a voce Slauica Dagorci, significat eos, qui ad radices montium habitant, a voce Da, sub vel prope, et Gorci, hoc est montes.

Docleates putat Dolcius deriuandos esse a Diklici, quod Venedis est longinquus vel remotus.

Deredini, idem scriptor putat, scribendum esse Dresciani, et significare destructores aedium, a voce Dere, destruere, et Sciana, paries.

Siculotae descendunt a voce Sieckoczi *vel* Siekoczi,
quod indicat secantes.

Grabaei, rectius Grabgiani dicendi, fossores indicat,
vel etiam hamos rastratos.

Melita, huius maris insula, significat locum molendi-
norum a mliet, quod nunc etiam Slavis molendinum est.

Apud Strabonem in eisdem regionibus occurrit em-
porium Dalmatarum, Salo dictum.

Vox autem Salo nunc quoque pagum significat vel
vicum, et Delminium ipsum, a quo Dalmatae nomen ha-
bent, e lingua Slauica explicandum est, cuius nominis
Soraborum pagus in Misnia posterioribus temporibus inter
Muldam et Albim fuit, nempe Delminzi.

Ptolomaeus duorum locorum L. II. meminit, in hoc
terrarum tractu sitorum. Quorum unus *Crepса*, in aliis
exemplis *Gripса*, apud Slauos rapina est; alter *Curieta*
vel *Koritta* in eadem lingua alueum, vel etiam urbem, in
maris alueo sitam, indicat.

Nota est prisca vrbis *Salona*, quam Appianus de bello
Illyrico *Slanum* appellat, h. e. Salinas; cuius vocis vrbis in
Bohemia est, etiam ob Salinas a Slavis ita vocata, de qua
Aemilius Petrascus in Epitome historiae p. 12. ait; sub an-
num 715. *Slana* mons in Bohemia, ad cuius pedem falsa
aqua detecta, occasionem et incunabula vrbis Slanae dedit.

Maximum adhuc apud me momentum habet prox-
imitas *Carniae*, cuius nomen sine dubio a voce Slauica
Kraina, quae limitem indicat, deriuandum est, vt de Rhae-
tis, quos Dionysius L. IV. p. 24. ait, se suo sermone Rhæ-
senas, id est plenos, vel abundantes appellasse, et Vin-
delicis eorum vicinis iam taceam.

Non

Non possum tamen mihi temperare, quin verba celeberrimi Schloetzeri e Tom. XXI. p. 231. historiae universi adducam:

„Nomen (Krain) Carnia pure Slavicum est, et significationem habet, optime cum situ regionis conuenientem; probabile enim est, Carniam, antiquum nomen, et iam tempore Romanorum usitatum, idem exprimere, quod Craina. Nonne igitur summa adest probabilitas, linguam Slavonicam iam Romanorum tempore ibi fuisse, in usu, et Venetos non 548 anno post Christum natum deum huc immigrasse, sed veros Carnos semper fuisse? Adde quod tota haec regio montana sit. Semper autem priscae linguae et priscae gentes in montibus se conseruauerunt, vti Cimerii in Wallisia, Arnautae in Epiro. Caeterum hi Austriaci Kraini in Germania meridionali idem sunt, quod Brandenburgici Vcri in septentrionali: utriusque sunt Slaui limigantes, utriusque inde nomen acceperunt. Veneti ad mare Adriaticum a longissimo tempore semper Slaui vel Wendi crediti fuerunt, sed nullo alio argumento, quam propter similitudinem nominis.“

„Si autem Carni, proximi eorum vicini, antiquissimis temporibus iam Slaui fuerunt; tunc coniectura non solum vires, sed veritatem etiam acquirit.“

„Totus terrarum tractus a mari Adriatico recta linea usque ad mare Balticum a Slavis habitatur, a parte occidentali Carniam Veneti, a parte orientali Illyrii eam attingunt. His adiunge.“

„I. Veterem traditionem, quod Illyricum prima sedes et vera patria Slavorum fuerit.“

„II.

„II. Narrationem Nestoris, vnde cunque eam hauserit, quod Slavi priscis temporibus Norici fuerint appellati.“

„III. Memorabilem locum apud Constantinum Porphyrogenetam de Administratione Imperii. c. 30. seq. „Vbi Constantinus Slauos Dalmaticos e Norico dedit.“

His ego addo, quod Noricorum etiam nomen originem linguamque Venedicam, nostra aetate Slavicam dicam, clare, nisi me omnia fallunt, ostendit. Qui enim in montibus habitant, a Venedis *na hory* habitare dicuntur. Ex quo Romanorum Nori, et Noricum sine omni dubio fuit formatum.

Tot gentium, tot vrbium nomina in lingua Venetica siue Slavica, tam claram conuenientemque significationem habentia, quam praeter hanc in nulla alia habent, nonne nobis persuadebunt, gentem non solum Venetam Adriae accolam, sed reliquas etiam Illyrici gentes originis Heneticae, secundum Porphyrogenetam, vel Venedicæ, vti nos dicimus, fuisse; Slavorum enim nomen posterioribus temporibus in vsu esse coepit. Adducemus tamen historicorum etiam de hac gente testimonia, vt ostendamus, eam antiquissima aetate, et, vt dicunt, ab immemoriali quasi tempore has sedes obtinuisse.

Herodotus memorat, legem apud Venetos in vsu fuisse, secundum quam pulciores puellae sponsis diuitibus publica sectione, quasi sub hasta, sat magno pretio venderentur, vt deformes pauperibus cum dote, ex hac venditione contracta, facilius possent nubere; quae lex vt etiam apud nos inualecat, optandum est.

Appianus in bello Mithridatico ait, Sullam contra Venetos e Macedonia expeditionem fecisse, quia hae gentes

tes

tes saepius eo tempore in Macedoniam incursiones feciſſent.

Scymnus Chius v. 371. ait, Venetos maris Adriæ accolas quinquaginta vrbes habitare, gentemque esse numerosissimam.

Verba eius sunt: „Sinum dicunt Adriaticum barba-
„rorum multitudinem quandam circumhabitare circulo,
„centum fere myriadibus quinquagintaque, regionem
„optimam colentes, et fructuosam“ — et v. 386. „He-
„netorum vero sunt quinquaginta vrbes, sitae ad sinum;
„quos transgressos esse aiunt ex Paphlagonum regione,
„habitasseque circa Adriam.“

Sufficient haec de sermone et antiquitate gentis,
quae sinum Adriaticum incolebat, et de cuius origine,
et nomine quaestio a Celsissimo Principe IABLONOVIO
proposita est.

Si enim Veneti ad mare Adriaticum habitantes antea,
teste Porphyrogenneta, Henetici fuerunt appellati; si
sermone vſi sunt, quo nunc Slavi, generali nomine Vene-
di nominandi, vtuntur; si reliquæ gentes ab Adria in Grae-
ciam vsque, et forsitan per omnes regiones inter Illyri-
cum et Scythiam iacentes sub Sarmatarum nomine, eodem
sermone vſi sunt: quis mecum non faciet, vt putet, eos
cum Herodoti Henetis vnum eundemque populum fuisse,
et ab antiquissimis temporibus has terras incoluisse, quo-
cunque tandem duce et quacunque via in eas penetraue-
rint, h. e. fuisse eandem gentem, quae recentioribus
temporibus, nomen Slavorum, quamcunque etiam ob
causam assumerit, et per immensa terrarum spatia nunc
diffusa sit.

Hae rationes Carionem adegerunt, vt in Chronico L. IV. p. 112. diceret: „Henetorum meminit Homerus

O , in

„in vicinia Paphlagonum, quos Henetum ducem in Tro-
 „iano exercitu habuisse prodidit; et sinus Veneti atque
 „vrbis Venetae in mari Adriatico ab his originem esse,
 „consentient omnes, siue Antenore, siue quocunque
 „alio duce eo appulerunt, sicuti iidem sinui Veneto in
 „Suecico mari supra Porussiam cognomen dederunt. Nec
 „alia Henetorum, alia Venetorum siue Vendorum (Ven-
 „den) appellatio est.“

Haec fere sunt, quibus credidi demonstrari posse,
 gentem, de qua quaeritur, ad mare Adriaticum habitantem,
 Venetam dictam, eandem esse cum Venedis nostris, quae
 non quinto tandem seculo, vti vulgo creditur, e magna
 Scythia eo immigravit, sed iam ab antiquissima aetate to-
 tum Illyrici tractum obtinuit; et si Austria, Carniolam,
 Noricum, reliquaque Danubium inter Adriamque iacen-
 tes prouincias Germaniae annumeraueris, quanquam pri-
 sci id non faciebant, Danubium Germaniae limitem sta-
 tuentes, pro gente ab origine Germaniae haberri potest.

Vero simillimum est, Romanos bella, quae cum Vin-
 delicis, Rhaetis, reliquisque Illyrici populis gesserint,
 cum Venetis vel Slavis, vti nos eos vocamus, gessisse;
 qui tamen cum viribus impares montibus suis deiecti es-
 sent (nam oram maritimam diu iam perdiderant, in quam
 partim Graeci, partim Romani colonias suas deduxerunt)
 in interiora Germaniae, in primis qua Pannoniae iungeba-
 tur ad Vistulam, Tyran, Danubiumque se receperunt;
 pars Bohemiam, Misniaque occupauit, pars oram Bal-
 thici maris armis subegit.

Quo autem hoc factum sit tempore, accurate defini-
 re non audeo. Nestor certe in Chronico Russico ait apud
 Mullerum, Slauos a Danubio in Russiam venisse. Sunt
 etiam Slavi in Franconia, quos octavo iam seculo ibi habi-
 tauisse

tauisse, non ex monumentis tantum annalibusque constat, sed ex reliquiis etiam eorum, aliisque vestigiis clarum est. Quam gentem crediderim, eodem tempore eo venisse, quo reliqui Venedi ex Norico reliquisque prouinciis Romanorum armis expellerentur. Sunt qui credant, eos Norimbergam condidisse. Hac de re legantur Programmata aliqua Reinhardi Erlangensis, et Hanselmannus in Demonstratione, quo usque Romani in Franconiam Orientalem penetraverint. Halae Sueuicae. 1768.

Duo scriptores, iisque grauissimi, huic sententiae repugnant: Liuius enim L. V. c. 33. „Tusci, ait, coloniis suis omnia trans Padum loca, excepto Venetorum angulo, qui sinum circumcolunt maris, vsque ad Alpes tenuere. Alpinis quoque ea gentibus haud dubie origo est, maxime Rhaetis: quos loca ipsa effesarunt, ne quid ex antiquo, praeter sonum linguae, nec eum incorruptum, retinerent.“

Qua data occasione doctissimus aequa ac illustrissimus Scipio Maffaeus idissertationem de antiquitatibus Latinis atque Etruscis conscripsit, in qua demonstrare allaborat, linguam Tuscam ex Canaitica descendere. Sed cum eam nancisci non potuerim, argumenta, quibus vtatur, examinare nequeo, persuasus certiora fortioraque esse ea, quae ex optimis auctoribus attuli. Nam primo Venetos ipse Liuius excipit, eosque diuersos ab istis gentibus affimat: deinde quae de gentibus Alpinis, Rhaetis in primis tradit, eos praeter sonum linguae nec eum incorruptum ex antiquo nil retinuisse, indicare videntur, eos alio atque Tuscos sermone vsos, pronunciationem tantum Tuscis similem habuisse, ex qua de origine gentis conieeturam facit. Rhaetos enim verosimillimum est eandem cum Noricis, Vindelicis et Carnis fuisse gentem, scilicet Ven-

O 2 dam;

108 *Quae fuit gens Adriam accolens nempe Veneti.*

dam; eiusdemque linguae atque originis; qua de re plura in posterum. Strabo L. I. c. 12. dubitat, an Veneti, Adriam accolentes, non potius deducendi sint a Venetis, Galliae incolis. Cum autem nullas praeterea rationes adducat, cur hoc sibi persuaserit, supercedendum etiam mihi puto, multis verbis refutare et ostendere, difficile creditu esse, gentem numerosissimam, per totum Illyricum ab hominum memoria diffusam, a tam paruo populo initia sua habuisse, quem potius ex his regionibus in Galliam migrasse mihi persuaserim.

Caeterum quae Iornandes et Procopius de Slavis tradiderunt, historiam gentium Venedicarum magis confudunt, quam ut clariorem reddiderint. Cum enim Slavi pars tantummodo Venedorum fuerint, de quorum origine ipsis nihil certi constabat, quorumque linguam ignorabant, omni genti ea adscripsere, quae tribui tantummodo eius, Slavis, adscribenda erant, quos interdum non dubitant Gothicis nationibus annumerare.

DIS-

DISSERTATIO
DE
DISTANTIA LOCORVM
SIVE
ACCESSORVM
SIVE INACCESSORVM
CVM
AVT SINE INSTRUMENTIS, GALLICA
ALIISQVE METHODIS INVENIENDA
PRO ANNO 1772.

SCIENTIA DIRIGIT ARTEM.

*Per Reverendum Patrem Ioannem Helfenzrieder, S. I. Professorem
Matbeseos in Vniuersitate Ingolstadiensi.*

SCIENTIA DIRIGAT ARTEM.



Haud quidem quaestio[n]is propositae mens esse videtur, vt ea solum, quae hac super re dudum a Gallis, aliisque excogitata, et publici iuris facta sunt, convergantur. Artis geodaeticae, generi humano utilissimae, augmentum per noua inuenta spectare Serenissimus scientiarum Promotor videtur. Quapropter supersedere aliena transcribendi vano labore, et Lectores scripti huius ea, quae dudum in ipsis Auctoribus legerint, relegendi molestia liberare me posse, existimo. Indicare tamen ea obiter, ac citare Auctores, quidque de iis sentiendum, effari, id vero nec a mente Serenissimi Principis, nec a quaestio[n]is propositae instituto alienum esse, imo postulari videtur. Caeterum scriptum hoc Geodesiae scientibus, non tironibus, paratum est, quapropter minutias non persequar; neque enim iis Lectorum patientiam fatigandam existimo.

§. I.

Tria sunt laboris Geodaetici genera: primum accuratissimum, quo hoc primum seculo ad figuram Terrae cognoscendam summi Philosophi, et inter eos primi Galli vni sunt; alterum, quo agrum vrbi, aut pago circumfisum, aut partem eius dimetimur, atque in chartam coniicimus; tertium

tertium integræ alicuius regionis mensuram, et descriptionem spectat. In omnibus histribus generibus offert se perpetuo distantias siue accessas, siue inaccessas metiendi problema. Quidquid ergo eo facit, ut Geodaetae labor in determinanda locorum distantia accuratior, aut expeditior, aut certis in casibus non inanis reddatur, ratione semper habita propositi finis, ad praesentem quaestionem spectat.

§. II.

Atque primum quidem genus quod attinet, vix addi, aut demi quidquam posse videtur iis industriis, quibus Academicci Parisini in Gallia, Laponia, et Peruua etc. et post per Pontificiam ditionem Rogerius Iosephus Boschowichius, et Christophorus Meierus, in eorum opere, quod anno 1755 Romae prodiit, commemoratis, vñ sunt. Baseos tamen dimensio expeditior erit, si impediri penitus ligni mutatio possit; quod quidem Christianus Mayerus Astronomus Palatinus in opere suo, *Basis Palatina*, extimam ligni superficiem porosque obstruendo obtinuisse se ait, testante etiam Cassinio, paris bonitatis, firmitatis, constantiae et magnitudinis tigilla ne in Gallia quidem vñquam occurrisse. Solius tamen caloris variati rationem habendam, haud satis mihi verosimile videtur: certe Boschowichius eodem tempore, quo alia eiusdem tigilli lignei pars mutata tempestate contrahebatur, aliam dilatatam fuisse obseruauit, vt operis sui pag. 366. refert. Et Cassinius in opere *La Meridienne de Paris* pag. 34. pluribus occasionibus notatum afferit, sensibiliter mensuras ligneas effectu humiditatis, et siccitatis mutari. Cui mutationi virgas suas obnoxias fuisse, etiam Bouguerius in opere *la Figure de la Terre* Parisiis edito, pag. 40. testatur.

§. III.

§. III.

Tantum curae et industriae in metienda Basi primi trianguli pro mappis solum topographicis, et minoribus dimensionibus utique non requiritur. Attamen, vbi per silvas traseundum, neque obstantes arbores sternere licet, cum rectam continuam habere non possumus, in rectangularium minorum, ad quas maiorem referimus, positione, et longitudine determinanda plus curae adhibendum est, quam a communibus geodaetis vulgo adhiberi solet, nisi in errores incidere nimis magnos velimus. Siue virgis lignis, siue catenis ad metiendum utaris, curandum maxime, ut rectangularium parallelisimus, et mediae eadem constanter directio seruetur. E. g. perueniatur in producenda recta aliqua (fig. 1.) usque ad C, vbi arbor A longius producendae obstat, post quam quidem eam a D ad E continuare liceat. Ut DE in eadem directione sit, ac BC, prope lineam BC ducatur alia linea FI parallelala lineae BC, et huic FI parallelala altera DE, et eiusdem ab ista distantiae, atque prior, nempe oportet esse $BF = CG = DH = IK$. FI sit satis longa, et quo longiorem duce-re licuerit, eo melius erit. At fors arbores a et a non nimiam longitudinem concedent. Quo haec linea breuior erit, eo maiore cura studendum, ut BF, CG, DH, KI exacte fiant aequales: hic iuuerit scabella adhiberi; quae attolli facile, deprimique queant, humilia tamen, quo minus prospectum arborum rami impedian. Dumeta cum minoribus ramusculis exscindenda esse, aut flectenda, vel me non monente quiuis nouerit. Ponatur super scabellum in F dioptra ocularis, qualis exhibet figura 2. quae nempe crenam in medio habeat basi horizontali verticabiliter insistens. Alia obiectiva (fig. 3.) quae a priore in eo differat, quod magnam habeat aperturam, quam

P

medium

medium transit filum tenuem, non nimis tamen, ut eminus videri possit, ponatur super scabellum in G, tum tertia obiectua in H, quarta in I, ita, ut filum medium secundae, oculo post primam posito, tegat fila media tertiae et quartae. Iuuabit vero magis in dioptra secunda et tertia, filum medium non unum esse, sed geminum, ut inter ambo, relicto exiguo spatio, ultimum comparere possit; iuuabit etiam alternis filorum colorem mutari, sic fila adhibere crassiora licebit, quae facilis cernantur, et admodum facile, cum nullum ab altero penitus obtengatur, videbimus, num in eadem recta dioptriae hae constitutae sint, quod ubi fuerit, habebimus puncta D et K, quae tantundem a medio dioptrarum in H et I positarum distare debent, quanta est priorum in F et G a linea BC distantia. Haec ubi modica fuerit, tignis aut virgis haud difficulter determinabitur. Per puncta vero D et K ad E producere eam lineam lineae CB in directum sitam licebit, donec nouum in obicem occurrat. Distantias BF, CG, DH, KI expedit esse modicas.

§. IV.

At fieri poterit, ut puncta F et G a linea BC distare longius debeant, eoquod alia propter obstacula satis longa esse FG non possit; tum vero cura habenda est, ut anguli B, C, H, I satis accurate recti fiant, aut error saltem non sit nimius, quod facile obtinetur ope crucis cuiusdam ligneae, ex ligno probe siccato, quod fibras etiam rectas habeat, regulis duabus decussatis, quae quo longiores, eo meliores sunt, iunctis ad extremitates quatuor aliis regulis circumpositis (Fig. 4.) et quatuor dioptris *a*, *b*, *e*, *d* instructae, per quas ductae visuales lineae *ab*, et *de* ad angulos rectos in *c* se interfescant: id quod examinatum

natum esse antea oportet. Quapropter dioptrarum istarum duas oppositas oportet esse amphidioptras, quae nempe et simul oculares, et simul obiectiuae sint, quod quidem variis methodis obtineri potest: nempe ocularem in vna obiectiuae, in altera obiectiuam oculari imponendo, vel iuxta ponendo, admodum tamen propinque, et parallele: vel denique (fig. 5.) lamella A vertebris iuncta lamellae B, quae posterior dioptra obiectua est, cum prior sit oocularis, attolli possit, vt eam contegat, et rima oblonga tenuis non cadat quidem in ipsum filum dioptrae B, sed proxime illud transeat. Expedit prominere ex lamella B tenuem cuspidem *m*, quam lamella A foramine *n* excipiat, sic erit minus periculi, ne aliquando luxatis vertebris titubet. Erit rima in vna dioptra prope filum ex parte dextera, in altera ex parte sinistra, vt linea a rima quavis ad oppositum filum ducta una alteri parallela sit. Hoc optimum amphidioptrarum mihi esse genus videtur, ex iis quidem, quae tubis opticis instructae non sunt. Vtrum lineae fiduciae *ab* et *de* (Fig. 4.) per dioptras ductae angulum inter se rectum faciant, id vero sequenti modo examinari poterit. Collimetur per dioptras *de* in obiectum aliquod longe positum *M*, et videatur numerus per dioptras *ab* aliud eminus adpareat satis notabile *N*. Si tale vltro se non offert, facile erit tabulam aliquam nigram cum cruce alba sic suspendi, vt in illud tendat linea fiduciae *ab*, tum vertatur crux circa centrum *c* ita, vt linea *ab* congruat linea *cM*, vt nempe *M* a filo dioptrae obiectiuae *b* tegatur, oculo post *a* posito; veniet tum *e* in locum, vbi ante fuit *a*, et *d* in locum *b*, tendetque, si quidem tam *McN*, quam *ecb*, et *bcd* recti sint, tum *ed* in *N*. Quodsi vero *ecb*, qui angulus ante congruebat, cum *McN* sit angulo recto maior, linea fiduciae *ed* non tendet

P 2

in

in *N* sed in obiectum sinistrius *n*; transferri dein oportet tabulam *N* in *u*, locum medium inter *N* et *n*, situm vero dioptrae vnius (nam vnius faltem situs mutabilis esse debet) mutari oportebit. Ponamus mutabilem esse dioptram *b*, ergo retroacta cruce in pristinum situm, quem figura exhibet, collimetur denuo per *de* in *M*, dioptra *b* mutetur, vt tendat *ab* in *u*, tum crux circa centrum *c* vertatur, videaturque, vtrum per dioptras *ed* adpareat *u* dum per dioptras *ab* adparet *M*; si fiat, bene est. Secus tamdiu tabulae primo in *N*, post in *u* positae, et simul dioptrae *b* locus mutandus est, donec denique id obtineatur. Dioptram vnam mutabilem esse debere dixi, obtinebitur id, si per eius pedem *D* (fig. 6.) foramen transeat oblongum, per quod transmissa cochlea regulae adprimitur, et tenetur. Post pedem hunc lamella *E* affixa est, ad firmitatem dioptriae. Caeterum regulas ferreas ligneis, tubos opticos dioptris simplicibus meliores esse, sed et opus tum preciosius fore, vtiique patet.

§. V.

Non modici usus esse poterunt duae insuper aliae dioptrae *f* et *g* (fig. 4.) inter priores positae, ita, vt linea *gf* cum *cd* angulum 45° faciat. Angulus hic non multum dissimili modo examinatur, ac rectus, nempe conuersione crucis etc. et si non sit accuratus, corrigitur: hinc alterutram harum dioptrarum iuuerit esse mutabilem. Caeterum parum interest, an linea *gf* transeat centrum *c*, an non, modo angulus, quem cum lineis *ab* et *ed* facit accurate sit 45° . et linea *gf* a puncto *c* non valde distet.

§. VI.

Haud frustra crucem hanc accuratius paulo descripsi, plures enim illius usus sunt, nos aliquos afferemus. Primo ponamus

ponamus lineam FG (fig. 1.) longius distare a BC, ponatur crux super B, ita, ut de cadat in BC (fig. 1. et 4.) tum eminus erigatur virga quaedam in F, in linea fiduciae dioptrarum ab, eritque angulus CBF 90° . Idem fiat in C, ut et angulus BCG 90° sit. Iam si lineae BF et CG etiam aequales sint, erit FG parallela BC; quod si virga vna e. g. F, longius distet a puncto B, quam G a C admoueatur proprius, ut aequalem distantiam obtineat, in eadem tamen recta ad B perpendiculari. Dixi, virgas in F et G erigi posse; usus virgarum loco aptiores erunt tripodes, quibus dioptræ (fig. 2.) imponantur, quae super tripodum mensas arbitrario loco constitui poterunt, obtinerique facilius, ut earum a linea BC aequalis sit distantia, et anguli ad B et C recti. Tripodes autem, si humi iaceat catena BC admodum humiles esse iuuerit, et simili super tripode, seu scabello ponetur crux in B et C ut centrum crucis c catenæ perpendiculariter immineat. Tripodes caetera similes esse poterunt iis, quos Boschouichius in opere superius laudato describit; aut si magis placet, singuli duobus, prismatis quadrangularis figuræ AB et CD (Fig. 7.) ferreis annulis m et n inter se coniunctis componantur, nempe AB mensulae insertum est, CD attolli, aut deprimi magis, minusue potest, et cochleis firmari; imo et variis generis crura CD haberi possunt, longiora, et breuiora, ut scabella modo altiora, modo humiliora, prout usus tulerit, habeamus; iuuerit etiam tripodes habere cum breuibus omnino pedibus, aliquot solum digitos longis, qui in solo plano, si mensura lineae humi capit, commodissimi erunt. Caeterum in aperto campo sufficiens est baseos per catenas metienda ratio, quam Pentherus in Praxi Geometriae, et Zollmannus in libro vollständige Anleitung zur Geodäsie sectari iubent.

§. VII.

Iam alium usum crucis nostrae monstrabo. Si in metienda Basi peruentum fuerit ad fossam profundam BD (fig. 8.), seu ad lacum ultra quem lineam AB producere non licet, ope crucis nostrae in B facies angulum rectum ABC; baculo defixo in C, et tensa catena, aut funiculo BC progredieris in linea BC, donec ultra fossam vel lacum, sub angulo semirecto, ope crucis nostrae cognoscendo, adpareat tibi alia, virga, ultra lacum posita, in linea recta cum BA, eritque, quia angulus BCD semirectus est $BC=BD$, habebis itaque mensuram BD, licebitque ultra lacum in D lineam continuare,

§. VIII.

Sed vel solo hoc instrumento distantias locorum accessorum, imo et inaccessorum B et E (fig. 9.) metiri licet. Sit ergo metienda distantia AB, loci inaccessi B, ex accesso A. imo pone crucem in A, et determinato per crucem angulo BAF recto, duc rectam AF tenso funiculo; iam progredere 2do, cum cruce in hac recta, donec tibi sub angulo semirecto ACB, B occurrat, et erit $AC=AB$. 3tio, si in eadem recta obserues in D angulum EDF rectum, atque in F semirectum DFE, erit $DE=DF$, 4to coniectis in tabulam aliquam lineis AB, AD, et DE, ita, ut ex scala geometrica totidem habeant pedes paruos, quot in campo magnos, si in A et D fuerint anguli recti, distantiam inaccessorum B et E circino determinabis.

§. IX.

Sed ad nostram quam reliquimus, rectam per filum producendam (fig. 1.) BC redeamus. Positis super scabilla

bella dioptris in F et G, ita, vt linea FG sit parallela lineae BC; licebit eam vtique per H in I prolongare; licebit in H et I, similiter ac in B et C fecimus, ope crucis nostrae, angulos rectos facere; licebit puncta H et K, faciendo $HD=GC=IK$, determinare; licebit lineam DK vltierius producere. At distantiam CD, cui quidem aequalis est GH, si anguli C, G et H exactissime recti sunt, non ego, si aliter fieri potest, ex distantia GH colligam, si linea FI longe distet a BK, quia minimus error in tali casu in angulis maiorem infert; sed prope arborem A ducam paruam parallelam, et in ea, sicut hic in figura $GH=CD$ determinabo; ad hoc enim parua linea sufficit, nec parallelismus adeo exactus requiritur. Directionem vero DK eandem cum BC facere, vtique ope lineae longae FI, accuratius cum BC paralleiae, obtineri debet.

§. X.

Vidimus paulo ante crucis nostrae emolumenta. Similia sunt alterius cuiusdam instrumenti a me excogitati, quod ego Tubum Geodaeticum voco. Cistula est (fig. 10.) cubica fere, anterius in db et in latere bE penitus aperta, ex ferreis laminis confecta, ita vt in b tenuis solum columna sit, fundum cistulae cum aequali superiore quadrato $dbEc$ connectens. Sed in lamella cE pariter quadrata, rotundum foramen est, apertum in tubum conicum F ei adhaerentem. Duo in hac cistula sunt specula $a b$ et $b c$, plana, vitrea ex vitro tenui; alterum alteri mediante interuallo superpositum, ita vt inter ambo prospectus pateat. Est vero in F lamella aliqua L quam figura fere in naturali magnitudine exhibet, in qua crena amplior horizontalis est, quae tenuiorem, et breuiorem verticalem bissecat, vt pars superior pro superiore, inferior,

ferior, pro inferiore speculo seruiat. Speculum vnum inferius cb cum axe tubi Fg angulum semirectum, alterum superius ab angulum $22\frac{1}{2}$ graduum, versus obiecta acutum, et eius complementum versus oculum obtusum facit. Est in utroque speculo, circa medium fere, in amalgamate, quo vestitur vitrum, crena aliqua tenuis, facta tenui acu abrasso amalgamate. Iam ita constructo instrumento, si tendo oculo adposito in F , in obiectum aliquod, quod mihi in linea Fg super crenam speculi bc , et aliud M in speculo quasi crena m secum adparet, angulus MmF rectus est. Si vero in crena n superioris speculi aliud obiectum N adparet, angulus NnF semirectus est. Licebit ergo tubo hoc (quem construendi modum describendum alii occasione reseruo) angulos rectos et semirectos sicut ope crucis obseruare, et determinare. (§. 8. etc.)

§. XI.

Sed et flexus viarum ope tubi huius, vti et crucis, inuenire licet. Sit enim obiectum aliquod C (fig. 11.) in via recta AB , iam ante determinatum (§. 7. 8.) ita, vt BE et EC notae sint; progrediaris dein in linea BD , donec in F , versus B retrospicienti, obiectum C in speculo superiore adpareat, vt angulum DFC semirectum esse tibi constet: in D vero venienti C conspiciatur in speculo inferiore; mensis linea FD , (quae aequalis est DC) et BD , habes duos cathetus trianguli BDC , imo et hypothenuse BC , punctis B et C iam ante in linea AB determinatis. Itaque et angulum CBD per trigonometriam inuenire, ac iungere angulo CBA licebit, quorum summa angulum ABD efficiet; commodius autem mechanice super tabula, ex punctis C et B radiis $CD=DF$, et BD intersectio fiet in D , per quam ducetur BD .

§. XII.

§. XII.

Vberioris tamen usus est dimensio angulorum, circulorum, aut semicirculorum, aut quadrantum ope, quae methodus apud Gallos communior est, modo diuisio, et structura operis sit exacta, sive regulae, quas *Alhidadas* vocant, tubis opticis, sive solum dioptris sint instrumentae. Qua de re multa passim apud auctores inueniuntur, multa etiam inuenienda supersunt. Confer Acta Academiae Regiac Parisinae ad annum 1765. *Memoire sur quelques moyens de perfectionner les Instrumens d'Astromomie. Par M. le Duc de Chaulnes.* Pro dimensionibus Geodeticis communibus tamen sufficiet utique, si angulos citra errorem vnius minuti primi metiamur, quod quidem fieri absque tubis opticis potest. Presbytae oculis etiam inermibus, imo et myopis conueniente lente concava instrumentis obiectum, quod sub vnius minuti primi angulo apparet, experientia teste est visibile. Erit vero, si radius quadrantis pedem Parisinum aequet, in arcu vnum minutum primum pariter satis visibile etiam oculo inermi, quamvis expeditat lentem adhibere conuexam, quo commodus in arcu diuisio videatur. Sumamus enim pedem in 10 digitos, digitum in 10 lineas diuisum, lineae partem 10am scrupulum vocemus. Habebit ergo radius 1000 scrupula; est vero sinus vnius minuti ad radium = 29:100000, seu proxime = 3:10000. Itaque in arcu talis quadrantis partes decimae tres, seu fere pars vna tertia vnius scrupuli minutum primum implebunt. Esse autem tres decimas vnius scrupuli visibles, ex eo liquet, quod tales partes 33 aequent vnam lineam: at tenuissima argentea fila etiam notabiliter tenuiora sunt quam $\frac{1}{33}$ vnius talis lineae. Neque adeo difficile est tam tenues sulcos metallo insculperem. Notandum est, frustraneum esse, multo tenuiores

Q

partes

partes in arcu quadrantis notare, quam dioptrarum, aut tuborum, si hi adhibentur, ope in obiectis videre liceat, ita, si dioptrae solum minuta prima exhibeant, frustra in arcu minuta secunda notarentur.

§. XIII.

Plus difficultatis habet exacta quadrantis diuisio, ex qua tamen angulorum exacta dimensio, et distantiarum determinatio maxime pendet, quapropter ad problema praefens pertinere existimo, qua ratione exacta diuisio obtineatur, exponere. Hanc Geodaeta per se ipse facere, aut certe ab artifice factam examinare debet; suaserim autem, vt potius diuisionem quadrantis sui, atque nonnii ipse per se faciat Geodaeta, quam vt artifici faciendam relinquat, cum non plus artis aut laboris postulet examen quadrantis, ac eius diuisio; molestum autem sit male diuisum quadrantem habere, et errorem in eo tollere non posse, quamvis erroris ratio haberri possit in calculo. Pauca tamen, diuisionem quadrantis facere antequam doceam, monenda habeo: nempe 1mo pono arcum instrumenti mei (fig. 12.), quod quadrantem voco, quadrante maiorem esse, ita, vt saltem 15 gradus ultra 90 seu 105 in eo locum habeant, quamvis 90 solum adscriptis numeris notentur, quindecim vero ultra initium quadrantis seu o excurrant. 2do pono, opus satis firmum esse, et arcum planum ac minime asperum, et exacte centro motus C, circa quod regula dioptris instructa gyrat, concentricum. 3tio regulas dioptris instructas ei iungi duas, superiorem vnam super arcum circa centrum C mobilem, sed ita, vt motus sit mollissimus, et axiculus in C exacte rotundus, ac implens rotundum regulae foramen; alteram inferiorem, quae nos de quadrantis statu doceat.

doceat. Atque haec quidem ita firmari possit, ope cochleae, vt, dum superior adiuncto nonno ostendit initium diuisionis, seu gradum \circ , inferior in idem omnino obiectum tendat, in quod tendit superior: hinc et inferiorem, vt commode in eum statum redigatur, per exiguum saltem interuallum leniter mobilem esse conuenit. 4to suppedaneum quadrantis eiusmodi esse haud dubie debet, vt et firmum sit, et quadrans horizontaliter constitutus facile circa axem verticalem, qui circiter centrum grauitatis quadrantis pertranseat, mollissime verti figique demum possit. 5to antequam diuisionem quadrantis aggrediar, instruo me prius machinula quadam subtilibus fulcis aurichalco insculpendis opportuna. (fig. 13.) Lamella nempe Aurichalcica ad angulum rectum inflexa fert chalybeum cylindrum DC tenuibus helicibus instructum, et inferius in tenuissimam cuspidem exeuntem, superius vero caput ferentem parallelepipedum, cuius medium transit crena, vt inserto cultro quodam facile circumagatur. Iam cum eleuare aut deprimere hanc cuspidem mollissime pro libitu, et adductis cochleis firmare liceat, in potestate mea est, ea fulcos facere magis aut minus profundos. Si latus *mn* applico regulae, pollicem post, indicem ante lamellam A, et medium digitum super lamellam B apprimo, iuxta eam lineam seu fulcum rectum exarare perfacile est. Ita instructus diuisionem quadrantis aggredior.

§. XIV.

Impono eum firmissimae mensae (fig. 15.) in *c* in conclaui satis ampio, ita vt arcus extra mensam prominat, et inferior regula dioptris instructa pariter extra marginem mensae sit, tendatque in oppositum punctum *d*, firmeturque quadrans, vt, donec diuisio absoluta sit,

Q 2

in

in eodem constanter situ maneat. 2do circumpono super fulcra in eadem altitudine supra solum, quae quadrantis est, circa parietes tigna quaedam ab , bd sub angulo recto in b coniuncta, et ita, ut $ac=cd$. Angulum retum ope tigni tertii, hypothenufae nempe, determino; sed etiam distantias ac et cd tigni ope aequales obtineo. Divido autem tignum ab in 10 aequales partes, seu pedes arbitrarios, quales etiam in tigno bd notantur, et plures adhuc ultra d usque ad e circiter tres, 3tio paro lignum parallelepipedum paulo longius tali pede, in quo pes in 100 partes aequales, seu lineas diuiditur, cuius partem parallelepipedi AB ultra duos digitos longam, tigno incumbentem, exhibet figura 14. 4to et huic denuo aliud parallelepipedum CD breuius imponitur, in quo longitudo 11 linearum in 10 partes aequales diuiditur, servitque ad lineas in decem scrupula tanquam nonnio quodam diuidendas. Itaque aequabit ab (fig. 15.) 10 pedes arbitrarios = 100 digit. = 1000 lin. = 10000 scrup. quo longior est $ab=bd=cd=ac$, eo id melius est. Et quidem si parallelepipedum longius, seu pedale AB (fig. 14.) imponas tigno, ita ut divisionis initium initio pedis alicuius e. g. quarti n. 3. notati immineat, habebis pedem illum in 100 lineas diuisum. Parallelepipedum minus CD imponitur maiori, ad linearum divisionem. Ecce hic initium divisionis huius parallelepipedi seu curforis asterisco (*) notatum, super pedali inter lineam 13 et 14 pedis quarti; linea vero quarta ab hoc signo (*) in curfore sinistrosum recedendo incidit perfecte in aliquam lineolam nempe 9 in parallelepipedo pedali, vnde signum (*) distat ab initio divisionis in tigno 3 pedes 13 lin et 4 scr.

§. XV.

§. XV.

Tignis ita ordinatis (fig. 15.) vt ea sit perpendicularis in initium diuisionis seu o ped. (a puncto a ad b sunt 10 pedes); dirigatur regula inferior in d et firmetur, superior vero in a; tum prope regulam, ope instrumenti primum ante (§. 13.) descripti, fiat in arcu quadrantis prope marginem breuis linea ad denotandum gradum o. quaeratur dein ex tabulis tangens vnius gradus = 157 in partibus radii 10000 seu 17 lin. 5 scrup. et tigni ab primo pedi superposito parallelepipedo pedali, huic superpositus cursor ita constituatur, vt signum (*) denotet 17 lin. 5 scrup. tum regula superiore (inferior manet immota, et directa in d, seruitque solum ad examinandum, vtrum quadrans non fuerit dimotus) collima in signum (*) et prope regulam exara sulcum alterum, pro denotando primo gradu, et sic perge vnum gradum post alterum simili modo notare, vsque ad gradum 45. Gradibus 45 notatis vel incipe, collimando primum in d et pergendo ad b, iterum 45 gradus simili modo notare (numeri gradibus nondum adscribuntur) vel perge a puncto b ad d cotangentes graduum 45, 47 etc. vsque ad 90 promotione parallelepipedi pedalis et cursoris notare; at numerum pedum in tigno bd non a puncto b ad d, sed a puncto d ad b pergere decet, similiter in parallelepipedo pedali, et cursore numeri contrario ordine scripti esse debent; itaque vel aliud tale parallelepipedum, et alium cursorum pro tigno bd paratum habere debes vel in priore etiam contrario ordine illi, quem fig. 14. exhibet, numeri prioribus apponendi sunt; demum 90 gradibus notatis, perge ulterius in reliquo arcu, quotquot capit, gradus notare, sed saltem 15 (§. 13.) promouendo parallelepipedum cum cursori (fig. 15.) a puncto d ad e; omnibus gradibus notatis,

Q 3

incipie

incipe ab initio, et nota simili modo dimidios gradus, aut si magis placet, mox prima vice non gradus tantum integros, sed et dimidios nota, et habebis arcum rite diuisum in gradus integros et dimidios; distinguantur tamen integri a dimidiis longitudine sulcorum, sed et deni quique, quibus post adscribentur numeri longiore sulco, et quini quique signo aliquo a reliquis discernentur. En partem arcus quadrantis (fig. 16.) exhibitam in AB cum apposito curfore CD, qui quadrantis marginem radit.

§. XVI.

Nonnius CD affixus est regulae superiori E, in qua *mn* basis est dioptae ocularis. F vero brachiolum est, quod curforem quadranti adstringit, ne ab eo discedat. Debent autem in nonnio 30 in aequali abinuicem distanta insculpti sulci 31 in quadrantis margine respondere. Itaque a C ad D progrediendo et a signo (*) incipiendo primum asterismum sequens sulcus ab isto initio distare debet 31 minutis, secundus 1°. 2', tertius 1°. 33' etc. si iam ipse sulcus signo (*) notatus, seu index a regula E triginta minutis distet (quod, ut commodius videatur cui gradui, et gradus parti respondeat, facere consultum erit) distabit primus post (*) sulcum 1°. 1', alter 1° 32', tertius 2°. 3' etc.

§. XVII.

Vt nonnii accurata obtineatur diuisio, nonnius primo arcui quadrantis, ope lamellae (fig. 17.) duabus cochleis rr (fig. 16. 17.) inferius ipsi affixa, iungatur, duabus aliis cochleis per foramina oblonga uu transeuntibus, et foramina rotunda uu in quadrante subeuntibus, quae helices tanquam cochleas matrices habent. Verum lo-

cus

cus horum foraminum *uu* non est, vti figura 16. exhibet, prope gradum 20, sed prope gradum 0, ita nempe, vt, dum regula E in quadrante (fig. 16. 15.) tendit ad *d*, et quadrans adhuc eum, quem exhibit figura, situm habet, cochleis per foramina *uu* adactis, nonnius in isto situ quadranti affigi possit. Atque hoc quidem fieri oportet. Nonnio itaque per cochleas quadranti affixo, per diopteras regulae E (fig. 16. 15.) tendatur ad punctum *d*, quod si forte non perfecte in media dioptra appareat punctum *d*, cochleis per *uu* transeuntibus dimissis, mutatur nonnii situs, vt perfecte demum regula ad *d* tendat, et adductis iterum cochleis, nonnius quadranti firmiter iungatur; haecque est causa, cur lamella (fig. 17.) foramina *uu* non rotunda, sed oblonga habeat, vt cochleis nondum adductis liber adhuc exiguus motus nonnio concedatur: exactissime enim debet regula E (fig. 16. 15.) in *d* tendere, dum nonnius regulae cochlea coniunctus est, similiter et regula inferior accurate in *d* tendat, quo obtento exempta cochlea S regula superior E a nonnio liberatur, inferior fixa manet. Regulam E nunc 30 minutis promoue, vt nempe linea fiduciae a punto *d* ad *b* (fig. 15.) dimidio gradu progrediatur (nempe nunc iterum parallelepipedo pedali, et altero digitali, seu nonnio ligneo vtimur ad tangentes in tabulis inuentos determinandos) et consulta prius regula inferiore, vtrum situs quadrantis mutatus sit, primum prope regulam sulcum insculpe signo (*) notandum (fig. 16.). Post promoue regulam, vt linea fiduciae discedat a punto *d* 1°, 1' (fig. 15.) et iterum sulcum prope regulam exara. Discedet dein linea fiduciae a punto *d* 1°, 32', et denuo sulcus fiat; et sic perges cum regula progredi sensim, donec 31 sulcis factis nonnii diuisionem absoluueris. Amota dein lamella (fig. 17.) quae interim nonnum

nium quadrantis arcui iunxit, cuius nunc nullus amplius usus est, nonnius inserta *S* (fig. 16.) iterum regulae *E* affigitur. Nonni fulci denis gradibus rescedentes producuntur, iungunturque numeri, prout figura 16 exhibet.

§. XVIII.

Quadrantis descripti ad metiendos angulos hic usus est: 1°. adducitur regula *E*, ut signum (*) notet o in arcu. Commodum est, si ad regulam in hoc situ aliquamdiu conseruandam (fig. 18.) brachium aliquod *a b c* duabus cochleis *m* et *n* regulae *E* sit affixum, ut ope cochleae *D* quadrantis arcum *AB* inferius prementis ei affigi possit. (exhibit figura 18. sectionem verticalem *AB* arcus quadrantis, cuius lamella superior aurichalcica est, inferior ferrea; *FG* partis regulae ferreæ arcum tenentis; *E* partis regulae, seu alhidadae; dioptrae tamen non exhibentur, *a b c* brachii regulae affixi.) Figatur ergo regula ita, ut index nonni (*) exakte ad arcus quadrantis initium diuisionis consistat, seu e regione o grad. tum quadrans vertatur, ut obiectum aliquod e. g. aliqua, quam vocemus, turris *T* per dioptras regulae *E* appareat; dein etiam regula inferior ab idem obiectum dirigitur, et in hoc situ firmatur, ita nempe, ut ambae regulae in idem obiectum tendant, dum index notat o. dimissa dein regula, quae adhuc ope cochleae *D* arcui quadrantis adhaerebat, promoueatur ad alterum obiectum e. g. turrim *t*, et monstrabit 1°. index (*) (fig. 16.) e. g. 21 gradus, si nempe signum (*) sit inter 21 et 22, et si inter 21 gradus et semigradum sequentem consistat, supra 21 gradus angulus *T Ct* (pono locum quadrantis dici *C*) aliquot minuta pauciora tamen quam 30 habebit, a nonnio nobis ostendenda. Vide itaque

itaque, quis fulcus nonnii fulco alicui quadrantis perfecte e regione respondeat; in figura hac vides, eum esse 21 in nonnio; itaque habemus angulum TCt 21 graduum 21 minutorum. Quodsi index ultra semigradum promotus esset, numeri in nonnio maiores valerent e. g. 51 pro 21: vides enim in nonnio duas esse numerorum series; unam pro semigradu ab initio gradus ad 30°, alteram a 30° ad 60°. Verum haec quidem vulgo nota sunt, exponenda tamen censui, ut quadrantis mei exactiorem notitiam praebereim.

§. XIX.

Quodsi regularum cum dioptris loco adhicerentur tubi optici micrometris instructi, vtique angulos etiam exactius dimetiri liceret; attamen ut non aliquot minutis secundis erretur, caueri vix poterit, quia tubus pedalis non tantum auget obiecta, ut partes adeo exiles accurate distinguantur; verum tum etiam arcus quadrantis subtilior adhuc deberet esse diuisio. Et quoniam vitro subtiliores lineae et durabiliores quam aurichalco inscribi possunt, quadrans vitreus aptior quidem per se esset, nisi fragilitas vitri obstat, arcus vero parui cum tubis longioribus multo ideo non placent, quia inflexio tubi timenda est.

§. XX.

Dimensione baseos exacta et angulorum ei adiacentium distantiam loci determinari, quis ignorat? hanc maxime methodum gallis usitatam scimus. Quaestioni itaque propositae ut satisfaceremus, ostendendum erat, qua ratione baseos et angulorum exactam dimensionem obtineremus etiam in casibus difficillimis, ubi nempe in basi dimetienda obstacula obueniunt varia; angulorum vero

R accu-

accurata dimensio nonne ex accuratione instrumenti, quo angulos metimur, prope vnicē pendet? Recte itaque fecisse me arbitror, exponendo methodum accuratam quadrantis geodaetici diuisionem obtinendi, et eius usum paucis commonstrando. Methodus haec diuisionis, quantum mihi constat, noua est; scio examen diuisionis per tangentes antiquum esse, diuisionem vero per tangentes facere nemo, quod sciam, ante me docuit: quapropter methodum hanc breuiter, quantum licuit, exponendam duxi. Sed nondum rem omnem confectam habemus; plures sunt methodi, quibus distantias locorum determinemus. Supereft mihi de mensula praetoriana dicere, quae licet antiquissima fit, noua tamen de eius usu affera: ante vero angulorum parallacticorum usum, et eorum metiendorum rationem variam describam.

§. XXI.

Angulus $A C B$ (fig. 19.) quem faciunt lineae $C A$ et $C B$ ex eodem obiecto C ad extremos terminos oppositae baseos AB ductae, qui *parallacticus* dicitur, si est exiguis, summa angulorum $A + B$ parum differr a 180 gradibus. Quodsi ergo proxime aequales sint, etiam proxime rectos eos esse decet, eritque ratio AB ad AC proxime = $AB : BC$, ac citra magnum errorem ex angulo parallactico C exacte cognito, et linea AB cognita distantiam puncti C determinare licet, licet anguli A et B seorsim non sint exacte cogniti: non tamen vicissim ex angulis A et B obiter solum cognitis determinare licet distantiam AC vel BC , quia, nisi exacte sint cogniti, summa etiam inde eruenda non erit exacte cognita; ergo ex ea angulum parallacticum exacte concludere non licet. At sunt casus perquam multi, in quibus angulum paralla-

parallacticum satis exacte aliunde cognitum habere licet, quamvis singulorum angulorum A et B mensura exacta nobis ignota sit. Quodsi ergo distantiam obiecti C non adeo exacte cognoscere volumus, ope anguli parallactici satis bene quasi vno ex loco determinare licet: nempe duo puncta A et B, si paucis a se pedibus distant, pro vna statione computantur. Et hoc in sensu intelligendus est Comes Paceccius, cum instrumento a se inuenito, quod Pantometrum appellat, ex vna statione distantias locorum metiri se posse affirmat, quamvis eo quidem haud immediate angulum parallacticum, sed angulos potius A et B ad basin metitur. Nondum Paceccianum instrumentum, quod postea Christianus Mayerus descripsit, habebam cognitum; venerat tamen tum aliquis de eo ad me rumor, cum aliud mihi forte Pacecciano perfectius imaginatus sum, cuius descriptionem aliquam alia occasione dabo; nunc vero varios angulum parallacticum, quamvis A et B non sint cogniti, determinandi modos dabo: neque enim eos nisi obiter cognitos haberi oportet ad distantiam puncti C sine errore in mappa geographica notabili determinandam; certe 100 pedes in mappa admodum ampla vix scrupulum aequant, aut parum superant. Verum ne assertio mea de eadem ratione AB ad AC, mutatis non nihil angulis A et B, modo C constans maneat, in dubium vocetur, demonstrationem iungo. Ponamus (fig. 20.) loco anguli recti CAB vel obtusum C α B, vel acutum C α B, qui tamen a recto parum differant, aedesse, angulum vero C esse exiguum. Erit itaque distantia CA respectu AB valde magna, et cum in data hypothesi C α B, et C α B proxime recti sint, adeoque aBA, et AB α valde exigui, et insuper linea AB respectu CA breuis sit, erunt qA et A α omnino exiguae lineae, et C α , CA,

R 2

ac

ac $C\alpha$ perparum different: quodsi ergo etiam αB et αB ab AB parum differant, erit eadem ratio baseos AB ad AC , atque αB ad αC , vel αB ad αC , hoc est, siue angulus A perfecte, siue proxime rectus sit, eadem est ratio baseos anguli parallactici, ad distantiam loci. At αB , AB , αB in dato casu parum admodum differre, sic ostendo:
 $\alpha B:AB = \text{Radius}:\sin. \text{anguli } \alpha$, qui proxime rectus est; atqui sinus angulorum proxime rectorum parum admodum a radio differunt; ergo αB ab AB parum omnino differt. Similiter $\alpha B:AB = \text{Radius}:\sin. \text{anguli } \alpha$. qui et ipse proxime rectus est; ergo etc. Q. e. d.

§. XXII.

Quam parum sinus arcuum quadrantem fere aequantium ab ipso sinu toto differant, vel obiter libellos sinuum inspicienti patet. Certe in exemplis particularibus patet, quam parum erroris inferatur, si angulus A pro recto habeatur, quamuis notabiliter a recto discedat. Sit enim angulus parallacticus $BCA = 20'$; BC aequet 10 pedes; ponamus 1° . angulum A esse rectum; post esse acutum $= 88$ graduum; in casu primo erit Tang. anguli $C:AB = \text{Radius : } AC$.

AB log. + sin. tot. log.	11,0000000
C. Tang. log.	7,7647610
AC. log.	3,2352390

$$\begin{array}{r}
 \text{AC. log.} \\
 \text{AC} = 1718, 8 \text{ pedes. In casu secundo dein erit Sin. } 20' : \\
 \text{AB} = \text{Sin. } 88^\circ. 20' \text{ supplementum anguli CBA:AC} \\
 \text{Sin. } 88^\circ. 20' \text{ log.} + \text{AB log. } 10, 9998162 \\
 \text{Sin. } 20' \text{ log.} \\
 \hline
 \text{AC. log.} & 7, 7647537 \\
 & \hline
 & 3, 2350625
 \end{array}$$

est; itaque modo angulus parallacticus exacte sit mensus, vera loci distantia ex eo bene colligitur.

§. XXIII.

Manet autem etiam angulus parallacticus idem manente distantia CB, et basi anguli parallactici AB vel αB , vel αB , siue angulus A rectus sit, siue α vel α proxime rectus. Quoniam enim sinus totus a sinu anguli proxime recti vix quidquam differt, ratio sinus anguli A ad CB eadem est, siue rectus sit A, siue proxime rectus α vel α : At vero vt CB ad sinum anguli oppositi A, ita AB vel αB , vel αB ad sin. anguli C; ergo, si $AB = \alpha B = \alpha B$, vti ponitur, erit etiam sinus anguli C idem, consequenter C idem angulus. Res etiam exemplo pateat. Sit A angulus rectus, erit eius sin. log. 10.000000, sinus vero $\alpha 88^\circ$ erit log. 9,9997354. Sit $CB = 1000$; $AB = 10$; erit log. Sin. anguli C in casu priore 8,000000; in posteriore 7.9997354. priori respondent 34', 23''. posteriori 34', 22''. differentia vnius minuti secundi est, effete que multo minor, si distantia BC poneretur maior, et angulus parallacticus minor. Iam ad methodos varias angulum parallacticum metiendi progrediamur.

§. XXIV.

Problema. Ex duabus altitudinibus A, et B eiusdem turris (fig. 21.) loci distantis C angulum parallacticum ACB ope libellae metiri. Suppono, libella te instructum esse perfecta cum tubo optico, qui micrometro armatus sit; repraesentet D aream tubi optici tenuissimis filis decussatim aream scindentibus. *Solutio.* Ex altitudine A prospice ad locum distantem C, et libella horizontaliter constituta vide, num punctum C appareat in area tubi supra,

an infra, an in ipso filo horizontali $m\ n$, et quot minutis primis et secundis supra vel infra hoc filum sit, si non in ipso filo apparet, ope micrometri metire. Idem fac in loco turris inferiore B, et, siquidem in A ipso filo horizontali in II apparuerit, in B vero appareat in III (si tubus est astronomicus in loco inferiore profundius apparabit) erit II, III micrometro mensus angulus ipse angulus parallaeticus. Si in A apparuerit supra filum e. g. in I, in B vero infra in III, erit summa angulorum seu I, II+II, III angulus parallaeticus. Si tam in A, quam in B, vel vtrinque supra, vel vtrinque filum horizontale apparuerit, erit angulorum differentia angulus parallaeticus. e. g. si apparuerit in A, obiectum infra filum $m\ n\ 1'$, $2''$. in B vero $15'$, $12''$: erit angulus parallaeticus $14'$, $10''$. quae omnia geometriae elementaris peritis satis liquent.

§. XXV.

Corollarium imum. Ex vna itaque turri ope libellae omnium locorum circumitorum non nimis remotorum ex duabus eius altitudinibus visibilium distantias, mensa altitudinum differentia AB, satis exacte inuenire licet, insigni vtique geodesiae, et geographiae emolumento. Debet tamen differentia altitudinum pro geodesia esse satis magna, siquidem distantiarum dimensiones exactae petantur, et pro geographia distantiae locorum non enormes, ne angulus parallaeticus nimis fiat exiguis.

§. XXVI.

Scholion. Nihil molestum magis geographo integræ regionis mappas paranti accidit, quam quod plerumque contingit, vt, dum ex duabus aut tribus turribus circumitorum locorum distantias determinare velit, non eadem obiecta in vna turri videre queat, quae vidit in alia.

e. g.

e. g. in turri vna A videt C, D, E, F, G, in turri B videt obiecta C, G, M, N, O, P; itaque ex A et B solum locorum C et G distantias determinare poterit. Reliquorum vero obiectorum in alterutra turri ab interpositis siluis, collibus etc. obiectorum distantias ex observationibus in his solum turribus factis, sine subsidio anguli parallactici determinare non poterit. Vide itaque, quam insignis sit inuenitus a me nouus libellae aquatice usus, ad distantias locorum ex una quasi statione determinandas.

§. XXVII.

Corollarium 2dum. Similiter ex eiusdem collis aut montis diuersis altitudinibus A et B (fig. 22.) visorum procul locorum distantias ope libellae detegere licet. Ponamus enim A, et B, et C in eodem plano verticali, saltem proxime sita esse: mensa ope libellae angulo ACB, seu DCB, determinanda est eius basis DB, quod quidem, mensa linea AB, et angulo A vel B ope trigonometriae in triangulo rectangulo ADB, ut omnibus geodaetis notum est, facile fiet, et inde eruetur distantia DC, (AD respectu magnae lineae AC habetur pro nihilo;) si vero locus multum distat, AD ex ipsa trianguli ADB determinatione habetur.

§. XXVIII.

Corollarium 3um. Si angulus parallacticus omnino exiguus, aut prope nullus est, distantias locorum ope anguli parallactici determinare amplius haud licet; hinc pro valde remoti loci distantia inuenienda altitudinum differentia seu AB (fig. 21.) non debet esse nimis modica. Ecce hic angulum parallacticum pro varia eius bases ad distantiam ratione:

Basis.

Basis.	Distantia.	angulus parallacticum.
I.	10.	5° 44'. 21".
I.	30.	1. 54. 36.
I.	50.	1. 8. 45.
I.	75.	0. 45. 50.
I.	100.	0. 34. 23.
I.	200.	0. 17. 11.
I.	500.	0. 6. 53.
I.	1000.	0. 3. 26.
I.	2000.	0. 1. 43. etc.

§. XXIX.

Corollarium 4tum. Quantum incertitudinis est in metiendo angulo parallactico, tantum quoque est in determinanda per eum loci distantia. e. g. Simus de angulo parallactico 45'. 50" ad 5" incerti, h. e. eius partem 550mam, erimus etiam de distantiae parte 550ma incerti; cumque ea sit ad basin 1:75, si basis sit 10 pedum, distantia ad unum pedem 4 digit. incerta erit. Haec incertitudo crescit decrescente angulo, at minuetur illo crescente: hinc pro locis vicinis exigua, pro valde distantibus magna est.

§. XXX.

Corollarium 5tum. Quoniam si locus valde vicinus est, angulus parallacticus maior inuenitur, quam vt eum area tubi optici capiat, metiri eum ope libellae non possumus, nisi iunctus libellae sit sector aliquis. Imo etsi angulus parallacticus non nimis paruus sit, si tamen locus distans multum supra, aut multum infra libellam ex statione nostra appareat, angulum parallacticum area tubi libellae iuncti non capiet.

§. XXXI.

§. XXXI.

Corollarium 6tum. Si tabulas nobis fecerimus, quae angulis parallacticis respondentes distantias relate ad basin exhibeant, aut earum logarithmos, data basi et angulo parallactico, distantia facillimo calculo eruetur. Tabulae istae sequenti inniterentur principio: *Basis anguli parallactici est ad distantiam obiecti, ut sinus totus ad cotang. anguli parallactici.* Quapropter, si in cotangentium logarithmis auferatur a characteristica 10, residuum dabit logarithmum, qui additus logarithmo baseos praebet logarithmum distantiae: aut si basin multiplicas per cotangentem anguli parallactici, sumpto radio = 1, prodibit distantia. e. g. Sit basis = 10 pedum; angulus parallacticus 30; logarithmus baseos erit 1, 000000, cui addi debet logarithmus 2, 0591416 adeoque distantia 1145 ped. 9 digit. vel tangentem 114599 multiplica per 10, et prodit eadem distantia 1145.9.

§. XXXII.

Corollarium 7mum. Crescente basi decrescit incertitudo pro eadem distantia. Nam sit e. g. distantia 20000 pedum, basis 10ped. erit angulus parallacticus = 1'.43" = 103" cum incertitudine, quae proxime $\frac{1}{20}$ partem distantiae aquat, sive 1000 pedes. Sume vero, basin esse 20 pedum, erit tum angulus parallacticus = 3', 26" cum incertitudine, quae $\frac{1}{41}$ partem distantiae, seu 488 complectitur.

§. XXXIII.

Corollarium 8uum. Hinc distantiae valde magnae nimis inaccurate per angulos parallacticos innotescunt, si basis sit exigua. Quapropter loca valde distantia ex eiusdem turris diuersa altitudine ope libellae non possimus
S metiri.

metiri. At ex diuersa altitudine eiusdem montis, quae satis esse diuersa potest, etiam valde remotorum locorum distantiam determinare licebit.

§. XXXIV.

Corollarium gnum. Etiamsi duae stationes eiusdem montis, ex quibus in locum distantem tenditur, ad angulum parallacticum, ope libellae agnoscendum, sint in planis verticalibus longe diuersis, attamen haberi possunt pro talibus, quae in eodem plano verticali sint, modo non enormiter a se distent: quia locus remotus in eadem supra terram altitudine, seu in eodem plano horizontali, vel tantumdem supra horizontem eleuatus, aut infra eum depresso appetit, siue consistas in hoc, siue in alio dexteriore, aut sinistrore loco, modo sit proxime eadem a loco remoto distantia respectu ad basin anguli parallactici, et statio sinistra a dexteriore non enormiter remota sit.

§. XXXV.

Hactenus angulum parallacticum in plano verticali saltem aequivalenter eodem esse sumimus: progrediamur ad situm anguli parallactici in plano horizontali. Si lineae fiduciae (fig. 23.) $A C, B C$ ex duabus stationibus A et B , in eodem plano horizontali sint, ad duas lineas parallelas $A a, B b$ referri possunt, angulum parallacticum inde eruere licet; nempe I. si una linea fiduciae $B C$ cadit in ipsam parallelarum vnam $B b$, angulus $a A C_1$ est = angulo parallactico $A C_1 B$. II. si locus C_2 est inter lineas parallelas $A a, B b$, summa angulorum $a A C_2$ et $b B C_2 = A C_2 B$ ang. parallact. III. si extra eas cadat in C_3 , angulorum $a A C_3$ et $b B C_3$ differentia, seu $a A C_3 - b B C_3$ angulum parallacticum $A C_3 B$ constituit.

§. XXXVI.

§. XXXVI.

Si ex A et B tendatur in locum infinite quasi remotum lincae eo tendentes *Aa*, et *Bb* erunt inter se parallelae. Quare si post locum propinquorem C longissime remotum e. g. montis alicuius cacumen appareat, angulum parallacticum metiri ex locis A et B licet, e. g. (fig. 23. et 24.) appareat in statione A locus C in II, dum tubum in remotum locum ita direxisti, ut is filo verticali *mn* obtegatur; appareat post in altera statione B in I, dum iterum filum *mn* locum remotum tegit; metire micrometro I II, seu in prima statione IIc, in secunda Ic, et summa praebet angulum parallacticum, vnde distantiam eruere licet, et si A et B vicina sint, modo non nimis vicina respectu distantis loci C (§. 32. etc.)

§. XXXVII.

Pro locis remotis etiam sidera prope horizontem a duobus obseruatoribus, uno in A, altero in B simul conspecta, item azimutha simultanea siderum, maxime dum altitudo eorum est supra horizontem exigua, haberi possunt.

§. XXXVIII.

Quodsi locum quasi infinite remotum non inuenias, ad quem ex duabus stationibus A et B locum vicinorem C referre possis, expone in distantia fatis magna e. g. 100 maiore, quam A distat a B, signum aliquod, exempli gratia tripodem aliquem cum superposita virga verticali D (fig. 25.) cum pede, cui insistat, ut super mensam commode dextrorsum, aut sinistrorsum moueri possit in ipsa linea fiduciae AC. Tu nempe per tubum ad C prospiciens

monebis vel clamore, vel signo motu manus dato, vt vel dextrorum, vel sinistrorum moueat socius tuus signum, seu candelabrum D, donec perfecte in linea AC, aut saltem in eius plano verticali consistat in n. Quo facto socius tuus super alium tripodem aliud tale candelabrum constituat in m, ita, vt mn fiat = BA, et angulus Ann proxime rectus sit; eruntque lineae An, Bm parallelae, adeoque CBm = ACB angulo parallactico, quem metiri, si exiguus sit, micrometro poteris, aut sectore horizontali, si sit maior, quam vt eum tubi area capiat.

§. XXXIX.

Ad mensulae praetorianae nunc usum transeamus. Omitto vulgo nota, et affero tum penitus noua, tum certe non vulgo usitata. Ac primo mensulam facio multo ampliorem, ac alias solent, vt eam tamen unicum chartae amplissimae, quae haberi potest, folium tegat. Eam etiam planissimam et firmissimam esse volo, facile tamen mobilem, ita vt cochlearum ope situm horizontalem et directionem laterum desideratam molli motu obtineat. Iungo etiam diopteras examinales, ipsi mensae adhaerentes, mobiles tamen, donec ope cochleae figantur. Harum ope singulis momentis examinare licet, num mensula ex situ pristino fuerit casu aliquo dimota. Verum machinamenti huius descriptionem operi geodaetico seruo, sciens, etiam ab aliis mensas, iisdem fere dotibus instrumentis, paratas esse, hoc solum discrimine, quod mea minus preciosa sit. Quod caput rei est, usum mensae ad operationes geodaeticas, quantum a pristino differat, expli-
cabo.

§. XL.

§. XL.

Secundum communem methodum mensa primum statuitur in vna statione, quam vocemus A, collimatur ad obiecta, quorum distantias et situs inter se ope mensulae determinare volumus, et prope regulam (fig. 26.) circa punctum *a*, quod imminet stationi A, sensim circumactam tot ducuntur lineae, quot obiectorum ex stationibus A et B situs determinare volumus. Notantur vero circa marginem mensae singulae lineae vel numeris vel literis, et in codicillo aliquo describuntur obiecta correspondencia. Transitur dein in stationem B; lineae *ab* tot super mensula decempedae et pedes ex minuta mensura tribuuntur, quot AB habet ex mensura visitata seu magna; collocatur *b* super *B*, et *ab* super *AB*; ex *B* collimatur iterum in omnia haec obiecta. Nunc quidem opus haud est denuo lineas ducere, sed, dum regula tendit in obiectum aliquod e. g. *m*, illius obiecti nomen in codicillo quaeritur cum numero correspondente e. g. *V*, quaeritur dein linea *aV*, fitque punctum, vbi regula *bm* lineam *aV* secat. Adscribitur *s*, vel ipsum nomen obiecti; nam punctum *s* est ipse obiecti *m* locus in mensula. Si quidem obiecta sint pauca admodum, et a se multum remota, haec praxis difficultate caret; at vbi obiectorum ingens multitudo est, in statione A ductis ex *a* lineis, tota fere mensula impletur, latus labor est, et perpetuum confusionis periculum. Insuper innumeris baculis opus, si terminos omnium agrorum ex stationibus A et B determinare velis, nouumque confusionis periculum; molesta est sic et difficilis dimensio. Papyrus autem mensae superinducta tot lineis foedata ipsa imaginem agrorum dimenorum oculis minime blandientem exhibit: hinc agri circumiecti facta imago in aliam papyrus transferenda et depingenda est.

S. 3

§. XLI.

§. XLI.

Omnibus his molestiis mea mensam adhibendi ratio caret. Et intra permodicum tempus plus efficitur, quam alias admodum longo. Opus autem habeo obseruatorem socio, qui in statione B consistens in idem mecum obiectum tendat, in quod ego ex statione A, vbi mensa mea collocatur. Ille vero quadrante instructus est, aut quadrantis defectu trianguloaequilatero ex leuibus tignis aut regulis composito, quod quadrantiaequualet, et, quamuis minime preciosum, satis tamen accuratum pro metiendis angulis instrumentum est. Quodsi distantia non sit nimia, clamore mihi indicat socius, anguli, quoties aliquem metitur, a se mensi mensuram, alias, sequenti ratione: Quaternionem habet papyraceum bicolorem regulis, si placet, ligneis circumdatum, aut saltem duobus bacillis propter ventum instructum. Eius vnius faciei pars dimidia est alba (fig. 27.), altera alterius coloris e. g. rubri; ex altera facie pars vna est alba, altera nigra. Faciei primae circumscripti sunt numeri 1, 2, 3 etc. Iam ponamus a socio meo obseruatum angulum fuisse $43^{\circ} 27'$. notandum est, situm huius quaternionis eminus visivarium, indicare mihi numeros: nempe situm, quem figura exhibet, denotat 2. Si numerus 1 summite obtinet, ita ut linea verticalis fecerit oppositos huius papyracei quadrati angulos, denotat 1. Si numerus 8 summus sit, ita ut ex parte sinistra sit color rubeus, ex parte dextra albus, quos linea verticalis terminet, situs hic denotet 8. etc. paucis illum numerum denotat quaternionis situs, qui in eo situ summus est. At quando 9 indicandum est, vertitur quaternio, monstraturque mihi in eo situ, ut color albus sit superior, niger inferior. At, si zerus (0) indicandus est, color niger fit superior, albus inferior.

Ergo

Ergo post singulas obseruationes a se factas socius meus quater hunc quaternionem alternis attolens, et demittens mihi obuertit, vt mihi quatuor numeros, mixtis si occurrant zeris, monstrant. Ergo noto monstratos numeros, quos et si non videam, ex situ quaternionis colligo, e. g. 4, 3, 2, 7, vnde scio angulum a socio, obseruatum esse $43^\circ, 27'$. Si monstrat mihi 0, 9, 0, 8 scio angulum obseruatum fuisse $9^\circ, 8'$.

§. XLII.

Angulos a socio obseruatos transferre ego debo in meam mensam. Hoc vt commode faciam, paratos habeo bacillos, vt voco, tangentiales; commodum est, habere varios secundum variam assumti radii arbitrariam mensuram. Notantur autem in singulis bacillis graduum saltem 45 tangentes, et quidem notantur in singulis bacillis bis, nempe a parte dextra, et sinistra. Partem bacilli talis infimam exhibet figura 32, et eius sectionem verticalem ab . Notari etiam possunt tangentes dimidiorum graduum, et singulorum 15 minutorum, aut denorum quorumuis. Iam usus horum bacillorum, qui admodum recti esse debent, nec nimis flexiles, hic est: in mensula mea (fig. 28.) construo quadratum $mncb$, in cuius latus unum cadat basis ab , et in angulum b cadit locus stationis B in mensa repraesentatus; longitudo vero laterum tangentem 45 graduum ex mensura alicuius bacilli tangentialis aequat. Lineam nc produco ultra c , siquidem id mensae spatium patitur, atque etiam mb produco ultra b ad finem mensae, et aliud quadratum minus iungo maiori latere bg minoris cuiusdam bacilli tangentialis, tangentem 45 graduum aequante. Curo autem, vt anguli omnes fiant accurate recti, quod, vt facilius obtineam,
habeo

habeo in bacillo quodam secantem 45° designatum. Sed etiam lineae nc ad extremitatem mensae duco aliam parallelam NC , aut intra nc , si haec extremitati proxima sit, ita ut distantia huius lineae NC a linea ab vel ex longiore, vel ex breuiore bacillo tangentiali, quam est mn quadraginta quinque graduum tangentem aequet. Similiter MN parallelam mn duco. His paratis in b infigitur acus tenuissima, circa quam tanquam centrum filum sericum admodum tenue be sit mobile. Iam si in mensam transferendus est angulus aliquis e. g. $43^\circ. 30'$, applico bacillum tangentiale ad latus quadrati mn oppositum angulo b , ita ut gradus o veniat in lineam ab productam in m , gradus vero 45 in n . Tenue filum infra regulam ad et infra bacillum mn transiens be duco ad gradum datum $43^\circ. 30'$. in bacillo ex latere punctum b respiciente notatum, eritque angulus $mbe = 43^\circ. 30'$. Si iam eodem tempore tendat regula mea circa a mobilis in obiectum, quod voco Q , quod socius meus in B constitutus videt sub angulo ABQ , $43^\circ. 30'$, locus eius in mensula debet esse punctum q , vbi filum be secat regulam ad . Iunxi autem regulae ad in a paruam machinulam, quae eam retinet, ne ab acu recedat. Regula vero ad non ita proxime tota incumbit mensae, vt non infra illam filum eb libere transeat. Subiectum in extremitatibus paululum crassioris chartae fragmentum satis eam attollere potest; ut liber sit sub regula fili serici be motus.

§. XLIII.

Quodsi angulus ABQ maior sit semirectus, bacillum tangentiale applico lineae cn ita, ut gradus O veniat in c , tangens 45° in n . Tum filum infra illum transfire debet, e. g. si angulus ABQ sit 57 graduum, infra gradum 33, qui

qui est complementum ad 57° , si a puncto c versus n numeratur. Verum in ipso bacillo singulis denis saltem gradibus adscripti sunt numeri graduum complementi ita, ut prope 30 sit 60 , prope 10 , 80 etc. (fig. 32.) quo commodius cuiusvis anguli complementum habeatur.

§. XLIV.

Si angulus ABQ etiam recto maior sit, e. g. 105° ; applico bacillum tangentiale lineae cf ita, ut eius initium, seu o gradus veniat in c , et numero in bacillo versus f excessum anguli ultra rectum, in dato casu 15° . Infra tangentem 15° ergo filum transfire debet. At si non sufficiat linea cf , quia nimis breuis est, in latere minoris quadrati gh , vel latere hi ; minore conueniente bacillo determino anguli dati supplementum, simili modo ac in maioribus lateribus nc , et mn ipsos angulos determinauimus, transeunte infra bacillum filo. Quodsi vero linea bc nimis propinqua sit margini mensae, ut quadrato minori non supersit spatium; linea NCF , quae pro hoc casu erit infra cf ducta, seruire poterit, ut ei applicato bacillo tangentiali radio bC conueniente, et plures etiam, quam solum 45 graduum tangentes exhibente, excessum anguli dati ultra 90° determinare possumus.

§. XLV.

Quotiescumque regula ad transit lineam nf (fig. 29.) quod saepissime continget, quia tum lineae nc aptari non potest bacillus tangentialis ei conueniens, si fieri possit, aptetur suus lineae Nc , et, in eo determinetur gradus anguli abq . Quodsi autem regula ad , nc , et NC pertranseat; tum quidem neutri toti aptari poterit bacillus suus. Verum (ponamus angulum abq peti 80°) aptetur li-

T

neae

neae alterutri bacillus tangentialis ita, vt tangens 45 graduum veniat inter *n* et *c*, et gradus anguli complementi 10 gradus secetur a linea *mn*, et filum transcat extremitatem bacilli seu tangentem 45, eritque angulus *mbq* = 80°.

§. XLVI.

Pari modo, si regula secat lineam *mn*, applicetur extremitas bacilli, quae initium diuisionis seu gradum *o* habet ad lineam *mn*, et regulae gradus e. g. 30, si angulus *abq* debet esse 30°, veniat in *m*. Filum vero per extremitatem regulae seu gradum *O* ducitur. Si regula solam secet lineam *mn*, non autem lineam *MN* supra 45 gradus, poterit angulus in linea *MN* determinari.

§. XLVII.

Videamus nunc, qua ratione in mensam nostram areae cuiusdam campestris, aut fluuii, aut viae etc. imago coniiciatur, et obiectorum quorumcunque in area campestri positorum situs et distantiae determinentur. Fiat primo (fig. 28.) *ab* in mensula = *AB* in campo, proportionali puta mensura, et mensa in *A* posita sit ita, vt *a* immineat puncto *A* in campo, *ab* vero cadat in *AB*. Socius obseruator constitutus in *B*, quadrante instructus, aut quadrantis analogo instrumento, paratus est ad metiendos angulos, quos lineae ex *B* in obiecta occurrentia ductae cum basi *BA* faciunt. Tum tertius quidam homo prope littora fluuii, e. g. quem in mensam coniicere volimus, ambulans (fig. 30.) consistat aliquamdiu in singulis locis 1. 2. 3. 4. etc. ubi flecti sensibiliter fluuium aduerit. Quodsi campus inaequalis fit, collibus et vallibus asper, aut dumetis impeditus; gerit ille homo praelongam perticam cum vexillo in summitate, vt eminus facile videri

videri queat, quandoque etiam opus erit ex minore mortario electo globo fumante, aut assurgente fumo loci, vbi consistit, eminus signum facere. Vt cunque sit, ubi cunque consistit homo ille, tendimus in erectum signum, ego simul et socius meus: ego dirigo meam in illum regulam; socius meus metitur angulum, quem linea illo tendens cum basi BA facit, eumque mecum communicat: ego vero mox illum ex puncto B in mensulam transfero, secundum dicta §§. praec. et noto punctum q (fig. 28.) vbi filum sub eo angulo transit meam regulam. Ita una statio post alteram, in qua consistit noster homo ambulans cum signo suo in singulis non nihil e. g. per tempus vnius minutus primi moratus, in tabulam coniicitur, iunctisque per lineas punctis (fig. 30.) 1. 2. 3 etc. stationum, flauii ripa, aut via flexuosa in mensam nostram coniecta est. Similiter obiecta quaevis, ad quae consistit, in tabulam coniiciuntur. Si ille instructus sit horologio portatili, et ego similiter, notet ille tempus, quo in quo vis loco constiterit, et locum, ego vero tempus observationis: conferenti tempora innotescit mihi, quae fuerint ea loca, in quibus constitit, et licebit mihi ea in mensa suis nominibus aut signis indicare. Sic breui temporis spatio excipiemus sat magnam aream plurimis, in ea obuenientibus notandis obiectis variata, citra ullum perturbationis periculum, quod alias, nisi multo longiore tempore, et mensae ad confusionem vitandam superinducta saepius noua papyro, facere non possemus, habemusque in ipsa prima charta, qua mensa vestita est, totius illius areae bellam imaginem, in qua distantias locorum ope circini ad proportionalem basi mensuram examinare licebit. Quae quidem methodus penitus noua est.

§. XLVIII.

Mentio etiam facta est in quaestione proposita dimensionis sine instrumentis. Quod quidem haud ita intelligendum existimo, ac si etiam catena, qua basin metimur, excludatur. Notae sunt praxes antiquae quae ope catenae et aliquot baculorum docent lineas locorum accessorum, et inaccessorum distantias metiri, quas Penthaler Geodesiae sue parte II. Cap. 2. describit. Aio vero, etiam angulos nos metiri posse sola catena, exempli causa (fig. 31.) metiendus in campo sit angulus A C B; posito baculo in C, extende catenam, quae aequet 10 pedes, e. g. usque in a, ac defige ibi baculum, qui, oculo post C posito, tegat A. Similiter fac in b: tum catena metire chordam a b. Habebis autem ad manum pedem in 100 lineas diuisum, ut, si a b non exacte certum numerum pedum longa sit, etiam ultimi pedis partes determinare liceat. Ponamus fuisse a b = 9 pedes 36 lin. ergo est $ac:ab = 1000:936$, dimidia chorda a b = 468 est sinus dimidi anguli a c b: inuenies vero in tabulis numerum graduum huic sinui respondentium $27^\circ, 55'$, quo duplicato habebis angulum a c b = $55^\circ, 50'$. etc.

§. XLIX.

Percorri iam omnes notabiores methodos locorum siue accessorum, siue inaccessorum distantias metiendi. Antiquorum praxes citavi; nouas meas explicavi, siue mensio fiat astrolabio, ut vocant, siue ope mensulae, siue sola catena; adieci modum sola libella aut tubo optico, aut adjuncto sectore, data basi permodica, distantias locorum sufficienter determinandi. Non descripsi aliena, sed attuli mea in usum tironum aliquando uberiori exponenda. Quapropter et quaestionis instituto, et desiderio Serenissimi Litterarum Fautoris satisfecisse me arbitror.

DIS-

D I S S E R T A T I O
DE
L O C O R V M D I S T A N T I I S
A B S Q V E
I N S T R V M E N T I S G E O D A E T I C I S M E T I E N D I S .

Omnis distantiarum dimensio cum aliud nil sit, quam inventio rationis distantiae metienda ad datam quandam longitudinem, seu mensuram; sine omni quidem mensura impossibilis est dimensio. Metiri tamen basim quandam geodaeta suismet pedibus potest, alterum alteri alternatim praeponendo. Verum haec quam lubrica sit dimensio, nemo non videt. Etiam ex tempore, quo sonus datam distantiam percurrit, eius longitudo innotescit; ipsum tamen tempus sine instrumento aliquo, horologio nempe aut pendulo, quomodo metiemur? Vt cunque, numerando pulsus arteriae, exiguum tempus metiri possumus quidem, sed minime accurate; et insuper ob celeritatem soni nimiam, nisi enormis sit distantia per soni progressionem mensa, enormes in ea sic metienda errores committantur necesse est. Itaque geodaetae saltem baculum suum viatorium ad basim metiendam concedamus. Nemo enim instrumento geodaetico instrumentum se ait, quod cum baculo ambulet. Iam baculo suo geodaeta ad metiendam AB sic vtetur: Humi pro-

T 3

cum-

Fig. 1.

cumbens, oculo post A posito, baculum humi iacentem diriget ad B, notabitque punctum *b* ad finem baculi, dum altera eius extremitas A contigerit. Promouebit dein baculum, ut iaceat in *bc*, similiter ad B directus; et ita perget, donec ad B peruentum fuerit, sciatque, quoties baculi sui longitudo in linea AB contineatur. Tum vero si nota sit in alia mensura longitudo baculi, facile erit longitudinem lineae AB in eadem dare. Exempli causa sit baculi longitudo = 3', 4'', linea vero AB = 10 $\frac{1}{2}$ longitudines baculi; erit ea = 35', 7''.

Sic itaque metiri basim baculo licebit; angulorum vero mensuram quod attinet, aio eam possibilem esse sine omni etiam instrumento, nisi pedes ipsos et oculos nostros inter instrumenta geodesiae referas. Attamen baculi saltem si insuper usum concedas, accuratior fiet dimensio quam sine illo. Ecce enim methodum metiendi angulos, fors haec tenus a nemine usurpatam, molestam quidem, non tamen inanem; quam vero in usum deducere ut possit geodaeta, eum problemata astronomiae sphaericae quaedam saltem non ignorare oportet, et soluere.

Fig. 2. Sit e. g. AB basis. D locus remotus, geodaeta consistens in A exspectet tempus, quo solem supra D optice consistere videat, seu umbram corporis sui directe a punto hoc in plagam oppositam tendere aduertat, et mox metiatur suis metibus longitudinem umbrae sui corporis, ex qua altitudinem solis, et tempus diei: atque ex hoc demum azimuthum solis seu angulum FAD, quem linea AD (basis quadrantis verticalis tum per solum trans-euntis) cum linea meridiana FA facit, calculo eruet. Quodsi ei saltem virga quadam, aut baculo viatorio ut liceat, tutius erit illius umbram ipsa hac virga metiri, et inde horam diei colligere, quam ex umbra corporis sui.

Simili

Simili modo inueniet angulum FAE, quando sol apparen-
ter loco E imminet, et sic omnium locorum a meridiana
linea AF distantiam, ac demum etiam angulum FAB,
quem meridiana AF cum basi AB facit. Cognitis his an-
gulis etiam anguli DAB, EAB etc. quas lineae fiduciae
AD, AE ad loca, quorum situs exquiritur, tendentes cum
basi AB faciunt, innotescunt: est nempe DAB = FAB —
FAD, EAB = FAB — FAE. Datur etiam angulus
DAE = FAE — FAD.

Sicut vero in statione A per azimutha solis angulus
e. g. DAB exquisitus est, sic etiam in statione B, quando
sol puncto D ex B viso apparenter imminet, angulus azi-
muthalis GBD, et dum puncto A imminet ABG et ex
his angulus ABD = ABG + GBD exquiretur. Inuentis
autem angulis DAB et ABD, et mensa basi AB commu-
ni trigonometrico calculo, AD et BD inuenientur. In-
uentis locorum remotorum D, E etc. distantiis et sitibus
respectu baseos AB, etiam eorum inter se distantiæ de-
terminari poterunt. Sic e. g. ex AD et AE atque angulo
ADE linea DE per calculum eruitur.

Vti interdiu azimutha solis, ita sub crepusculum
matutinum et vespertinum azimutha stellarum, quae singu-
lari fulgore micant, ad determinandas locorum distantias
et situs iuuabunt. Idem auxilium luna et planetae praesta-
bunt, modo noctis horam ex ortu stellarum earumque
situ cognoscere scias.* Et supplebunt haec sidera eorum
locorum determinationem, quae, quia lineae meridianæ
nimis propinqua iacent, per azimutha solis aegre deter-
minantur.

Altitudo enim solis circa meridiem cum parum mu-
tetur intra horam etiam integrā, tempori respondens
azimu-

* Vide ephemerides Parisinas Maraldi,

azimuthum circa meridiem non satis accurate inuenitur, reliquo autem die satis accurate. Id etiam notandum est pro locis ultra lineam orientalem sitis, eorum, dum umbra corporis tui in illa tendit, situs respectu baseos AB per opposita solis azimutha quaeri. Si enim exempli gratia angulum azimuthalem FAD cognitum habes, etiam angulus FAH, quem linea meridiana FA cum fiduciae linea AH, in locum azimutho solis oppositum tendente facit, vna innotescit. Vidimus iam possibilem esse locorum distantium etiam dimensionem geodaetae ab omnibus instrumentis nudo. Nunc etiam si ei saltem catena, aut funiculi aut virga satis longa indulgeatur, praestare quid possit, videamus.

Vt angulorum quantitas in gradibus cognoscatur, dimensiones locorum remotorum, ad quae accessus non detur, solis catenis et baculis facere Pentherus Geodæsiae suae, quae Augustae anno 1732 sub titulo *Praxis geometriæ* prodiit, parte secunda capite secundo docet. Verum quas affert methodos, solum in ampla planicie et pro locis non valde remotis succedunt; afferam hic aliquam cum adjuncta demonstratione, quam Pentherus omittit.

Fig. 3.

Sit metienda distantia AB loci A ob aquas interiectas ex loco B inaccessi.

1. Defige baculum in B, alium in C, ac tertium in b, ita, vt, oculo ad b applicito, tibi locus A a baculo in C defixo tegatur.

2. Tende funiculum ex b ad B, et metire lineam bB, eamque bifariam diuide in d, atque hic quoque baculum defige.

3. Metire lineam Cd, eamque refer in dc.

4. Pro-

4. Progredere in linea Bc producta, donec in a venienti tibi simul obiectum A per baculum d , simul baculus B per baculum C tegatur; et metire lineam ab , cui AB aequalis est.

Demonst. In triangulis Cbd et cBd per constructio-
nem est $bd=db$, et $Cd=dc$, et anguli verticales $bdCacBdc$ aequa-
les sunt, itaque etiam angulus Cbd est $=dBc$, et bA parallela
 Ba , et ideo $Aab=aAb$: est vero etiam $adc=AdC$, et
simul $Cd=dc$; itaque triangula CAd et cad aequalia et
similia sunt, et $Ad=ad$: ergo etiam triangula AdB , et adb ,
ob $Ad=ad$, $bd=db$ et $AdB=aAb$, sunt aequalia et similia,
et est $ab=AB$, Q. e. d.

Vniuersalis autem et minus operosa est solis catenis,
aut sola etiam longiore virga, imo et baculo viatorio (sed
cum hoc minus accurate) metiendi ratio.

In libero campo eligo tres stationes A, B, C , vt ha-
beam tres bases AB, BC, CA , ex quibus omnium circum-
locorum distantias exquiero, aptissimam basin pro quauis
metienda adhibens. Nempe posito baculo meo viatorio
in B , ego in A consistens, nolo eminus obiectum aliquod,
e. g. arborem, post baculum meum collocatum. (aliquod
obiectum, cum libera sit stationum electio, quod post
baculum in B positum appareat semper, inuenietur). Tum
baculum meum ex B ad A reporto, et ad obiectum illud ten-
dens metior baculo meo lineam AB . Idem facio cum
lineis AC et BC . Difficultas solum aliqua est in eligen-
do loco C , vt post baculum in C collocatum inueniam
tam in A quam in B obiectum aliquod post illum latens,
at tentando et mutando aliquoties locum C res denique
succedet. Duco dein circulos circa puncta A, B et C ,
quorum radius est baculus meus viatorius, saltem 5 pedes
circiter longus, at si conceditur virga longior; aut cate-

Fig. 4

V

na,

154 *De distantia locorum siue accessorum, siue inaccessorum.*

na, vtique maiore radio hos circulos describo; quo enim ampliores sunt, eo accuratior erit dimensio. Nunc superest angulorum dimensio: metiamur exempli caussa in A angulum DAB. Baculo meo in A erecto ego humi procumbens in circulo in terra exarato noto punctum b, vbi posito oculo arbor illa post B a baculo meo in A tegitur. Hoc notato oculo meo circulum hunc perambulans inuenio punctum d, vbi a baculo meo mihi D tegitur. Metior dein chordam bd (posui autem ante lapillos in b et d, vel feci signum in terra in utroque loco) ex hac chorda ope calculi inuenio angulum bad aequalem angulo BAD. Sic ergo metiri angulos licet inermi Geodaetae solo baculo viatorio, aut, si ei catena concedatur, sola catena. Mensis autem angulis et basibus omnes distantiae locorum et situs respectu basium innotescunt per calculum, inno et distantiae eorum inter se; cognitis enim lineis e. g. AD et AE, cum angulo DAE, tertium latus DE in triangulo ADE inuenitur.

Dedi ergo nunc duplarem methodum metiendi angulos sine geodaeticis instrumentis, ultimam solo baculo minus accuratam (accuratiorem cum catena), alteram sat exactam per sidera. Basin metiri necessario debet geodaeta, siue pedibus suis, siue baculo, si catena denegetur, quapropter et hanc problematis propositi conditio nem omnino implesse me arbitror.









